

Amang'ana Amazamu ga Yisu

Kiriisitu

chimbu gaandikirwi na

Mataayo

Ubhukangati

Ikitaḅu kinu chandikirwi na Mataayo. Hanu Mataayo aari umurihya wa rigaati, Yisu akamubhirikira kubha umwiga waazi. Amang'ana maaru ganu Mataayo aandikiri makitabhu kinu, ni-ganu aaminyiikiriiryi umwene na amisu gaazi. Mataayo akaandikira Abhayaahudi bhanu bhiisiriiryi Yisu. Nawe, Ing'ana Inzumu iguru wa Yisu itari iguru wa Abhayaahudi abheene, ni-kubhaatu bhusi bhi isi yinu. Ing'ana Inzumu irabhuga, Yisu newe Kiriisitu nu Umusabhuri wa abhaatu. Kuhitira Yisu, Mungu akamara guusi ganu aari aragin'yi abhaatu kubha arakora.

Ikitaḅu cha Mataayo kiragambira ibhisigu bhyaru kubhwikari bhwa Yisu kusi kunu, kwima ukwibhurwa kwazi kuhika ukugaruka kwazi mwisaaru. Gatigati kirahurucha amiija ganu Yisu aari ariija abhaatu. Mumiija gaazi, toroobhoora chimbu ubhutiimi bhwa Mungu bhuri, na tararaarikwa kwikara ubhwikari bhwo okozomeerya Mungu.

*Ikishoko kinu Yisu Kiriisitu aaruuriiri
(Ruuka 3:23-38)*

¹ Ganu nego amariina gi ikishoko kinu Yisu Kiriisitu aaruuriiri. Yisu Kiriisitu akarwira murwibhuru rwu umutimi Daudi ni ikishoko cha Abhuraahaamu.

² Abhurahaamu akiibhura Iisaka,
Iisaka akiibhura Yaakobho,
Yaakobho akiibhura Yuuda na abhahiiri bhaazi.

³ Yuuda akiibhura Piriisi na Zeera kwa Tamaari,
Piriisi akiibhura Hiziruni,
Hiziruni akiibhura Araamu,

⁴ Araamu akiibhura Aminadaabhu,
Aminadaabhu akiibhura Nashuni,
Nashuni akiibhura Sarimuni,

⁵ Sarimuni akiibhura Bhoowazi kwa Rahaabhu,
Bhoowazi akiibhura Ubhidi kwa Ruutu,
Ubhidi akiibhura Yeeese,

⁶ na Yeeese akiibhura umutimi Daudi.*

Daudi akiibhura Sirimaani kumukari wanu aari
kubha umukari wa Uriya,†

⁷ Sirimaani akiibhura Rehobhowamu,
Rehobhowamu akiibhura Abhiya,
Abhiya akiibhura Asa,

⁸ Asa akiibhura Yehoshafaati,
Yehoshafaati akiibhura Yoraamu,
Yoraamu akiibhura Uziya,

⁹ Uziya akiibhura Yosamu,
Yosamu akiibhura Ahaazi,
Ahaazi akiibhura Hizikiya,

¹⁰ Hizikiya akiibhura Manaasi,
Manaasi akiibhura Amuni,
Amuni akiibhura Yusiya,

* **1:6** Rora Ruutu 4:18-22. † **1:6 Umukari wa Uriya** aari arab-hirikirwa Bhatishabha. Rora 2 Samwiri 12:24-25.

¹¹ na Yusiya akiibhura Yikuniya na bhaumwabhu.
Ribhaga rikahita, Abhiizirairi bhakagwatwa,
bhakahirwa mobhohocha mucharu cha
Bhaabhiri.

¹² Hanu Abhiizirairi bhaamariri kusaamibhwa
iyo,

Yikuniya akiibhura Sheyaritiyiri,
Sheyaritiyiri akiibhura Zirubhabhiri,

¹³ Zirubhabhiri akiibhura Abhihudi,
Abhihudi akiibhura Iriyakimu,

Iriyakimu akiibhura Azuri,

¹⁴ Azuri akiibhura Zaduki,

Zaduki akiibhura Akimu,

Akimu akiibhura Iriudi,

¹⁵ Iriudi akiibhura Iriazaari,

Iriazaari akiibhura Matani,

Matani akiibhura Yaakobho,

¹⁶ Yaakobho akiibhura Yuusufu, umusubhi wa
Mariyamu,

na Mariyamu akiibhura Yisu wanu akub-
hirikirwa Kiriisitu.‡

¹⁷ Mmbe, kurwa kwa Abhurahaamu kuhikira
ukwibhurwa ku umutimi Daudi kwari na
zinyibhuru ikumi ni inyi. Na kurwa kwa
Daudi kuhikira ribhaga rinu Abhiizirairi
bhaasaamiibhwi mobhohocha mucharu cha
Bhaabhiri, kwari na zinyibhuru izindi ikumi
ni inyi. Na kurwa ribhaga rinu bhasaamiibhwi
iyo kuhikira ukwibhurwa kwa Kiriisitu, kwari na
zinyibhuru izindi ikumi ni inyi.

‡ **1:16 Kiriisitu.** Kumaragirira bhukung'u, rora Ikiniibhasa.

*Ukwibhurwa kwa Yisu Kiriisitũ
(Ruuka 2:1-7)*

18 Ganũ nego amang'ana gu ukwibhurwa kwa Yisu Kiriisitũ. Mariyamu unina Yisu, aari arunjibhwi na Yuusufu. Nawe hanũ aari akĩri kuryakara, Mariyamu akagega inda kubhũnaja bhwe Ekoru Indĩndu. §

19 Yuusufu umusubhi waazi, aari umũũtu we eheene mubhũtangĩ bhwa Mungu. Atĩndiri asu-uchi Mariyamu, kũgayo akeenda amwangĩ kim-bisi.*

20 Nawe, hanũ Yuusufu aari ariiseega gayo, ro-gendo rũmwi maraika† wũ Umũkũrũ Mungu aka-muhwarũkira mokerooto, akamubhũũrĩra, “Yu-usufu, umwana wũ umũtĩmi Daudi,‡ utũubhaha kukwĩra Mariyamu, kũ kubha inda yaazi ay-ibhwiĩ kubhũnaja bhwe Ekoru Indĩndu.

21 Ariibhũra umwana wi ikisubhi, naawi umũrũki Yisu, § kũ kubha wuyo newe araasabhũri abhaatu bhaazi kurwa mubhũbhi bhwabhũ.”

22 Gayo gũũsi gaakũriibhwi, korereke ribhi ring'ana rĩnũ Umũkũrũ Mungu aagambiri kũnzĩra yũ umũrũũtiriri kubha,

23 “Rora, umusiiti aragega inda,

§ **1:18 Ekoru Indĩndu.** Kũmaragirira bhũkũng'u, rora Ikiniibhasa.

* **1:19** Kũring'aana ni isimũka ya Abhayaahudi, ariibhi umu-mura nu umuucha bhiirunjiryi, bhahaabharwa kubha bhiikwiri. Nawe kwari na ribhaga ryu umwaka mugima gu ukwirĩnda bhakĩri kwikwira. Ribhaga ryũsi riyũ bhatĩsiririibhwi kwikara hamwĩmwi kuhika rwu ukuryakara. Kumutiga wũnũ aarunjibhwi kukatuubhana no okobhorora. † **1:20 Maraika.** Kũmaragirira bhũkũng'u, rora Ikiniibhasa. ‡ **1:20 Daudi.** Kũmaragirira

bhũkũng'u, rora Ikiniibhasa. § **1:21** Enzobhooro yi iriina **Yisu**, Umũkũrũ Mungu arasabhũra.

neewe ariibhura umwana wi ikisubhi.

Ararukwa Imaanwiri.”*

Enzobhooro yaku, Mungu hamwimwi na niitwi.

²⁴ Hanu Yuusufu aabhuukiri, akakora chimbu maraika wu Umakuru Mungu aamubhuuriiri. Akakwira Mariyamu,

²⁵ nawe atariiri neewe kuhika hanu Mariyamu iitaurin’yi. Akamuruka umwana wuyo, Yisu.

2

Abhaminyi bha zenzota kurwa ruguru

¹ Yisu akiibhurwa murubhiri rwa Bhitirihimu mucharu cha Yudeya, ribhaga rinu Heroode aari amatimi. Ribhaga riyo, abhaminyi bha zenzota bhanu bhaaruuri ruguru, bhakahika murubhiri rwa Yirusariimu. Bhakabhuurya,

² “Ari hayi umwana wanu ibhwirwi abhi amatimi wa Abhayaahudi? Tuminyiri ibhwirwi, ku kubha enzota yaazi ikarorekana kwa niitwi ruguru, twiziri komosengera.”

³ Hanu amatimi Heroode iigwiri amang’ana gaabhu, akahaha, hamwimwi na abhaatu bhahsi bha Yirusariimu.

⁴ Neho Heroode akabhiringa abhakuu bhahsi bha abhakuhaani* na abhiija bhi imigiru† ja Musa, akabhabhuurya, “Kiriisitu ariibhurwa hayi?”

⁵ Bhakamugarukirya, “Ariibhurwa murubhiri rwa Bhitirihimu mucharu cha Yudeya. Tuminyiri

* **1:23** Rora Isaaya 7:14. * **2:4 Abhakuhaani.** Kamaragirira bhakung’u, rora Ikiniibhasa. † **2:4 Abhiija bhi imigiru.** Kamaragirira bhakung’u, rora Ikiniibhasa.

riyo, ku kubha Mungu akagamba kuhitira
umuruririri kubha,

6 'Imwi abhaatu bha Bhitirihimu mucharu cha
Yuuda,

matari bha koregwa mubhukangati bhwi icharu
cha Yuuda,

ku kubha kurwa kwa niimwi arahuruka
umukangati wenu akukangata abhaatu
bhaani bha Izirairi,

nchu umuriisha akuriisha zing'andu zaazi.'‡"

7 Neho Heroode akabhirikira abhaminyi
bha zenzota bhayo kwa mbisi, korereke
bhaazi bhamubhuuriri bhwaheene ribhaga rinu
bhaaruzi enzota.

8 Akumara, akabhatuma Bhitirihimu,
akabhabhuurira, "Muji mubhuuririryi
bhwaheene, kuhika momenye hanu umwana
wuyo ari. Hanu muraamobhone mondeetere
amang'ana bhwangu korereke na niinyi niji
komosengera."

9 Hanu abhaminyi bha zenzota bhiigwiri
amang'ana gu umutimi, bhakabhuka.
Rogendo rumwi, enzota yinu bhaaruzi ruguru
ikabhakangatira, ikiimirira hanu umwana aari.

10 Hanu bhaaruzi enzota yiyo, bhakazomerwa
bhukung'u.

11 Bhakasikira munyumba, bhakarora umwana
na Mariyamu unina, bhakahigama kosengera
umwana. Bhakatazura imirigu jabhu, bhakaha
umwana umubhanu gwi izahaabhu, umurumbasu
na manimani.

‡ 2:6 Rora Miika 5:2.

¹² Mmbe, Mungu akabhahama mobherooto kubha, bhatagaruka kwiki kwa Heroode. Bhakahurukira inzira yindi kugaruka iwaabha.

Yisu na abhiibhuri bhaazi bharang'osera Miisiri

¹³ Hanu abhaminyi bha zenzota bhayo bhaagiiri, maraika wu Umukuru Mungu akahwarukira Yuusufu mokerooto. Akamubhurira, “Bhuka! Ogege umwana na unina, ong'osere mucharu cha Miisiri. Msaagi iyo kuhika hanu niraakubhuriri ugaruki, ku kubha Heroode aramohya umwana areenda amwiti.”

¹⁴ Mmbe, Yuusufu akabhuka ubhutiku bhuyobhuyo, akagega mkaazi nu umwana, akang'osera Miisiri.

¹⁵ Bhakahika Miisiri, bhakiikara iyo kuhika hanu Heroode aakuuri. Amang'ana gayo gakakuribhwa, korereke ribhi ring'ana rinu Umukuru Mungu aagambiri kunzira yu umurutiriri waazi, “Nikamubhirikira umwana waani kurwa Miisiri.”§

Abhaana bhi ikisubhi bha Bhitirihimu bhariitwa

¹⁶ Hanu Heroode aaminyiri kubha abhaminyi bha zenzota bharya bhamukangiriiryi, akiigatana bhukung'u. Neho akatuma abhasirikari bhaazi Bhitirihimu hamwimwi na ahagero husi ha haguhi, akabhaswaja kubha bhiiti abhaana bhi ikisubhi bhusi bhi imyaka ibhiri kugaruka iyaasi. Akakorabhu kuring'aana na ribhaga rinu aabhuriirwi na abhaminyi bha zenzota.

§ 2:15 Rora Hooseya 11:1.

17 Neho rikabha ring'ana rinu umuruatiriri Yirimiya aagambiri,

18 “Ikirirũ kikabhoneka murũbhiri rwa Raama, ikirirũ nu ukwarama kwaru.

Rahiri araririra abhaana bhaazi,

inu atakwenda kuhunibhwa,

ku kubha abhaana bhaazi bhatareeho.”*

Yisu na abhiibhuri bhaazi bharagarũka Izirairi

19 Hanu Heroode aamariri kukwa, maraika wu Umũkurũ Mungu akamuhwarũkira Yuusufu mokerooto Miisiri,

20 akamubhũrira, “Bhũuka! Ogege umwana na unina, mugarũki mucharũ cha Izirairi, ku kubha bhanu bhaari bhareenda kwita umwana wuyo, bhakuuri.”

21 Mmbe, Yuusufu akabhũuka, akagega umwana na unina, akagarũka mucharũ cha Izirairi.

22 Nawe hanu iigwiri kubha Arikirũ umwana wa Heroode aari arakangata Yudeya, akubhaha kujayũ. Hanu Mungu aamubhuuriiri mokerooto ataja iyo naatu, akaja mucharũ cha Gariraaya.

23 Bhakahika murũbhiri rwa Nazariti, bhakikara iyo. Neho ring'ana rikabha rinu ryagam-birwi igurũ wa Yisu kanzira ya abharuatiriri, “Arabhirikirwa Manazariti.”

3

*Yoohana arakonza inzira igurũ wa Yisu
(Maaroko 1:1-8; Ruuka 3:1-18; Yoohana
1:19-28)*

* 2:18 Rora Yirimiya 31:15.

1 Zisiku nzaru zinu zihitiri, aareho umutu wumwi wunu akubhirikirwa Yoozana Umubhatiizi. Aari ararwaza mwitirigu rya Yudeya arabhuga,

2 “Mutigi ubhubhi bhwanyu, ku kubha ubhatimi bhwa mwisaaru* bhuraariiri.”

3 Newe aagambirwi nu umurutiriri Isaaya, “Riraka ryu umutu wunu akuragan’ya mwitirigu, ‘Mokonze inzira yu Umukuru, mogorore ibhithu bhyazi.’”†

4 Yoozana aari ibhuhiri ubhuzuki bhw ingamiya no omokena gwa riseero mukiribhizi.‡ Ibhyakurya bhyazi bhyari zingigi nu ubhwuki bhwa mwitirigu.

5 Abhaatu kurwa urubhiri rwa Yirusarimu, icharu cha Yudeya chusi, na zimbaara zusi zi ikitaaru cha Yorodaani, bhakabha bharamujaku.

6 Bhakatiga ubhubhi bhwabhu, akabhabhatiiza mukitaaru cha Yorodaani.

7 Nawe hanu Yoozana aaruzi Abhafarisaayo§ na Abhasadukaayo* bhaaru bharamujaku korereke abhabhatiizi, akabhabhuurira, “Imwi urwibhuru rwe enzoka! Wiiwi abhabhuuriiri muratura kong’osa itiniru ya Mungu yinu ikuuza?”

8 Mmbe, mokore amahocha ganu gakwereken’ya kubha mutigiri ubhubhi.

* 3:2 Mataayo asigiri kugamba **ubhatimi bhwa mwisaaru** hanu akugamba **ubhatimi bhwa Mungu**. Kमारगिरा भुकुंग’u, rora ring’ana **ubhatimi bhwa Mungu** muKiniibhasa. † 3:3 Rora Isaaya 40:3. ‡ 3:4 Zengebho zinu Yoozana aari akwibhoha, zaari ncha zu umurutiriri iriya. Rora 2 Abhatimi 1:8. § 3:7 **Abhafarisaayo**. Kमारगिरा भुकुंग’u, rora Ikiniibhasa. * 3:7 **Abhasadukaayo**. Kमारगिरा भुकुंग’u, rora Ikiniibhasa.

9 Mutiikangirirya naatu marabhuga, ‘Sukuru wiitu, ni-Abhurahaamu!’† Nirabhabhurira kubha, Mungu aratura kuchura amabhwi ganu gabhi abhaana bha Abhurahaamu!

10 Nangu itiniru ya Mungu iri iguru waanyu nchi ihaazi iri iguru wa amatina gi imiti. Na bhanu bhatakokora amahocha amazumu bharatinirwa, chimbu imiti jusi ginu gitakwibhura imisumu imizumu gihaatinwa na kutaashwa momorero.

11 “Inyi nirabhabhatiiza na amanzi kwerecha kubha mwichuriiri Mungu. Nawe araaza umutu wu ubhunaja kunkira. Nitakwenderwa nuru kutazura zisiri zi ibhikwira bhyazi.‡ Ewe arabhabhatiiza kwe Ekoru Indindu na komorero.

12 Na agwatiriiri uruhungu mumabhoko gaazi, korereke aseese inganu. Inganu yiyo arayikumingira mukitara chazi. Nawe umukunywa, aragwocha momorero ganu gutakurima zee.”

*Yoohana arabhatiiza Yisu
(Maaroko 1:9-11; Ruuka 3:21-22)*

13 Mmbe, ribhaga riyo, Yisu akarwa Gariraaya, akaja mukitaaru cha Yorodaani korereke Yoohana amubhatiizi.

14 Nawe Yoohana akagema komorecha, aramubhurira, “Niinyi nikwenderwa kubhatiizwa na naawi, ndora uraaza kwa niinyi?”

15 Yisu akamugarukirya, “Awi wiisiriryi ony-
oje ubhubhi nangwinu, ku kubha toreenderwa

† 3:9 **Abhurahaamu.** Kumaragirira bhukung’u, rora Ikiniibhasa.

‡ 3:11 Ariibhi umugini arasikira munyumba, omohocha wi iyaasi bhukung’u ahaamuruusha ibhikwira na kwoja amaguru gaazi.

tokore eheene y^usi yⁱna Mungu akwenda.” Neho Yoohana akiisirirya.

¹⁶ Hanu Yⁱsu aabhatiizirwi na kurwa m^amanzi, rogendo r^umwi risaar^u rikiig^uka, akarora Egoro ya Mungu iriika nchi ikiguuti na kwikara ig^uru waazi.

¹⁷ Neho, riraka rikarwa mwisaar^u rirabhuga, “W^unu ni-Mwana waani? S^umusigwa, niz^umirirwi nawe.”

4

Yⁱsu aragemwa na Shitaani

(Maaroko 1:12-13; Ruuka 4:1-13)

¹ Akamara, Yⁱsu akakangatwa ne Egoro Indindu kuja mwitirig^u korereke agemwe na Shitaani.*

² Akamara iyo siku merongo ene, ubhutiku nu umwise ariiyima kurya ibhyakurya. Itinir^u, akiigwa inzara.

³ Neho Shitaani akaaza komogema. Akamubhurira, “Ariibhi awi ni-Mwana wa Mungu, swaja amabhwi ganu gabhi imikaati.”

⁴ Nawe Yⁱsu akabhuga, “Yandikirwi muMaandiku Amarindu, ‘Um^uutu atakwikara kwa bhyakurya ibhyene, nawe kwa amang’ana ganu gakurwa kwa Mungu.’†”

⁵ Akamara Shitaani akamuhira murubhiri ururindu rwa Yirusarimu, akamwimiirirya kukikung^u cha rihekaaru,‡

§ **3:17 Mwana waani.** Kumaragirira bhukung’u, rora ring’ana Umwana wa Mungu muKiniibhasa. *

4:1 Shitaani. Kumaragirira bhukung’u, rora Ikiniiibhasa. † **4:4** Rora Amahiitya gi Imigir^u 8:3. ‡ **4:5 Rihekaaru.** Kumaragirira bhukung’u, rora Ikiniiibhasa.

6 akamubhaurira, “Ariibhi awi ni-Mwana wa Mungu, irekera haasi, ku kubha yandikirwi, ‘Mungu araswaja bhamaraika bhaazi iguru waazu, ebho bharakugwatirira, korereke amaguru gaazu gataaza kwitema kwibhwi.’§”

7 Nawe Yisu akamubhaurira, “Yandikirwi, ‘Utagama Umukuru Mungu waazu.’*”

8 Akumara, Shitaani akamuhira kosonga yi ikiguru ikirihu. Akamwerecha ubhuti bhwa zisi zuzi nu ubhuniibhi bhwazu,

9 akamubhaurira, “Uraanbigamiri na konsengera, nirakoha bhyuzi bhina.”

10 Nawe Yisu akamubhaurira, “Nuurwi hanu, Shitaani! Yandikirwi, ‘Osengere Umukuru Mungu waazu, na omohokerye ewe umwene.’†”

11 Neho Shitaani akamutiga hayo. Hayohayo bhamaraika bhakaaza kumwangerira.

Yisu aratanga emeremo jazi

(Maaroko 1:14-15; Ruuka 4:14-15)

12 Hanu Yisu iigwiri kubha Yoohana Umubhatiizi abhahirwi mokebhoho, akaja mucharu cha Gariraaya.

13 Gariraaya iyo, akasaama Nazariiti, akaja kwikara murubhiri rwa Kapirinaumu. Kapirinaumu iri rusizu wi inyanza ya Gariraaya, urubhaara rwi ibhigamba bhya Zabhuruni na Naafutaari.

§ 4:6 Rora Zabhuri 91:11-12. * 4:7 Rora Amahiityu gi Imigiru 6:16. † 4:10 Rora Amahiityu gi Imigiru 6:13.

¹⁴ Ikabhabhu, korereke ribhi ring'ana rinu Mungu aagambiri kuhitira kwu umuruatiriri Isaaya,

¹⁵ “Mwitegeerere abhaatu bhi icharu cha Zab-huruni na Naafutaari,

ahagero hanu hari kanzira yu ukwerekera kunyanza,

ni imwambuku wi ikitaaru cha Yorodaani, mucharu cha Gariraaya inu bhakwikara abhaatu bhi ibhyaru ibhindi.

¹⁶ Abhaatu bhayo bhiikiiri mukiirimya,

bharuzi ubhwiru ubhukuru, na bhanu bhi ikiiri mukikiriiri chu uruku, bhahwarukiirwi nu ubhwiru.”[‡]

¹⁷ Kwima ribhaga riyo, Yisu akatanga kur-wazira abhaatu, “Mutigi ubhubhi bhwanyu, ku kubha ubhatimi bhwa mwisaaru bhuraariiri!”

*Yisu ararobhora abhiga bhaazi
(Maaroko 1:16-20; Ruuka 5:1-11)*

¹⁸ Hanu Yisu aari aragenda rusizu wi inyanza ya Gariraaya, akarora abhahiiri bhabhiri, Simuni wunu aabhirikiirwi Peetero na Andureya. Bhaari bhararekera zenzero munyanza ku kubha bhaari abhawisini.

¹⁹ Yisu akabhabhurira, “Muntuni na niinyi nirabhakora kubha abhawisini bha abhaatu.”

²⁰ Rogendo rumwi, bhakatiga zenzero zaabhu, bhakamutuna.

²¹ Hanu iisukiri embere hasuuu, akarora abhaatu abhandi bhabhiri, Yaakobho na Yoohana umunyi waazi, abhaana bha Zebhedaayo. Bhaari mubhwatu hamwimwi na wiisi, bharazomya zen-zero zaabhu, akabhabhirikira.

[‡] **4:16** Rora Isaaya 9:1-2.

22 Hayohayo bhakatiga wiisi nu ubhwatũ, bhakamutuna.

*Yĩsu ariija abhaatũ na kohorya abharwiri
(Ruuka 6:17-19)*

23 Yĩsu aari ariiruguura mucharũ chusi cha Gariraaya. Aari arasikira mũmarwazirũ§ na kwija abhaatũ. Aari ararwazira abhaatũ Ing'ana Inzũmu igurũ wũ ubhutimi bhwa mwisaarũ na kohorya amarwiri gaabhũ gũusi.

24 Ing'ana igurũ wa Yĩsu ikanyaragana bhukung'u kuhika mucharũ chusi cha Siiriya. Abhaatũ bhakahira abharwiri bhaabhũ bhũusi bha amarwiri ga zeteemwa zũzũusi bhaari bharanyaakibhwa. Gati waabhũ, bhaarĩmu bha amasambwa amabhi, bha rirĩmu na bhanũ bhakuuri ibhiĩmũ, akabhahorya bhũusi.

25 Mmbe, abhaatũ bhaaru bhakabha bharamutuna kurwa Gariraaya, Dikapũuri, Yirusariĩmu, Yudeya ni imwambukũ wi ikitaarũ cha Yorodaani.

Amiija ga Yĩsu kukigurũ

5

(5:1-7:29)

*Amiija ga Yĩsu igurũ wũ urubhangũ ni inyaakũ
(Ruuka 6:20-23)*

1 Mmbe, hanũ Yĩsu aarũzi amaribhita ga abhaatũ, akatiira kukigurũ, akiikara, abhiiga bhaazi bhakaja kwawe.

2 Neho akatanga kubhiija,

§ 4:23 **Amarwazirũ.** Kũmaragirira bhukung'u, rora ring'ana rirwazirũ muKiniibhasa.

3 “Hakiriku bhanu bhiiyizi kubha bhanu ubhwindi
na Mungu,

ku kubha ubhutimi bhwa mwisaaru ubhwabh.

4 Hakiriku bhanu bharumikiri,
ku kubha Mungu arabhiibhisirirya.

5 Hakiriku abhanyuhu,
ku kubha bharagabha isi yusi.*

6 Hakiriku bhi inzara ne enyoota yo okokora ge
eheene,†

ku kubha Mungu arabhiigutya.

7 Hakiriku bhi ibhigangi,
ku kubha ebho bhararorerwa ibhigangi.

8 Hakiriku bhu umwayu umwira,
ku kubha bhararora Mungu.

9 Hakiriku abhiigwan'ya bha abhaatu,
ku kubha bharabhirikirwa abhaana bha Mungu.

10 Hakiriku bhanu bhakunyaakibhwa iguru we
eheene,

ku kubha ubhutimi bhwa mwisaaru nu-bhwabh.

11 “Hakiriku imwi hanu abhaatu bhakubhatuka,
bhakubhanyaacha na kubhasaayira ubhubhi
bhwa zeteemwa zusi iguru waani.

12 Muhiiti kubha ibhu nambu abhaatu bhaari
bhakunyaacha abharutiriri bhanu bhaareho
ikari. Mozomerwe na kuriiryata bhakung'u, ku
kubha Mungu abhatiriri umubhanu mukuru
mwisaaru.

*Abhahimba bha Yisu bhaangi umuny nu
ubhwira*

(Maaroko 9:50; Ruuka 14:34-35)

* 5:5 Rora Zabhuri 37:11. † 5:6 **Okokora ge eheene**, ubhagaruri
ubhundi bharatara kubha, bhanu bhani inzara ne enyoota yo okorora
eheene ya Mungu.

13 “Imwi ni-muunyũ kũsi. Nawe guriibhuryi ubhusambaruku bhwagwi, guratuurirwa kiguruki korereke gozome naatu? Gutakwenderwa kurunga kegero chũchũsi, kũgayo gurataashwa igũtũ na kutazwa na abhaatũ.

14 “Imwi ni-bhwirũ kũsi. Urubhiri runũ rwambakirwi kũkigurũ, rutakutura kubhisa ubhwirũ bhwaku.

15 Naatu, abhaatũ bhatakwacha ikimuri bhakikundikiryi na rihũũzũ. Nawe bhahaakitũũra igurũ wi ikikũgũ, korereke kimuriki bhũũsi bhanũ bhari munyumba.

16 Ibhuibhu, ubhwirũ bhwanyu bhoreenderwa bhũmuriki kubhaatũ, korereke bharore amahocha gaanyu amazũmu, bhagũngi Wuusũ wa mwisaarũ.

Amiija igurũ wi imigirũ ja Musa

17 “Mutakina kubha niiziri kuruushaho imigirũ ja Musa,† hamwi ganũ gaagambirwi na abharũũtiriri. Nitiiziri kuruushaho, nawe kokora na kuhicha amaheene gaaku.

18 Nirabhabhũũrira amaheene, kuhika hanũ risaarũ ni icharũ bhikurweho, katareeho kang’ana hamwi kaandikũ kasuuhu ki imigirũ kanũ kakuruusibhwaho kuhika gũũsi gahiki.

19 Umuũtu wũwũũsi wũnũ araangi nũũrũ umugirũ gũmwĩ umusuuhu kũkira igindi, na kwija abhandi bhakorebhu, wuyo atakubha na bhwera mubhũtĩmi bhwa mwisaarũ. Nawe wũwũũsi wũnũ akugigwata na kwija abhandi bhakorebhu, wuyo arabha umũkũrũ mubhũtĩmi bhwa mwisaarũ.

20 Mmbe, nirabhabhũũrira, ariibhi eheene yaanyu itakũkira ya Abhafarisayo na ya abhiija

† 5:17 **Musa.** Kũmaragirira bhũkũng’ũ, rora Ikiniibhasa.

bhi imigirũ ja Musa, mutakusikira zee mabhutimi bhwa mwisaarũ.

Amiija igũrũ wũ abharũrũ
(Ruuka 12:57-59)

²¹ “Mwigwiri umugirũ, chimbu abhaatũ bhi ikari bhaabhuuriirwi, ‘Utiita!§ Umũũtu wũwũsi wũũ akwita umũkindichazi, areenderwa atinirwi.’

²² Nawe inyĩ nĩrabhabhũũrĩra, umũũtu wũwũsi wũũ akwigatanĩra umũkindichazi, areenderwa kutinirwa. Wũwũsi wũũ akũtũka umũkindichazi na komorega, areenderwa atinirwi ni ichandarũ. Na wũwũsi wũũ akubhũũrĩra umũkindichazi mo-geege, areenderwa korekerwa momorero gwa nyaari!*

²³ “Mmbe, Ƴraahuruchi ikimweso† ahagero hu ukuhurukĩrya ikimweso, akũmara Ƴkahiita kũbha Ƴtaamĩn’yi nũ umũkindichazũ,

²⁴ tĩga ikimweso chazũ mabhutangi bhwa ahagero hu ukuhurukĩrya ikimweso, nuuji hĩnga wiigwani nawe. Neho Ƴgarũki uhuruchi ikimweso chazũ.

²⁵ “Na ariĩbhi umũkũgambi arakuhira kumutĩniri, wiigwani nawe bhwangũ mũkĩrĩ mĩnzĩra. Irĩtamĩbhu, arakuhicha kumutĩniri. Nu umutĩniri wuyo arakuhira kumusirikari, korereke akusikĩryi mokebhoho.

²⁶ Nĩrakubhũũrĩra amaheene, Ƴtakurwa muyo kuhika hanũ Ƴkũmara kũrĩha isiĩri yũsi!

Amiija igũrũ wũ abhũsibhĩti

§ 5:21 Rora Kũhũrũka 20:13.
bhũkũng’u, rora Ikiniibhasa.

* 5:22 **Nyaari.** Kũmaragĩrĩra
† 5:23 **Ikimweso.** Kũmaragĩrĩra

bhũkũng’u, rora Ikiniibhasa.

27 “Mwigwiri umugira gũũ gwagambirwi kubha, ‘Utasebheeta!’‡

28 Nawe inyi nirabhabhũũrira, umusubhi wũũ akorora umakari kwa kumwigomba, amariri kosebheeta nawe mumwũyũ gwazi.

29 Mmbe, ariĩbhi iriisũ ryazũ ryu ubhuryũ riragirya okore ubhubhi, ryihĩ uritaashi kore. Ni-hakiriku usikiri mũbhũhũru bhwa kemerano na riisũ rimwi, kũkĩra kubha ni ibhiimũ bhyũsi na ukataashwa momorero gwa nyaari.

30 No okobhoko kwazũ ku ubhuryũ kũragirya okore ubhubhi, ukutini ukũtaashi kore. Ni-hakiriku usikiri mũbhũhũru bhwa kemerano no okobhoko kũmwi, kũkĩra kubha na amabhoko abhiri na ukarekerwa momorero gwa nyaari.

*Amiija igũũ wũ ukũtaana nũ umakari
(Mataayo 19:9; Maaroko 10:11-12; Ruuka 16:18)*

31 “Na mwigwiri umugira gũũ gwagambirwi kubha, ‘Umũũtũ wũũ akũtaana na mũkaazi, amohe inyarubha yũ ukũtaana.’§

32 Nawe inyi nirabhabhũũrira, umũũtũ wũũ akutiga mũkaazi, itari igũũ wi itaarũ, arakora umakari waazi kubha musimbi. Na wũwũũsi wũũ arakwiri umakari wũũ atigirwi, wũũsi ni-mũsibhiiti.

Amiija igũũ wũ ukwĩrahĩra

33 “Mwigwiri umugira, chĩmbu abhaatũ bhi ikari bhaabhuuriirwi, ‘Mutiirahira urũrimĩ, nawe mokorere Umũkarũ gũũsi ganũ mwĩrahiiri.’*

‡ 5:27 Rora Kũhũrũka 20:14. § 5:31 Rora Amahiityũ gi Imigirũ 24:1. * 5:33 Rora Abharaawi 19:12; Ukũbhara 30:2; Amahiityũ gi Imigirũ 23:21.

34 Nawe inyi nirabhabhaurira, mutagema kwirahira! Mutiirahira nauru kwa risaaru, ku kubha necho ikitumbi chi ikitimi cha Mungu.

35 Hamwi mutiirahira kuusi yinu, ku kubha neho hu ukutura amaguru gaazi. Mutiirahira nauru karubhiri rwa Yirusarimu, ku kubha nerwe urubhiri rwu Umutimi umukuru, Mungu.

36 Naabha mutiirahira kumitwi janyu, ku kubha mutakutara kuchara nauru uruzwiri rumwi rubhi rwiru hamwi rwirabhuru.

37 Ariibhi muriisirya 'Hee,' ibhi amaheene-heene, ariibhi muraanga 'Ziyi,' ibhi maheene ziyi. Amang'ana agandi ganu mukwongera, gararwa kamubhi, Shitaani.

*Amiija iguru wu ukurihan'ya isiiri
(Ruuka 6:29-30)*

38 "Mwigwiri umugiru ganu gwagambirwi kubha, 'Iriisu kwi iriisu, ni iriinu kwi iriinu.'†

39 Nawe inyi nirabhabhaurira, mutarihan'ya amabhi umautu wanu abhakuriri amabhi. Nawe umautu areekoteme kurusa rwu ubhuryu, muchuriri nu urundi.

40 Nu umautu ariikugambi korereke agege ishadi yaazu, mutigiri ni ikabhuuti.‡

41 Ariibhi umautu ariikuhatiki kogega umurigu gwazi kuhika kogenda matambuka kikwi kimwi, awi nuuji nawe matambuka bhikwi bhibhiri.

42 Umutu araakusabhi ekegero, mohe. Nu umautu ariisabhi omokopeshe, utamwima.

† 5:38 Rora Kukuruka 21:24; Abharaawi 24:20; Amahiityu gi Imigiru 19:21. ‡ 5:40 Rora Kukuruka 22:26-27; Amahiityu gi Imigiru 24:12-13.

Amiija iguru wu ukusiga abhabhisa
(Ruuka 6:27-28, 32-36)

⁴³ “Mwigwiri yagambirwi kubha, ‘Umusiigi nyarubhiri waazu,§ na ubhihirirwi umubhisa waazu.’

⁴⁴ Nawe inyi nirabhabhurira, mubhasiigi abhabhisa bhaanyu, na mubhi murasabhira bhanu bhakubhanyaacha.

⁴⁵ Mmbe, mokorebhu, korereke mubhi ncha Wuusu wa mwisaaru. Ewe ahaabhanzira iryubha abhaatu abhazumu na abhabhi. Na ahaatwekerya imbura abhaatu bhe eheene na bhanu bhataana eheene.

⁴⁶ Nangu muraasiigi bhanu bhabhasiigiri abheene, murabhona bhweraki? Nuru abhabhi ncha abharihya bha riguti* bhusi bhahaakorabhu.

⁴⁷ Na aribhi murakeerya abhakindichanyu abheene, murabha murakora ing’anaki rinu rikukira abhandi? Nuru abhaatu bhanu bhatiizi Mungu, bhusi bhahaabhakeerya abhakindichabhu.

⁴⁸ Mmbe, mubhi bharonge, chimbu Wuusu wa mwisaaru ari.

6

Amiija iguru wu ukusakirya abhabhbi

¹ “Mwangeriri! Mutakora amahocha amazumu korereke abhaatu bhabharore. Nawe muraakorebhu, mutakusung’aana umubhanu gwugwusi kurwa kwa Wuusu wa mwisaaru.

§ 5:43 Rora Abharaawi 19:18. * 5:46 **Abharihya bha riguti.**
Kamaragirira bhukung’u, rora Ikiniibhasa.

2 “Mmbe, hanu ukusakirya umuhabhi, utaraarika kinu okokora. Utakora chimbu abhabhihi bhahaakora mumarwaziru na kunzira korereke abhaatu bhabhagungi.

3 Nirabhabhurira amaheene, ebho bhamariri kusung’aana umubhanu gwabhu. Nawe hanu ukusakirya umutu, okobhoko kwazu kwu ubhumi kutamenya ganu okobhoko ku ubhuryu kokokora,

4 korereke ubhusakirya bhwez bhabhi bhwa mbisi. Oreekorebhu, Wuusu wunu ahaarora ganu giibhisiri, arakusamba.

*Amiija iguru wu ukusabha Mungu
(Ruuka 11:2-4)*

5 “Na hanu mukusabha, mutabha ncha abhabhihi. Ebho bhahaasiga kusabha bhiimiiriiri mumarwaziru na rusizu wi inzira korereke abhaatu bhabharore. Nirabhabhurira amaheene, bhamariri kusung’aana umubhanu gwabhu gwusi.

6 Nawe awi hanu ukusabha, usikiri igati na wigari ikisiku. Akumara usabhi kwa Wuusu wunu atakororekana. Na Wuusu wunu ahaarora ganu giibhisiri, arakutuha.

7 “Hanu mukusabha, mutabha muraparukaparuka ncha abhaatu bhanu bhatiizi Mungu. Ebho bhahiiseega kubha bhariigwa iguru wa amang’ana amaru.

8 Mutatuubhana na bhayo, ku kubha Wuusu aminyiri ganu mukwenda, nuru mukiri kumusabha.

9 Mmbe imwi musabhibhu:
‘Bhaabha witu wunu uri mwisaaru,
iriina ryazu rikumibhwi.
Ubhatimi bhwez bhuuzi.

10 Ubhw^uindi bh^uwaz^u bhokorwe m^uusi han^u,
chimbu mwisaar^u iyo.

11 Otohe reero ibhyakurya bhy^utu bhy^u kirakabhu.

12 Otobheerere ubh^uabhi bh^uwi^u,
chimbu na niitwi tukubhabheerera bhan^u
bhat^usaririiryi.

13 Utatusikiry^u mubhitiimotiimo,
nawe ut^usabh^uari n^u um^uabhi wurya,
[k^u kubha ubh^uutimi, na zinguru, nu ubhukumib-
hwa, ni-bhyaz^u kemerano.

Garami!]"

14 Y^uisu akang'eha k^ugamba, "Ari^ubhi
m^urabheerera abhaat^u ubh^uabhi bh^uwabh^u, imw^uusi
Wu^us^u wa mwisaar^u arabhabheerera.

15 Nawe m^uraatami kobheerera abhaat^u am-
abhi gaabh^u, na niimwi Wu^us^u wa mwisaar^u
atakubhabheerera amabhi gaanyu.

Amiija ig^ur^u wu ukwiyima kurya

16 "Han^u mukwiyima kurya, ubhush^u bh^uwanyu
bhoteerekan'ya kurumika chimbu abhabhihi
bhahaakora. Ebho bhahaakikinyara ubhush^u
bh^uwabh^u korereke abhaat^u bharore kubha
bhiiyimir^u kurya. Nirabhabh^uurira amaheene,
bhamariri kusung'aana um^uabhan^u gwabh^u.

17 Nawe awi han^u ukwiyima ukurya, wiisaabhi
ubhush^u na wisisityi amaguta mumutwi,

18 korereke abhaat^u bhatamenya kubha wi-
imiri kurya. Wu^us^u w^un^u atakororekana, w^un^u
ahaarora gan^u giibhisiri, arak^usamba.

Amiija ig^ur^u wu ubhuniibhi

(Ruuka 12:33-34, 11:34-36, 16:13)

19 “Mutiibhũkĩra ikibhumbikũ mũũsi, hanũ amasĩribhi ni ikutu bhĩhaasarya, na abhiibhi bharaasha zinyumba korereke bhiibhi.

20 Nawe mwibhũkĩri ikibhumbikũ mwisaarũ, inũ amasĩribhi ni ikutu bhĩtakũsarya na hanũ abhiibhi bhatakwasha nũũrũ kwibha.

21 Hũhũũsi hanũ ikibhumbikũ chazũ kĩri, neho ne ekoro yaazũ iri.

22 “Amĩsũ nego ikimũri chũ umubhiri. Ariibhi mahũru, umubhiri gwazũ gwũsi garabha nu ubhwĩrũ.

23 Nawe ariibhi amĩsũ gaazũ marwĩri, umubhiri gwazũ gwũsi garabha kiirimya. Mmbe, ubhwĩrũ bhũnũ bhũri mũmubhiri bhuriichũri kubha ikiirimya, kirabha kiirimya kĩaari bhũkũng’u!

24 “Atareeho umũũtũ wũnũ akũtura kohokerya abhakũrũ bhabhiri, kũ kubha aratũra kubhihirirwa uwũmwĩ na kũsiiga uwũndi, hamwi kugwatana nũ uwũmwĩ na korega uwũndi. Na niimwi, mutakũtura kohokerya Mungu ne ebhegero hamwĩmwi!

*Amiija igũrũ wũ ukũnyaaka
(Ruuka 12:22-31)*

25 “Mmbe nĩrabhabhũũrĩra, mutanyaakĩra ubhwĩkari bhwanyu kubha mũraryakĩ, hamwi mũranywakĩ, hamwi muriibhohakĩ. Awĩĩ, ubhwĩkari bhũtakũkĩra ibhyakurya, nũ umubhiri gũtakũkĩra zengebho?

26 Morore ibhinyunyi. Bhĩtakũhamba na bhĩtakogesa na kubhiika mukĩtara. Nawe, Wuusũ wa mwisaarũ, ahaabhiriisha. Awĩĩ, imwi mũtaana ubhwera bhũkũrũ kũkĩra ibhinyunyi bhiyo?

27 Wiiwi gati waanyu aratura kwi Yongera nuru
isa yimwi mubhwikari bhwazi kukwinyaacha
kwazi?

28 “Kwaki muriinyaacha iguru wa zengebho?
Morore chimbu ibhibharyu bhekomera.
Bhitakokora meremo nuru bhitakutuma.

29 Nawe nirabhabhurira, nuru umutimi
Sirimaani nu ubhuniibhi bhwazi bhwasi,
atiibhuri bhwaheene nchi ibhibharyu bhiyo!

30 Ariibhi Mungu ariibhohya bhwaheenebhu
ibhibharyu bhya mwitirigu bhina reero bhereho
na tabhuri bhirataashwa momorero, nangu
aratamabhwi kubhiibhohya imwi, abhaatu bhu
ubhwisirirya ubhusuuhu?

31 “Mmbe matabha na makibhwi muriibhuurya,
‘Turaryaki? Turanywaki?’ hamwi ‘Turiibhohaki?’

32 Amang’ana gayo guusi, bharaganyaakira ab-
haatu bhanu bhatiizi Mungu. Wuusu wa mwisaaru
izi kubha moreenda guusi gayo.

33 Nawe momohye hinga ubhutimi bhwa Mungu
na kokora amang’ana ge eheene, na agandi gayo
guusi arabhoongereererya.

34 Mmbe, mutiinyaacha iguru wa tabhuri, ku
kubha tabhuri iriinyaakira iyeene. Zinyaaku za
reero ziriisa kwa reero.

7

*Amiija iguru wu ukutinira abhandi
(Maaroko 4:24; Ruuka 6:37-38, 41-42)*

1 “Mutatinira abhandi, korereke mtaaza ku-
tinirwa na Mungu.

2 Chimbu mukutinira abhandi, nimbu imwusi muraatinirwi. Ne ekerengo kinu mokorengera abhandi, necho muraarengerwe.

3 “Ndora urarora ekebhereera kinu kiri muriisu ryu umukindichazu, nawe utakorora ikitinika kinu kiri muriisu ryazu?

4 Kisha uraturabhwirira umukindichazu, ‘Tiga nikuruushi ekebhereera muriisu ryazu,’ nawe utakorora ikitinika muriisu ryazu?

5 Umubhishi awi! Ruusha hinga ikitinika muriisu ryazu. Neho ukutara korora bhwaheene na kuruusha ekebhereera muriisu ryu umukindichazu.

6 “Mutaha zimbwa ebhegero ibhirindu, korereke zitaaza kwichura zibhanyamari. Na matataashirya zingurubhi ebhegero bhyu ubhwera, zitaaza kubhitazataza.

*Amiija iguru wu ukwisasaama Mungu
(Ruuka 11:9-13)*

7 “Musabhi Mungu, na niimwi muraahabha. Momohye, na niimwi marabhona. Muhuni ikisika, na niimwi muriigurirwa.

8 Wuwusi wunu akusabha, arahaabha. Wunu akomohya, arabhona, na wunu akuhuna ikisika, ariigurirwa.

9 “Nangu, wiwi gati waanyu, wunu umwana waazi araasabhi umukaati, aramoha riibhwiri?

10 Hamwi araasabhi iiswi, aramoha enzoka?

11 Ariibhi imwi abhabhi, mwizi kubhaha abhaana bhaanyu ebhegero ibhizamu. Wuusu wa mwisaaru atakutara kubhaha amazamu ukiraho, bhanu bhakumusabha?

¹² “Mmbe, mokorere abhandi ganu mukwenda mokorerwe. Yiyo neyo enzobhooro yi imigira ja Musa na amiija ga abharutiriri.

*Kusikira mubhuti bhwa Mungu
(Ruuka 13:24)*

¹³ “Musikiri kuhitira ikisiku ikiguti. Ikishoko ikigari ni inzira ingari bhiyo bhirahira umutu kurichwa. Abhaatu bhanu bhakuhitira iyo, ni-bhaaru.

¹⁴ Nawe ikishoko kinu kikwerekera kubhuhuru, ni-kiguti, ni inzira yu ukwerekera iyo, ni-nguti. Na bhanu bhakoyerora, ni-bhasuuhu.

*Kwobhoora abharutiriri bhu ururimi
(Ruuka 6:43-44)*

¹⁵ “Mwiyangariri na abharutiriri bhu ururimi. Hanu bhakubhaazaku, bhararorekana ncha zing’andu, nawe ni-bhahaari ncha zisuuzi.

¹⁶ Murabhamenya kumisumu jabhu. Awii abhaatu bhahaatwa zizabhiibhu kamiti ja amahwa, hamwi imisumu ju umutiini komesonkoma?

¹⁷ Umuti umuzumu gwahiibhura imisumu imizumu, nawe umuti umabhi guhiibhura imisumu imibhi.

¹⁸ Umuti umuzumu gutakutara kwibhura imisumu imibhi, na umuti umabhi gutakutara kwibhura imisumu imizumu.

¹⁹ Imiti jasi ginu gitakwibhura imisumu imizumu, gihaatinwa na kutaashwa momorero.

²⁰ Ihuiibhu na abharutiriri bhu ururimi, murabhamenya kamahocha gaabhu.

*Abhahimba bhe eheene na bhu ururimi
(Ruuka 13:25-27)*

21 “Itari bhaatu bhũsi bhanu bhakũmbũrira, ‘Umũkũru, Umũkũru,’ bharasikira mũbhũtimi bhwa mwisaaru. Nawe ni-bhanu bhakokora ubhwindi bhwa Bhaabha waani wa mwisaaru.

22 Urusiku rwi itiniru ruraahiki, bhaaru bharaaza kũmbũrira, ‘Umũkũru, Umũkũru! Tukarootorera kuriina ryazu, tukaheebha amasambwa kuriina ryazu, na tukakora ibhisigu bhyaru kuriina ryazu.’

23 Neho niraabhabhũriri, ‘Nitabhiizi nũru ha-suuhu! Mundwiri hanu, imwi abhakari bhu abhũbhi!’

*Ekerenjo cha abhũmbaki bhabhiri
(Ruuka 6:47-49)*

24 “Mmbe, umũtu wũwũsi wũu akwigwa amang’ana gaani na kũgakora, aangĩ umũtu wa amang’ũni wũu umbakiri inyumba yaazi kwitari.

25 Rusiku rumwi, imbura ikatweka, amanzi gakarembeera igũru, nu umũkama umũhaari gũkahuuta na kusukuma inyumba yaazi. Nawe itaagwiri, ku kubha ubhũrusa bhwaku bhũkũmbakwa kwitari.

26 Nawe wũwũsi wũu akwigwa amang’ana gaani na atigi kũgakora, wuyo aangĩ umũtu omogege wũu umbakiri inyumba yaazi komose-kenya.

27 Hanu imbura yatwikiri, amanzi gakarembeera igũru, nu umũkama umũhaari gũkahuuta na kusukuma inyumba yiyo, ikahingũka, ikarika.”

28 Hanu Yũsu aamariri kũgamba amang’ana gayo, riribhita rya abhaatu rikarũgũra bhũkũng’u igũru wa amĩija gaazi.

²⁹ Abhaatu bhakarugura ku kubha amiija gaazi gataari ncha garya abhiija bhaabhu bhi imigiru ja Musa bhahiija, nawe akiija ncha umuntu wu ubhunaja.

8

*Yisu arahorya umuntu we ebhegege
(Maaroko 1:40-45; Ruuka 5:12-16)*

¹ Hanu Yisu iikiri kurwa kukiguru, amaribhita amakuru ga abhaatu gakamutuna.

² Akaaza umuntu wumwi we ebhegege akahigama mubhutangi bhwazi, arabhuga, “Umukuru, uraasiigi, uratura kumbingukya!”

³ Yisu akagorora okobhoko kwazi, akamukun’yaku, arabhuga, “Nisiigiri. Bhingukibhwa!” Hayohayo, akahora ebhegege bhyazi.

⁴ Akumara, Yisu akamubhurira, “Yangarira, utabhurira umuntu iguru wa rinu nikuriri. Nawe wiiyeereken’ye kwa kuhaani, uhuruchi ikimweso chimbu Musa aaswajiryi, kwerecha abhaatu kubha ubhingukiibhwi.”*

*Ubhwisirirya bhwu umukuru wa abhasirikari
(Ruuka 7:1-10)*

⁵ Hanu Yisu aari arasikira murubhiri rwa Kapirinaumu, umukuru wumwi wa abhasirikari bhi Ikiruumi akaaza kwawe kumusabha amusakiryi.

* **8:4** Kuring’aana ni imigiru ja Musa, **kuhaani** newe aari aramenyeekererya kubha umuntu abhingukiriibhwi ebhegege. Rora Abharaawi 14:1-32; Amahiitya gi Imigiru 24:8.

⁶ Akamubhurrira, “Umukuru, omohocha waani ari yika murwiri, akuuri ibhiimu, ariiyigwa kibhi bhukung’u.”

⁷ Yisu akamugarukirya, “Niraaza komohorya.”

⁸ Umukuru wa abhasirikari wuyo akabhuga, “Umukuru, itakwenderwa usikiri iwaani. Nawe gamba ing’ana rimwibhu, omohocha waani arahora.

⁹ Inyi niri iyaasi wu ubhunaja bhwa abhandi, na nina abhasirikari bhanu bhari iyaasi waani. Niraabhurriri wumwi, ‘Nuuji,’ ahaaja. Niraabhurriri uwundi, ‘Nauzi,’ ahaaza. Na niraabhurriri mbusa waani, ‘Kora omoremo gunu,’ ahaakora.”

¹⁰ Hanu Yisu iigwiri amang’ana gayo, akarugura bhukung’u. Akabhabhurrira bhanu bhaari bharamutuna, “Nirabhabhurrira amaheene, nuru gati wa Abhiizirairi bhusi, nikiri korora umutu wubusi wu ubhwisirirya ubhukuru ncha bhunu!

¹¹ Nirabhabhurrira, abhaatu bhaaru bharaaza kurwa mbaara zusi zi isi. Bharaaza kurya inyangi hamwimwi na bhasukuru bhitu Abhuraamu, Iisaka na Yaakobho mubhutimi bhwa mwisaaru.

¹² Nawe abhagabhi bhanu bhindirwi kubha mubhutimi bhuyo, bhararekerwa igutu mukiir- imya, iyo bhararira na kokepeha.”

¹³ Mmbe, Yisu akabhurrira umukuru wuyo, “Nuuji yika. Irabha chimbu wiisiriiryi.” Hayohayo omohocha waazi akahora.

*Yisu arahorya abharwiri bhaaru
(Maaroko 1:29-34; Ruuka 4:38-41)*

14 Akumara Yisu akahika wa Peetero. Hanu aasikiiri munyumba, akabhona uninabhyara Peetero ahindiiri kubhuriri, ane ehooma haari.

15 Yisu akamukun'yaku kokobhoko, hayohayo akahora. Akabhuka, akatanga komohokerya ibhyakurya.

16 Hanu ryahikiri rigoroobha, Yisu akareeterwa abhaatu bhaaru bha amasambwa. Akaruusha amasambwa gayo kwa kugamba, na akahorya abharwiri bhushi.

17 Neho rikabha ring'ana rinu ryagambirwi iguru waazi nu amurutiriri Isaaya, "Akagega ubhanyuhiriru bhwitu umwene, na akagega amarwiri gitu."†

*Ubukung'u bhu ukutuna Yisu
(Ruuka 9:57-62)*

18 Hanu Yisu aaruzi abhaatu bhaaru bhamwinaariri, akaswaja abhiga bhaazi, bhaambuki inyanza bhaji imwambuku.

19 Umwija wamwi wi imigiru ja Musa akamujaku, akamubhurira, "Umwija, hahushi hanu uraaji, nirakutuna."

20 Yisu akamugarukirya, "Bhanyamubhwi bhaana amabhigi ni ibhinyunyi bhini ibhinyumba. Nawe, Umwana wu Umuntu,‡ ataana nuru hu ukutura urubharu rwazi."

21 Nu umwiga wundi akamubhurira, "Umukuru, nyisiririrya hinga niji kubhika bhaabha."

† 8:17 Rora Isaaya 53:4. ‡ 8:20 Umwana wu Umuntu ni-riina irindi rya Yisu, ariigambira umwene. Kamaragirira bhukung'u, rora Ikiniibhasa.

22 Nawe Yisu akamubhurrira, “Ntuna, tiga abhaku bha zekoro bhabhiki abhaku abhakindichabha.”

Yisu aratureerya umukama

(Maaroko 4:35-41; Ruuka 8:22-25)

23 Neho Yisu akatiira mubhwatũ hamwimwi na abhiga bhaazi, bhakabhuka.

24 Hanũ bhaahikiri gatigati wi inyanza, kitukirũ kukabha nũ umukama umuhaari bhukung’u na amakunda gakatanga kukundikiryũ ubhwatũ. Yisu zaari zimuhiriri.

25 Abhiga bhaazi bhakamubhuucha, bhakarigisa bharabhuga, “Umukurũ, tũsabhuri! Tũrarika!”

26 Yisu akabhabhurrira, “Kwaki murũbhaha, imwi bhu ubhwisiriryũ ubhusuuhu?” Neho akiimirira, akahama umukama na amakunda, kukabha bhwaheene.

27 Abhiga bhaazi bhakarũgũra, bhakabhuga, “Umũtũ wũnũ ni-wa teemwaki? Nũrũ umukama na amakunda bhiramwigwa!”

Yisu arahorya amasambwa kuBhagadara bhabhiri

(Maaroko 5:1-20; Ruuka 8:26-39)

28 Hanũ Yisu aambukiri inyanza, akahika mucharũ cha Abhagadara. Akarumana na abhaatũ bhabhiri bha amasambwa, bhararwa mũmabhigi ganũ gaari zimbihira. ŠAbhaatũ bhayo bhaari bhahaari bhukung’u na atareeho umũtũ wũnũ aagimiri kuhita kũnzira yiyo.

Š 8:28 Abhayaahudi bhaari bharabhika abhaku mũmabhigi hamwi ganũ gaakirisirwi kwitari ryi ibhigũrũ.

29 Mmbe, amasambwa gakarigisa garabhuga, “Umwana wa Mungu, unaki na niitwi? Nangu, wiiziri kuturicha ribhaga ryitu rikiri kuhika?”

30 Haguh hayo, ryareho rihizu ikuru rya zingurubhi rirariisha.

31 Amasambwa gayo gakiisasaama Yisu, “Ariibhi uratoheebha, utwisiririyi tusikiri mwihiizu rya zingurubhi rirya.”

32 Yisu akagabhurira, “Muji!” Gakabharwiku, gakasikira muzingurubhi. Hayohayo, rihizu ryasi rikahiringita mwega ikihiringitu ikihaari, rikagwa manyanza, rikarika.

33 Hanu abhariisha bha zingurubhi bhaaruuzi gayo, bhakaryarira murubhiri, bhakabhurira abhaatu guusi ganu gakuriibhwi na kinu chabhiri kubhanu bhaari na amasambwa.

34 Abhaatu bhuusi bha murubhiri muyo, bhakaryara kuja korora Yisu. Hanu bhaamuruuzi, bhakamwabha arwi mucharu chabhu.

9

*Yisu arahorya umuntu wenu akuuri ibhiimu
(Maaroko 2:1-12; Ruuka 5:17-26)*

1 Yisu akatiira mubhwatu, akaambuka inyanza ya Gariraaya, akagaruka Kapirinaumu, murubhiri ranu iikiri.

2 Hanu aahikiri, abhaatu abhandi bhakamoreeta umuntu akuuri ibhiimu, ahindiiri kukiragu. Hanu Yisu aaruuzi ubhwisirirya bhwabhu, akabhurira umurwiri, “Thaana umwayu, mwana waani! Ububhi bhwazu bhubhirirwi.”

3 Neho abhiija abhandi bhi imigira ja Musa, bhakiigambira mummyu jabhu, “Umuntu wanu ararega Mungu!”

4 Nawe Yisu akamenya ganu bhaari bhakwiseega, akabhuga, “Kwaki muriiseega amabhi mummyu janyu?”

5 Rinyuhu ni-ryahe, ukubhuga, ‘Ubhubhi bh-wazu bhubhirirwi,’ kisha ukubhuga, ‘Imirira, ogende?’

6 Nereenda momenye kubha, Umwana wu Umuntu ahirwi ubhunaja bhwo okobheerera ubhubhi kusi.” Neho akabhurira umuntu wanu akuuri ibhiimu, “Imirira! Gega ikiragu chazu, uji yika.”

7 Hayohayo umuntu wuyo akiimirira, akaja yika.

8 Hanu abhaatu bhaaruuzi gayo, bhakarugura na kwabhaha bhakung’u. Bhakagunga Mungu ku kubha akabhaha abhaatu ubhunaja ncha bhuyo.

*Yisu arabhirikira Mataayo amutuni
(Maaroko 2:13-17; Ruuka 5:27-32)*

9 Hanu Yisu aaruuri hayo, manzira akarora umuntu wamwi wanu akubhirikirwa Mataayo, iikiri mwibhuru ryu ukutinira riguti. Yisu akamubhurira, “Ntuna.” Mataayo akiimirira, akamutuna.

10 Yisu akaja kurya ibhyakurya wa Mataayo hamwimwi na abhiga bhaazi. Hanu bhaari kwigari bhararya, bhakasikira abharihya bha riguti bhaaru na abhandi bhu ubhubhi, bhakikara na kurya hamwimwi nabhu.

11 Hanu Abhafarisaayo bhaaruuzi riyo, bhak-abhuurya abhiga bha Yisu, “Ndora, umwija

waanyu ararya hamwimwi na abharihya bha riguti na abhakuri bhu ubhubhi?”

¹² Hanu Yisu iigwiribhu, akabhabhurira, “Abhaatu abhahuru bhatakwenda umugabhu, nawe abharwiri nebho bhakumwenda!”

¹³ Nangu mwigizi enzobhooro ya Amaandiku Amarindu ganu gakubhuga, ‘Nereenda mubhi ni ibhiguzi kukira kuhurucha ikimweso.’* Inyi niti-iziri kubhirikira bhe eheene, nawe bhu ubhubhi.”

Amiija gi ikari na amahya

(Maaroko 2:18-22; Ruuka 5:33-39)

¹⁴ Neho abhiga bha Yoohana Umubhatiizi bhakamujaku Yisu, bhakabhuurya, “Niki itwi na Abhafarisaayo tuhiiyima kurya, nawe abhiga bhaazu bhatakwiyima kurya?”

¹⁵ Yisu akabhagarukirya, “Abhahirikiriri bhu umukwiri, bharatrabhwi kwitiimaata hanu bhakubha hamwimwi nu umukwiri? Nawe urusiku ruraaza umukwiri ararusibhwa gati wa abhagini bhaazi. Hayo neho, bhariiymi kurya.

¹⁶ “Atareeho umutu wanu akogega ikiraka ikihya akitumiri kongebho ikungu. Areekorebhu, ikiraka ikihya kiranyarya engebho yiyo na kwongera hanu hanyariri.

¹⁷ Na atareeho wanu akutura idivaayi† iihya mubhiguzi bha amaseero amakungu. Areeko-rebhu, ibhiguzi bhirabhaaruka, idivaayi iriitika ni ibhiguzi bhasarika. Nawe, abhaatu bhahaatura idivaayi yinu itatunduuriri mubhiguzi ibhihya, ibhiguzi ibhihya ni idivaayi yinu itatunduuriri bhyusi bhirabha bhwaheene.”

* **9:13** Rora Hooseya 6:6.
bhakung’u, rora Ikiniibhasa.

† **9:17** *Idivaayi*. Kamaragirira

*Yisu arahorya umukari na kurya umuucha
(Maaroko 5:21-43; Ruuka 8:40-56)*

18 Hanu Yisu aari achagamba, akaaza umukangati wamwi wi inyumba ya rirwaziru, akahigama mubhutangi bhwazi, akamubhurira, “Umuucha waani akuuri nangwinabhu! Nangabha akuuri, tuji uturi okobhoko kwazu iguru waazi, arahora.”

19 Yisu akabhuka hamwimwi na abhiiga bhaazi, bhakatuna umukangati wuyo.

20 Mmbe, ribhaga riyoriyo umukari wamwi wanu aari akunyaakibhwa nu ubhurwiri bhw ingizi kwi imyaka ikumi ni ibhiri, akaaza inyuma wa Yisu, akakun'yaku ripindu rye engebho yaazi.

21 Akakorabhu, ku kubha akiigambira, “Nirikun'yiku engebho yaazi, nirahora.”

22 Hanu aakuniryikubhu, Yisu akiichura. Akamorora, akamubhurira, “Muucha, ihaana umwayu! Ubhwisirirya bhwazu bhukuhiriryi.” Hayohayo, umukari wuyo akahora.

23 Mmbe, hanu Yisu aahikiri munyumba yu umukangati wa rirwaziru wuyo, akabhona abhaatu bhaaru bhiibhiringiri muruku hayo, inu bhararira bhukung'u na abhandi bharatema ebhereere.

24 Yisu akabhabhurira, “Murwi hanu! Umuucha wanu akiri kukwa, nawe ahindiiri.” Hanu bhiigwiribhu, bhakamoseka.

25 Mmbe hanu abhaatu bhaahurukiibhwi igatu, Yisu akasikira igati, akamugwata okobhoko umuucha wuyo, akiimurira!

26 Amang'ana gayo gakanyaragana mucharu kirya chusi.

Yisu arahorya abhahuku bhabhiri

27 Hanu Yisu aabhuukiri hayo, abhahuku bhabhiri bhakamutuna, bhakabhirikira kwiraka ikuru, “Umukuru, Umwana wu umutimi Daudi,‡ otororere ibhigungi!”

28 Hanu aasikiiri munyumba, abhahuku bhayo bhakamutunamu. Yisu akabhabhuurya, “Muri-isirirya kubha niranaja kubhahorya?”

Bhakamugarukirya, “Hee, Umukuru!”

29 Neho akakun’yaku amisu gaabha, akabhabhurira, “Ibhi kwa niimwi chimbu mwisirirya.”

30 Hayohayo, amisu gakarora. Yisu akakandik-ija kwa amanaga, “Mutabhurira amutu wawusi amang’ana ganu!”

31 Nawe bhakaja, kuraarika amang’ana gaazi mucharu kirya chusi.

Yisu arahorya rimuumu

32 Hanu abhahuku bhayo bhaari bhakurweho, abhandi bhakareetera Yisu amutu wanu aari na risambwa, wanu rimukuriri abhi imuumu.

33 Hanu Yisu aahibhiri risambwa riyo, amutu wuyo akatanga kugamba. Abhaatu bhanu bhaari hayo bhakarugura bhukung’u, bhakabhuga, “Mucharu cha Izirairi rikiri kobhoneka ing’ana ncha rinu!”

34 Nawe Abhafarisaayo bhakabhuga, “Araheebha amasambwa kubhanaja bhwa Bhirizibhuri, umukuru wa amasambwa!”

Yisu ararorera abhaatu ibhigungi

‡ 9:27 *Umwana wu umutimi Daudi.* Kumaragirira bhukung’u, rora Ikiniibhasa.

³⁵ Mmbe, Yisu akabha ariiruguura mumiji na muzimbiri zusi. Huhusi hanu aari akuhita, akasikira mamarwaziru kwija abhaatu. Aari ararwaza Ing'ana Inzumu iguru wu ubhutimi bhwa mwisaaru na aari arahorya amarwiri gusi.

³⁶ Hanu Yisu aaruzi amaribhita ga abhaatu, akabharorera ibhigungi, ku kubha bhaari bharanyaaka na bhataari nu umutu wu ukubhasakirya. Bhaari ncha zing'andu zinu zitaana umuriisha.

³⁷ Neho akabhabhurira abhiga bhaazi, "Amagesa maaru, nawe abhahocha, ni-bhasuuhu.

³⁸ Mmbe musabhi Mungu newe umwene mugundu, korereke atumi abhahocha mumugundu gwazi, bhagese."

10

Yisu aratuma abhiga bhaazi ikumi na bhabhiri (Maaroko 3:13-19, 6:7-13; Ruuka 6:12-16, 9:1-6)

¹ Yisu akabhirikira abhiga bhaazi ikumi na bhabhiri, akabhaha ubhunaja bhu ukuruusha amasambwa amabhi na bhwo okohorya amarwiri gusi.

² Amariina ga abhiga ikumi na bhabhiri bhayo, ni-ganu:

We embere ni-Simuni wenu akubhirikirwa Peetero,* na Andureya umuhiiri waazi, Yaakobho umwana wa Zebhedaayo, na Yoochana umuhiiri waazi,

³ Firipu, Bhatomayo, Tomaaso, Mataayo wenu aari umurihya wa riguti, Yaakobho umwana wa Arifaayu, Tadaayo,

* **10:2 Peetero**, enzobhooro yaku ni-ritari.

4 Simuuni Umukananayu,[†] enzobhooro yaku ni-mwitaniri wi icharu chazi, na Yuuda Isikariyuti wanu iichuriri Yisu.

5 Yisu akatuma abhiga ikumi na bhabhiri bhayo, akabharagan'ya, "Mutaja kubhaatu bhanu bhataru Abhayaahudi, na matasikira rubhiri rwurwusi rwa Samaariya.

6 Nawe muji kuBhiizirairi, bhayo ni-zing'andu zinu zibhuriri.

7 Hanu mukuja kwebho, murwazi, 'Ubhatimi bhwa mwisaaru bhuraariiri!'

8 Mohorye abharwiri, muryuri abhaku, mohorye bhe ebhegege na moheebhe amasambwa. Mubhwini ubhunaja bhuyo bhaha, na niimwi muhuruchi bhaha.

9 Na morogendo rwanyu mutagega izahaabhu nuru mpirya nuru zishabha mubhiguzi bhyanyu.

10 Mutabhanura isakwa, hamwi ishadi ya kugarura, hamwi ibhikwira, hamwi ihimba, ku kubha omohocha wusi areenderwa kahaabhwa amarihi.

11 "Urubhiri rwurwusi rana maraasikiri, momohye umutu wanu akwisirirya kubhaginihya iwaazi. Mwikari kwawi kuhika hanu mukubhuka.

12 Hanu mukusikira muwaazi, musabhiri abhaatu bhaazi omorembe.

13 Ariibhi bharimu abhaatu bhanu bhakwenderwa, amakeeren'ya gaanyu garabhaha

[†] 10:4 *Simuuni Umukananayu* aari na amariina abhiri, irimwi ryi Ikigiriki, *Simuuni Umuziruti*, irindi ryi Ikiyaahudi, *Simuuni Umukananayu*. Gusi gane enzobhooro yimwi, umutu wanu akwitaniira ubhwiyaagaruri bhwi isi yaazi.

omorembe. Nawe ariibhi bhatakwenderwa kusung'aana, omorembe guyo gubhagarukiri imwi abheene.

¹⁴ Muraahiki munyumba hamwi urubhiri rwurwusi, na abhaatu bhakaanga kubhaginihya na kubhiitegeerera, hanu mukurwa ahagero hayo, mukung'uti urutu kumaguru gaanyu, kobheerecha kubha Mungu arabhaanga.

¹⁵ Nirabhabhurira amaheene, urusiku rwi itinira, Mungu arabhaha inyaaku bhukung'u abhaatu bha urubhiri ruyo, kukira abhaatu bha zimbiri za Sodoma na Gomora!‡

Inyaaku yinu ikuuza

(Maaroko 13:9-13; Ruuka 21:12-17)

¹⁶ “Rora, nirabhatuma ncha zing'undu gati wa zisuuzi. Nangu, mubhi bhang'ini nche enzoka, na abhanyuuu nchi ikiguuti.

¹⁷ Mwiyangariri na abhaatu, ku kubha bharabhahira kuchandar, na bharabhatema imizariti mamarwaziru gaabha.

¹⁸ Bharabhahira mubhutangi bhwa abhakangati na abhatimi iguru waani. Moreenderwa kubha abhaminyikiri bhaani mubhutangi bhwabha na mubhutangi bhwa abhaatu bhanu bhatar Abhayaahudi.

¹⁹ Hanu bharaabhagwati, metabha na makibhwi kubha mragambaki hamwi mragambabhw. Mungu arabhaha amang'ana gu ukugamba kwibhaga riyo.

‡ **10:15 Sodoma na Gomora** zaari zimbiri zinu Mungu aarikirya iguru wu ubhabhi bhwa abhaatu bhaaku. Rora ubhutangi 19:24-29.

²⁰ Itari kubha imwi muragamba, nawe ne-Koro ya Wuusu neyo iraagambi kuhitira kwa niimwi.

²¹ “Ribhaga riyo, umuhiiri ariichara umuhiiri waazi korereke iitwi. Wiisi ariichara umwana waazi, na abhaana bhariitan’ya abhiibhuri bhaabhu na kugirya bhiitwi.

²² Abhaatu bhushi bharabhabhihirirwa iguru waani. Nawe wunu ariigumiriryi kuhika itinira, newe araasabhuki.

²³ Maraakorwe kibhi murubhiri ororebhe, mur-yariri murubhiri urundi. Nirabhabhuurira ama-heene, mutakumara emeremo janyu muzimbiri zushi za Izirairi, Umwana wu Umuatu akiiri kuhika.

²⁴ “Umwiga atakukira umwija waazi, na mbusa atakukira umuniibhi waazi.

²⁵ Umwiga areenderwa abhi nchu umwija waazi, na mbusa abhi nchu umuniibhi waazi. Ariibhi inyi ni-muniibhi waanyu na bharambirikira Bhurizibhuri,§ nangu imwi, marabhirikirwa amariina amabhi bhakung’u.

Mwubhahi Mungu umwene

(Ruuka 12:2-9)

²⁶ “Mutubhaha abhaatu bhayo, ku kubha kitareeho kinu kikundikiriibhwi, kikatama kuhumburwa, na kinu kibhisirwi, kikatama kororekana.

²⁷ Gushi ganu nikubhabhuurira imwi mukiirimya, mugagambi habhwiru, na gushi ganu mukwigwa kwa mbisi, mugarwazi kubhaatu habhwiru.

²⁸ Mutubhaha bhanu bhakutura kwita umubhiri, nawe bhataknaja kwita egoro yaanyu.

§ 10:25 *Bhurizibhuri*, ni-riina irindi rya Shitaani, umakuru wa amasambwa gushi.

Nawe mwabhahi Mungu, ku kubha newe akutura kuricha umubhiri hamwimwi ne egoro momorero gwa nyaari.

²⁹ “Awii! Zisanzi ibhiri zitakuguribhwa ubhuguri ubhusuuu? Nawe itareeho naabha yimwi yinu ikugwa haasi iyeene, Wuusu atasigiri.

³⁰ Na niimwi, Mungu aminyiri endengo ya zinzwiri za kumitwi janyu.

³¹ Mmbe, mutubhaha, ku kubha imwi munu ubhwera kukira zisanzi.

³² “Umuntu wuwusi wunu araanyiisiriri mubhutangi bhwa abhaatu, na niinyi niramwisirirya mubhutangi bhwa Bhaabha wa mwisaaru.

³³ Nawe, wuwusi wunu akunyanga mubhutangi bhwa abhaatu, na niinyi niramwanga mubhutangi bhwa Bhaabha wa mwisaaru.

*Yisu aritiri ubhutaaman'ya
(Ruuka 12:51-53, 14:26-27)*

³⁴ “Mutiiseega kubha niiziri muusi koreeta omorembe. Nitiiziri koreeta omorembe, nawe ubhutaaman'ya.

³⁵ Niiziri koreeta ubhutaaman'ya gati wu umwana na wiisi, umuucha na unina, na gati wu umukamwana na uninabhyara.

³⁶ Abhabhisa bhu umuntu ni-bhu uwaazi.*

³⁷ Wuwusi wunu asigiri wiisi hamwi unina kukira chimbu ansigiri, atakwenderwa kubha mahimba waani. Na wuwusi wunu asigiri umwana waazi hamwi umuucha waazi kukira chimbu ansigiri, wusi atakwenderwa kubha mahimba waani.

* **10:36** Rora Miika 7:6.

38 Umuntu wanu atakogega umusarabha gwazi† na kuntuna, wuyo atakwenderwa kubha mubimba waani.

39 Umuntu wanu akwenda kohon'ya ubhuhuru bhwazi umwene, arabhurimiry. Nawe umuntu wanu akurimiry ubhuhuru bhwazi iguru waani, arabha nu ubhuhuru bhwa kemerano.

*Umubhanu kubhaatu bhanu bhakusung'aana
abhahimba bha Yisu
(Maaroko 9:41)*

40 “Umuntu wanu akubhaginihya imwi, aranginihya na niinyi. Na wanu araanginihyi, araginihya na wanu antumiri.

41 Wanu akuginihya umuruatiriri ku kubha ni-muruatiriri, Mungu aramubhanura umubhanu ncha gwa umuruatiriri. Na wanu akuginihya umuntu we eheene ku kubha ne-we eheene, aramubhanura umubhanu ncha gwa we eheene.

42 Wanu araamohe wamwi wa abhasuuu bhanu ekekombe cha amanzi amamiizu ku kubha ni-mubimba waani, nirabhabhurarira amaheene, atakubhurwa umubhanu gwazi.”

11

1 Hanu Yisu aamariri kuswaja abhiga bhaazi ikumi na bhabhiri, akatanura kuja muzimbiri izindi za Gariraaya kwija na kurwazira abhaatu.

*Yohana Umubhatiizi aratuma abhiga bhaazi
kwa Yisu
(Ruuka 7:18-35)*

† 10:38 *Kogega umusarabha gwazi*, enzobhooro yaku ni-kwisirirya inyaaku uyuyisi, nugu kukwa iguru wu ukutuna Yisu.

² Ribhaga riyo, Yoohana Umubhatiizi aari mokebhoho. Hanu iigwiri ganu Kiriisitu akokora, akatuma abhiiga bhaazi abhamwi bhamubhuuryi,

³ “Awi naawi Kiriisitu wanu akuuza, kisha turindi uwundi?”

⁴ Yisu akabhagarukirya, “Muji mubhuriri Yoohana ganu guusi mukwigwa na korora.

⁵ Abhahuku bhararora, abharema bharagenda, abhagenge bharahora, abharibhi bha amatwi bhariigwa, abhaku bhararyuka na abhahabhi bhararwazirwa Ing’ana Inzumu.*

⁶ Hakiriku umuntu wanu ataana makibhwi iguru waani.”

⁷ Hanu abhiiga bha Yoohana bhaabhuukiri, Yisu akatanga kubhurira riribhita amang’ana iguru wa Yoohana. Akabhabhuurya, “Mukaja mwitirigu kororaki? Korora umuntu wanu akwisirirya amang’ana guusi ncha rikuri rinu rihaasingishwa nu umukama?

⁸ Mukaja kororaki? Mukaja korora umuntu wanu iibhuri zengebho zinzumu za riguri? Ziyi! Abhaatu bhanu bhahiibhoha zengebho zinzumu za riguri, bhahiikara muzinyumba za abhatimi.

⁹ Nawe mukaja kororaki? Umurutiriri? Hee, nirabhabhurira, Yoohana ni-mukuru kukira umurutiriri.

¹⁰ Wuyo newe wanu Amaandiku Amarindu gaagambiri iguru waazi, ‘Rora, niratuma umutumwa waani mubhatangi bhwazu, wanu araakokonzere inzira.’†

* **11:5** Umurutiriri Isaaya akarora kubha Masiya arakora amang’ana gayo. Rora Isaaya 35:5-6, 61:1. † **11:10** Rora Maraaki 3:1.

11 Nirabhabhũũrira amaheene, mubhaatu bhũsi bhanũ bhiibhwiri kũsi, akiĩri kobhoneka umukuru kukira Yoohana Umubhatiizi. Nawe, umũtu umusuuhu kukira bhũsi mubhutimi bhwa mwisaaru, newe umukuru kukira Yoohana.

12 Kwima hanũ Yoohana Umubhatiizi aari ararwaza kuhika reero yinũ, abhaatu bhakĩri bhari-itan'ya ubhutimi bhwa mwisaaru, na abhaatu abhakararu bhareenda kobhogega kwa nguru.

13 Amiija gũsi ga abharũtiriri ni imigiru ja Musa bhikarootorera kuhika ribhaga rya Yoohana.

14 Ariibhi muriisirirya ubharũti bhwabhũ, Yoohana newe ĩriya, wũnũ aagambirwi kubha araaza.‡

15 Wu ukutwi, iitegeerere.

16 “Nawe, urwibhũrũ rũnũ nirutuubhan'yi naki? Rutuubhĩni na abhaana bhanũ bhakwikara momoteera bharabhirikira abhakindichabhũ, bharabhuga,

17 ‘Tukabhatemera ekereere, nawe mataabhiniri! Tukĩmba amĩmbũ gu ukwarama, nawe mataaririri!’

18 ĩbhũibhu hanũ Yoohana iiziri, aari atakurya ibhyakurya bhya amanaru na atakunywa idivaayi, bhakabhuga, ‘Wũnũ ana amasambwa!’

19 Umwana wũ Umũtu akaaza, ararya ibhyakurya bhya amanaru na kunywa idivaayi, bhakabhuga, ‘Rora! Ni-musuuhũ, munywi, mũaani wa abharihya bha rigũti na bhũ ubhũbhi!’ Nawe nũrũbhu, ubhwabhũri bhwa Mungu bhũhaamenyeekererya ga amaheene kũnzira ya amahocha ga abhaatu bhaazi.”

‡ 11:14 Rora Maraaki 4:5.

*Horeera zimbiri zinu zaangiri kutiga ubhubhi
(Ruuka 10:13-15)*

²⁰ Neho Yisu akatanga kuhama zimbiri zinu aakuririmu ibhisigu bhyaru, ku kubha zikaanga kutiga ubhubhi bhwa.

²¹ Akabhuga, “Horeera imwi abhaatu bha Korazini! Horeera imwi, abhaatu bha Bhitisaida! Angabhiri ibhisigu bhinu bhyakuriibhwi kwa nimwi, bhyangakurirwi muzimbiri za abhasarya bha Tiirona Sidani, bhaari bharatiga ubhubhi bhwa kukwibhoha amagonera na kwihaka riibu.

²² Nawe nirabhabhurira, urusiku rwi itinira, Mungu arabhaha imwi inyaaku kukira abhaatu bha Tiirona Sidani. §

²³ Na nimwi, abhaatu bha Kapirinaumu, muriiseega muratiiribhwa kuhika mwisaaru? Ziyi! Muriikibhwa kuhika momorero gwa nyaari. Angabhiri ibhisigu bhinu bhikurirwi kwa nimwi bhyangakurirwi murubhiri rwa Sodoma,* urubhiri ruyo rwari urabhaho kuhika reero yinu.

²⁴ Nawe nirabhabhurira, urusiku rwi itinira, Mungu arabhanyaacha bhakung’u kukira inyaaku yu urubhiri rwa Sodoma.”

*Yisu ni-hagero hu ukwoyera
(Ruuka 10:21-22)*

²⁵ Ribhaga riyo Yisu akabhuga, “Bhaabha, Umukuru wa risaaru ni isi, uzamiryi, ku kubha amang’ana ganu ubhabhisiri bha amang’ini na

§ **11:22** Rora Amusi 1:9-10; Yawiri 3:4. * **11:23 Sodoma** rwari urubhiri rwanu Mungu aarikiryi iguru wu ubhubhi bhwa abhaatu bhaaku. Rora Ubhatangi 19:24-29.

abhasumi, ugatiri habhwira kubhana, bhanu ubhwisirirya ncha abhaana abhasuuu.

²⁶ Ihu nimbu, yakuzumiri.”

²⁷ Akumara Yisu akabhuga, “Bhaabha ang’iri bhyusi. Atareeho wanu iki Umwana, kuruushaku Bhaabha umwene. Na atareeho wanu iki Bhaabha, kuruushaku Umwana, na wawusi wanu Umwana areende kumwerecha.

²⁸ “Muuzi kwa niinyi bhusi bhanu mukunyaaka na kuritoherwa ni imirigu, na niinyi nirabhooyeerya.

²⁹ Mwibhohe ijuki yaani, mwigu kurwa kwa niinyi, ku kubha inyi, ni-munyuuu na mwikumu wu umwuyu. Noho mukubha no omorembe mummyu janyu, ³⁰ ku kubha ijuki yaani ni-huhu kogega, nu umurigu gwani mahuu.”

12

Yisu newe Umukuru wu urusiku rwu ubhuturu (Maaroko 2:23-28; Ruuka 6:1-5)

¹ Rusiku ramwi rwu ubhuturu,* Yisu na abhiga bhaazi bhaari bharahita mumigundu ji inganu. Hana abhiga bhaazi bhiigwiri inzara, bhakatina ibhigara bhyi inganu, bhakarya.

² Hana Abhafarisaayo bhaaruzi gayo, bhakabhurira Yisu, “Rora, abhiga bhaazu bhara-hocha emeremo gina gitakwenderwa kokorwa urusiku rwu ubhuturu!”†

³ Yisu akabhabhurira, “Mutasumiri muMaandiku Amarindu chimbu Daudi na

* **12:1 Ubhuturu.** Kumaragirira bhukung’u, rora ring’ana urusiku rwu ubhuturu muKiniibhasa. † **12:2** Rora Kuhurika 20:8-11.

abhakindichazi bhaakuriri, hanu bhaari ni inzara?‡

⁴ Akasikira mwibhuru ririndu rya Mungu, akumara ewe na abhakindichazi bhakarya imikaati ginu jatiirwi mubhutangi bhwa Mungu. Imikaati ginu kumigira ja Musa gitakwenderwa kuriibhwa na abhaatu, kuruushaku bhakuhaani abheene.

⁵ Kisha mukiri kosoma kinu imigira ja Musa gikubhuga, iguru wa abhakuhaani bhanu bhakohocha mwihekaaru urusiku rwu ubhuturu?§ Bharasarya imigira ju ubhuturu, nawe Mungu atakubhabharira kubha bharasarya.

⁶ Nawe nirabhabharira kubha, hanu areho umakuru kukira rihekaaru.

⁷ Mungu arabhuga, ‘Nereenda mubhi ni ibhigangi kukira kuhurucha ikimweso.’* Nawe mwangaminyiri enzobhooro ya amang’ana gayo, mataari muratema amasoro abhaatu bhanu bhataana ubhubhi.

⁸ Umwana wu Umutu, newe Umakuru wu urusiku rwu ubhuturu.”

*Yisu arahorya umutu urusiku rwu ubhuturu
(Maaroko 3:1-6; Ruuka 6:6-11)*

⁹ Yisu akabhuka, akaja mwirwaziru ryabhu.

¹⁰ Mwirwaziru muyo, aarimu umutu wamwi wanu aari akuuri okobhoko. Bhaarimu na Abhafarisaayo bhanu bhaari bhareenda komogema Yisu, korereke bhamwinatiriryiku. Bhakamubhuurya, “Ni-bhwaheene kohorya umutu urusiku rwu ubhuturu?”

‡ 12:3 Rora 1 Samwiri 21:1-6.

§ 12:5 Rora Ukubhara 28:9-10.

* 12:7 Rora Hooseya 6:6.

11 Akabhagarukirya, “Ni-wiwi gati waanyu, wanu aribhi ing’andu yaazi igwiri mwiruma urusiku rwu ubhutura, atami kayisabhamu?”

12 Nawe omenye umutu anu ubhwera kukira ing’andu! Mmbe, nangu ni-bhwaheene kokora amazumu urusiku rwu ubhutura.”

13 Akumara Yisu akabwirira umutu wanu akuuri okobhoko, “Gorora okobhoko kwazu.” Akakogorora, na hayohayo kukahora, kukabha nchu ukundi.

14 Nawe Abhafarisaayo bhakahuruka igutu, bhakagambana chimbu bharaamurichi Yisu.

Yisu newe omohocha wanu arabhwirwi na Mungu

15 Hanu Yisu aaminyiri isimi ya Abhafarisaayo bhayo, akarwa hayo. Abhaatu bhaaru bhakamutuna, akahorya abharwiri bhasi.

16 Nawe akabharecha bhatakumucha kubhaatu kubha ewe ni-wiwi,

17 korereke gakorwe amang’ana ganu Mungu aagambiri kunzira yu umurutiriri Isaaya,

18 “Rora, omohocha waani wanu nirubhwiri, umusiigwa waani, wanu akongongeerya umwuyu gwani.

Niramoha Ekoru yaani,
korereke aragan’yi ubhutuurya kubhaatu bhi ibh-
yaru bhyasi.

19 Atakuhakaana naabha kurigisa,
na muti atakwigwa iraka ryazi kunzira.

20 Atakuricha kinyuhiruru chuchasi ncha ritete,
naabha kurimya urutambi rana rukuzunzazunza,
kuhika hanu araareete ubhutuurya kuhiza
ubhubhi.

21 Ni ibhyarũ bhyũsi bhiramwisega ewe umwene.”†

*Yĩsu ana zinguru kũkĩra Shitaani
(Maaroko 3:20-30; Ruuka 11:14-23)*

22 Akũmara bhakamoreetera Yĩsu umũũtu wũũũ aari na risambwa. Umũũtu wuyo aari umũhũku inũ imuumu. Yĩsu akamohorya, akatanga kũgamba na korora.

23 Abhaatũ bhũũsi bhanũ bhaari hayo bhakarũgũũra bhũkũng’u, bhakabhuga, “Iratura kũbha wũũũ newe Umwana wũ umũtĩmi Daudi?”

24 Nawe hanũ Abhafarisaayo bhiigwiri gayo, bhakabhuga, “Araheebha amasambwa kũbhũnaja bhwa Bhĩrizibhuri,‡ umũkurũ wa amasambwa!”

25 Yĩsu akamenya amiisĩgi gaabha, akabhabhũũrĩra, “Ariĩbhi abhaatũ bhũ ubhũtĩmi bhũmwĩ bhariitana, ubhũtĩmi bhuyo bhũhaagwa. Na ariĩbhi abhaatũ bhũ urubhiri rũmwĩ hamwĩ inyumba yĩmwĩ bhariitana, mmbe abhaatũ bhayo bharataana.

26 Na Shitaani araaheebhe Shitaani, arabha ariiyiitan’ya umwene. Ubhũtĩmi bhwazi bhũranagabhwi?

27 Ariĩbhi niraheebha amasambwa kũbhũnaja bhwa Bhĩrizibhuri, abhahĩmba bhaanyu ebho bhahaagaheebha kũbhũnaja bhwa wĩwĩ? Igũrũ wa gayo, bhayo nebho bhareereche kũbha ganũ mukũgamba gatari maheene.

28 Nawe ariĩbhi niraheebha amasambwa kũbhũnaja bhwe Egoro ya Mungu, mmbe

† 12:21 Rora Isaaya 42:1-4. ‡ 12:24 **Bhĩrizibhuri** ni-riina irĩndi rya Shitaani.

momenye kubha abhutimi bhwa Mungu bhuhikiri kwa niimwi.

²⁹ Umuntu araturabhwī kusikira munyumba yū umuntu wa amanaga na kumuruusha ebhegero bhyazi, akiri komobhoha? Areemobhohe, hayo aratura kumuruusha ebhegero bhyazi.

³⁰ “Umuntu wunu atari hamwimwi na niinyi, ari mbarika. Na wunu atakubhiringa abhaatu bha Mungu hamwimwi na niinyi, arabhasanja.

³¹ Kugayo nirabhabhūrira, Mungu aratura kobheerera abhaatu abhubhi bhwabhu bhwasi, nūru bhaari bhamurigiri. Nawe Mungu atakutura kobheerera abhaatu aribhi bhararega Ekorō Indindu.

³² Na Mungu aratura kobheerera umuntu wunu akugamba kibhi iguru wu Umwana wu Umuntu. Nawe atakobheerera umuntu wunu akugamba kibhi iguru we Ekorō Indindu, ibhi kwibhaga rinu hamwi rinu rikuuza.

*Abhaatu bharamenyekana kamang’ana gaabhu
(Ruuka 6:43-45)*

³³ “Umuti guhaamenyekana kumisumu jaku. Umuti umazumu guhiibhura imisumu imizumu, nu umuti umubhi guhiibhura imisumu imibhi. Uratura komenya umuti chimbu guri kumisumu jaku.

³⁴ Imwi urwibhuru rwe enzoka! Muraturabhwī kugamba amang’ana amazumu inu imwi, ni-bhabhi? Umuntu ahaagamba ganu gizwiri mumwuyū gwazi.

³⁵ Umuntu umazumu ahaahurucha amang’ana amazumu kurwa kamazumu ganu gabhiikirwi mumwuyū gwazi, nawe umuntu umubhi ahaahurucha amang’ana amabhi kurwa kamabhi ganu gabhiikirwi mumwuyū gwazi.

³⁶ Mmbe, nirabhabhaurira, urusiku rwi itinira, ring'ana ryasi rinu abhaatu bhakubha bhaagam-biri ritakubha na bhwera, bhareenderwa kuhurucha ekerengo cha ring'ana riyo.

³⁷ Kumang'ana gaazu amazumu urabharirwa eheene, na kumang'ana amabhi urabharirwa ubhubhi.”

Abhafarisaayo bhareenda ibhisigu kurwa kwa Yisu

(Maaroko 8:11-12; Ruuka 11:29-32)

³⁸ Akumara Abhafarisaayo obhorebhe na abhija bhi imigira ja Musa bhakabhaurira Yisu, “Umwija, toreenda okore ichirikin'yu kwerecha kubha uruuri kwa Mungu.”

³⁹ Akabhagarukirya, “Imwi urwibhuru urubhi na ranu rutari oroheene! Moreenda ichirikin'yu, nawe mutakwerechwa ichirikin'yu chuchusi, ku-ruushaku kimwi kinu changi chu amurutiriri Yoona.

⁴⁰ Chimbu Yoona iikiri munda yi iiswi siku isatu ubhutika nu umwise,§ ibhu nimbu Umwana wu Umutu ariikari mumbihira siku isatu ubhutika nu umwise.

⁴¹ “Urusiku rwi itinira, abhaatu bhu urubhiri rwa Ninaawi bhariimirira mubhutangi bhwa Mungu hamwimwi na abhaatu bhu urwibhuru rwa nangwinu na kurutinira. Abhaatu bha Ninaawi bhakatiga ubhubhi bhwabhu iguru wu ukwigwa ubhurwazi bhwa Yoona. Nangu nirabhabhaurira, hanu areho umukuru kukira Yoona.*

⁴² Ribhaga ryu amatimi Sirimaani, aareho marikiya wumwi wanu aari aratema urubhaara

§ 12:40 Rora Yoona 1:17. * 12:41 Rora Yoona 3.

rwa rangi. Marikiya wuyo ariimurira mubhutangi bhwa Mungu na kutinira abhaatu bhu urwibhuru runu, ku kubha bhasariryi. Ewe akarwa mucharu cha kore korereke aazi iitegeerere amang'ana gu ubhwabhuri bhwu umutimi Sirimaani.[†] Nangu nirabhabhurira, hanu areho mukuru kukira Sirimaani.”

*Ekerenjo cho okorecha abhaatu abhabhi
(Ruuka 11:24-26)*

⁴³ Yisu akang'eha kugamba, “Hanu risambwa rikurwa kumutu, rihaaja kukibhara inu riramohya ahagero hu ukwoyeera. Nawe riraatamwi kuhabhona,

⁴⁴ rihaabhuga, ‘Niragaruka uwaani hanu naruuri.’ Hanu rikugaruka, rirabhona aangi inyumba yinu iri bhaha, itarikiibhwi na ikurirwi bhwaheene.

⁴⁵ Akumara rihaaja koreeta amasambwa agandi muhungati amabhi kurikira, guusi gahaasikira kumutu wuyo, na kwikara kwawi. Neho ubhwikari bhwu umutu wuyo bhahaabha bhubhi kukira chimbu bhware. Ihu nimbu ikubha kwa niimwi, urwibhuru urubhi runu.”

*Bhaumwabhu Yisu na unina
(Maaroko 3:31-35; Ruuka 8:19-21)*

⁴⁶ Hanu Yisu aari achagambana na riribhita rya abhaatu bhayo, unina na abhahiiri bhaazi bhakaaza, bhakiimurira igutu, bhareenda kugambana nawe.

[†] 12:42 Rora 1 Abhatimi 10:1-13; 2 Amang'ana ga Amabhaga 9:1-12.

⁴⁷ Umuntu wumwi akabhabwirira Yisu, “Onyoko na bhaumwanyu bhiimiiriiri igutu, bhareenda kugambana na naawi.”

⁴⁸ Yisu akamugarukirya, “Yiia, ni-wiwi? Na bhaumwitu, ni-bha wiwi?”

⁴⁹ Akumara akoorota abhiga bhaazi, akabhuga, “Rora, bhanu nebho bha yiia na bhaumwitu!

⁵⁰ Umuntu wawusi wanu akokora ubhwindi bhwa Mungu, wuyo newe umwitu, umusubhaati na yiia.”

13

Ekerenjo chu umubhusuri wa zimbusuru (Maaroko 4:1-9; Ruuka 8:4-8)

¹ Urusiku ruyoruyo, Yisu akarwa munyumba yiyo, akaja kwikara rusizu wi inyanza.

² Riribhita ikuru rya abhaatu rikaaza, rikiibhiringa hanu Yisu aari. Akasikira mubhwatu, akiikara, abhaatu bhakabha bhiimiiriiri rusizu wi inyanza.

³ Yisu akabhabwirira amang’ana maaru kobherenjo. Akabhuga, “Mwitegeerere! Umubhusuri akaja kubhusura imbusuru yaazi. ⁴ Hanu aari akubhusura, zimbusuru izindi zikagwa kanzira, ibhinyunyi bhikaaza, bhikazirya.

⁵ Izindi zikagwa kukurungutari, zikamera bhwangu, ku kubha riobha ryari isuuhu.

⁶ Hanu umwi gwabhariri, zikanyaara na kwama, ku kubha imiri jaku jari iguruguru.

⁷ Izindi zikagwa mamahwa. Amahwa gayo gakakura, gakazihiza kuhika zikakwa.

⁸ Izindi zikagwa kwirobha rizumu, zikakura. Zikiibhura imisumu, izindi igana rimwi, izindi merongo isaasabha ni izindi merongo itatu.

⁹ Wu ukutwi, iitegeerere.”

Kwaki Yisu aragamba kwe ebherenjo

(Maaroko 4:10-12; Ruuka 8:9-10)

¹⁰ Abhiga bhaazi bhakamujaku na kumubhuurya, “Kwaki uragambana na abhaatu kwe ebherenjo?”

¹¹ Akabhagarukirya, “Imwi muhürwi ubhunaja bhwo okomenya zimbisi zu ubhutimi bhwa mwisaaru, nawe ebho ziyi.

¹² Wunu akwitegeerera ing’ana ya Mungu na koyomenya, Mungu aramusakirya na kumwongerya koyomenya kukiraho. Nawe ariibhi umutu atakwitegeerera ing’ana ya Mungu, nuru isuuhu yinu aminyiri ararusibhwa.

¹³ Kiyo necho kikugirya, niragambana nabhu kwe ebherenjo, ku kubha bhararora, nawe bhatakunaama. Na bhariitegeerera, nawe bhatakwigwa nuru bhatakwobhoora.

¹⁴ Kwabhu gabhuri ganu umurutiriri Isaaya aabhugiri,

‘Ukwigwa muriigwa, nawe mutakwobhoora.

Okorora murarora, nawe mutakunaama,

¹⁵ ku kubha abhaatu bhanu zekoro zaabhu zibhuri kung’u,

amatwi gaabhu gatakwigwa,

amisu gaabhu gatakorora.

Bhatakwenda korora kwa amisu gaabhu,

kwigwa kwa amatwi gaabhu,

nuru kwobhoora kwa zekoro zaabhu,

bhataaza kunyiichurira

na niinyi nibhahorye.*”

¹⁶ Neho Yisu akabhabhūrira abhūga bhaazi, “Nawe hakiriku imwi, ku kubha amūsu gaanyu gararora na amatwi gaanyu gariigwa.

¹⁷ Nirabhabhūrira amaheene, abharūtiriri na abhaatu bhe eheene bhaaru, bhaari bhariigomba korora ganu mokorora, nawe bhatagarūzi, na kwigwa ganu mukwigwa, nawe bhataagiigwiri.

*Yisu aragarura ekerenjo chu umubhusuri
(Maaroko 4:13-20; Ruuka 8:11-15)*

¹⁸ “Mmbe, mwitegeerere enzobhooro ye ekerenjo chu umubhusuri wa zimbusuru kiyo.

¹⁹ Umūtu wūwūsi wūnu akwigwa ing’ana yū ubhūtimi bhwa mwisaaru, nawe atakwobhoora, umūtu wuyo atuubhūni na zimbusuru zinū zaagwiri kenzira. Shitaani ahaaza na kusaakura kinū kihambirwi mokoro yaazi.

²⁰ Zimbusuru zinū zaagwiri kukurungutari, ziratuubhanibhwa nu umūtu wūnu akwigwa ing’ana yū ubhūtimi bhwa mwisaaru, na hayohayo arayigwata kobhozomerwa.

²¹ Nawe ku kubha ubhwisirirya bhwazi bhutaana imiri, aragwata kwibhaga isuuhubhu. Hanu inyaaku hamwi amakung’u gakomobhona iguru wi ing’ana yū ubhūtimi bhwa mwisaaru, rogerendo rumwi aratiga ubhwisirirya.

²² Zimbusuru zinū zaagwiri mūmahwa, ziratuubhanibhwa nu umūtu wūnu akwigwa ing’ana yū ubhūtimi bhwa mwisaaru, nawe arakangiribhwa na amahocha ga kūsi nu umwūyū gwu ubhuniibhi. Gayo gahaahiga

* 13:15 Rora Isaaya 6:9-10.

ing'ana ya Mungu na kugirya itami kwibhura imisumu.

²³ Nawe zimbusuru zinu zaagwiri kwirobha rizumu, ziratuubhanibhwa nu umuntu wanu akwigwa ing'ana ya ubhuti bhwa mwisaaru na koyobhoora. Umuntu wuyo newe akwibhura imisumu, igindi igana rimwi, igindi merongo isaasabha ni igindi merongo itatu.”

Ekerenjo chi ikituki

²⁴ Yisu akabhabhurira ekerenjo ikindi, “Ubhuti bhwa mwisaaru bhutuubhini nu umuntu wanu aahambiri zimbusuru zinzumu mumugundu gwazi.

²⁵ Nawe hanu abhaatu bhaahindiiri, umubhisa akaaza, akahamba ikituki munganu, akumara akaja.

²⁶ Hanu inganu yaamiriri na kutanga kubharya, ikituki chusi kikarorekana.

²⁷ Bhambusa bha wa umugundu bhakaaza, bhakamubhuurya, ‘Umukuru, tuminyiri ukahamba zendetere zinzumu mumugundu gwazu. Nangu, ikituki kiruuri hayi?’

²⁸ “Akabhagarukirya, ‘Umubhisa newe akuriribhu.’

“Bhambusa bhaazi bhakamubhuurya, ‘Nangu tuji twihi ikituki?’

²⁹ “Nawe akabhuga, ‘Ziyi, mutachiha, ku kubha murihi, muratara kwiha ni inganu.

³⁰ Mutigi bhyusi bhikuri hamwimwi, kuhika ribhaga ryo okogesa. Ribhaga riyo, nirabhurira abhagisi bhabhiringi hinga ikituki zituumu korereke bhachoche. Neho bhatari kogesa inganu na kuyibhika mukitara chani.”

Ekerenjo cha akadetere

(Maaroko 4:30-34; Ruuka 13:18-19)

³¹ Yiesu akabhabhaurira ekerenjo ikindi, “Ubhutimi bhwa mwisaaru bhutuubhini ne endetere isuuhu yi iharadaari, yinu umutu aagigiri na kuhamba mumugundu gwazi.

³² Endetere yiyo ni-suuhu kukira zendetere izindi zusi, nawe iraamere ihaakura kukira ibhyakurya bhyusi bhina bhiri mumugundu. Na ihaabha muti makuu, ni ibhinyunyi bhihaaza na kwikara kubhisha bhyaku.”

Ekerenjo chu ubhutunduuru

(Ruuka 13:20-21)

³³ Yiesu akabhabhaurira ekerenjo ikindi, “Ubhutimi bhwa mwisaaru bhutuubhini nu ubhutunduuru bhina umakari akogega na kusangin’ya nu ubhutu bhw ingana mubhiguzi bhitatu. Ubhutunduuru bhuyo bharagirya ubhutu bhw ingana bhwusi bhutunduri.”

Yiesu arahicha ubhuruti kwe ebherenjo

(Maaroko 4:33-34)

³⁴ Yiesu aari arabhaurira amaribhita ga abhaatu amiija gayo kwe ebherenjo. Atabhiijiryi chuchasi ataana kereno.

³⁵ Gayo gakariibhwibhu, korereke ribhi ring’ana rinu Mungu aagambiri kunzira ya amurutiriri waazi arabhuga, “Niragambana na abhaatu kobherenjo. Niragahumbura amang’ana ganu gaari giibhisiri kwima okoteemwa kwi isi.”†

Enzobhooro ye ekerenjo chi ikituki

† 13:35 Rora Zabhuri 78:2.

36 Mmbe, Yisu akaraga amaribhita ga abhaatu, akasikira munyumba. Abhiga bhaazi bhakamu-jaku, bhakamubhaurira, “Tugaruriri enzobhooro ye ekerenjo chi ikituki mumugandu.”

37 Yisu akabhagarukirya, “Umuntu wanu aahambiri zendetere zinzamu, ni-Mwana wu Umuntu.”

38 Umugandu guratuubhanibhwa ni-isi, zendetere zinzamu ni-bhaatu bu ubhutimi bhwa mwisaaru, ni ikituki, ni-bhaatu bha Shitaani.

39 Umubhisa wanu aahambiri ikituki ni-Shitaani. Amagesa ni-tiniru yi isi, na bhamaraika bha Mungu nebho abhagisi.

40 “Chimburya ikituki kikwihwa na kwochwa momorero, nimbu ikubha urusiku rwi itiniru yi isi.

41 Umwana wu Umuntu aratama bhamaraika bhaazi, korereke bhabhiringi abhakari bu ubhubhi bhusi kurwa mubhutimi bhwazi, hamwimwi na bhusi bhanu bhagiriryi ubhubhi,

42 na kubharekera mwibhibhi ryo omorero. Iyo bhararira na kokepeha.

43 Neho bhe eheene bharaabharyi nchi iryubha mubhutimi bhwa Wiisi. Wu ukutwi, iitegeerere.”

Ekerenjo che ekegero chu ubhwera ubhukuru

44 Akumara Yisu akahurucha ekerenjo ikindi, akabhuga, “Ubhutimi bhwa mwisaaru bhutuubhini ne ekegero chu ubhwera ubhukuru kinu chari kibhisirwi mumugandu. Urusiku rumwi, umuntu akakebhona, akakibhisa naatu. Akazomerwa bhukung’u, akaja akagurya ebhegero bhyazi bhyusi bhinu aari nabhyu, akagura umugandu guyo.

45 “Nū ubhutimi bhwa mwisaarū bhutuubhīni nu umusuruja wānū akomohya iruuru yu ubhwera ubhukurū.

46 Hanū aarūzi iruuru yimwi yu ubhwera ubhukurū, akaja akagurya ebhegero bhyazi bhyūsi bhinū aari nabhyū, akagura iruuru yiyo.”

Ekerenjo che enzero

47 Yīsu akahurucha ekerenjo ikindi, akabhuga, “Ubhutimi bhwa mwisaarū bhutuubhīni ne enzero yinū yataashirwi manyanza, ikagwata ziiswi ze eteemwa nzaru.

48 Hanū enzero yīzwiri, abhatigi bhakarutira rusizū wi inyanza. Akumara, bhakiikara, bhakabhiringa ziiswi zinzamu, bhakatūra mobhegero. Nawe bhakataasha ziiswi zimbi.

49 Ibhū nimbu ikubha, urusikū rwi itinirū yi īisi. Bhamaraika bharaaza na kutaan’ya abhakuri bhū ubhubhi na bhe eheene.

50 Akumara bhararekera abhakuri bhū ubhubhi mwibhibhi ryo omorero. Iyo bhararira na kokepeha.”

Amiija amahya na gi ikari

51 Yīsu akabhuurya abhūga bhaazi, “Nangū, mwubhūriri guusi ganū nibhabhuuriiri?”

Bhakamugarukirya, “Hee.”

52 Akabhabhūrira, “Umwija wūwūsi wi imigirū ja Musa wānū iijibhwi igurū wū ubhutimi bhwa mwisaarū, atuubhīni nu umwene nyumba wānū akuhurucha mobhegero bhyazi ebhegero ibhihya na bhyi ikari.”

*Abhaatū bha Nazarīti bharaanga Yīsu
(Maaroko 6:1-6; Ruuka 4:16-30)*

53 Hanu Yisu aamariri kuhurucha ebherenjo bhiyo, akabhuka hayo,

54 akaja marubhiri rwabha rwa Nazariiti. Iyo, akatanga kwija abhaatu mwirwazira ryabha. Bhakarugura bhukung'u, bhakiibhuurya, "Umuntu wanu abhwini hayi ubhwabhuuri bhanu? Na abhwini hayi ubhanaja bhwo okokora ibhisigu bhinu?"

55 Wanu atari umwana wu umusirimara wurya? Unina ti Mariyamu? Abhasuuhu bhaazi ti Yaakobho, Yuusufu, Simoni na Yuuda?

56 Na abhasubhaati bhaazi tebho bhanu tukwikara nabha hanu? Nangu, abhwini hayi amang'ana gusi ganu?"

57 Abhaatu bhayo bhakiigatana, bhakaanga kumwisirirya. Nawe Yisu akabhabhuurira, "Umuruririri ahaasuukwa ahandi husi, kuruushaku marubhiri rwazi nu uwaazi."

58 Yisu ataakuriri ibhisigu bhyaru iyo, ku kubha bhatamwisiriiryi.

14

*Yoohana Umubhatiizi aratinwa umutwi
(Maaroko 6:14-29; Ruuka 9:7-9)*

1 Ribhaga riyo, umutimi Heroode Antipaasi* aari umukangati wi icharu cha Gariraaya. Hanu igwiri iguru wa amahocha ganu Yisu aari arakora,

2 akabhuurira abhahocha bhaazi, "Umuntu wuyo, ne-Yoojana Umubhatiizi! Hamwi aryukiri mubhaku, nechocha anu ubhanaja bhwo okokora ibhisigu ibhikuru."

* **14:1 Heroode Antipaasi.** Kamaragirira bhukung'u, rora ikiniibhasa.

³ Heroode akagambabhu, ku kubha ewe newe aari agwatiri Yoozana. Akamobhoha mokebhoho, iguru wa amang'ana gu ubhukwiri bhwa Heroode na Hirudiya. Hirudiya wuyo, aari umakari wa Firipha, umwabhu.

⁴ Kereeta ndeewa chari, Yoozana akabhurira Heroode, “Ni-mugiru kukwira umakari wa umwabhu.”†

⁵ Heroode aari aramohya inzira yu ukwita Yoozana, nawe aari arubhaha abhaatu ku kubha bhiisiriiri Yoozana kubha ni-murutiriri wa Mungu.

⁶ Hanu inyangi yu ukwibhurwa kwa Heroode yaahikiri, umuucha wa Hirudiya akabhina embere wa abhagini. Heroode akazomerwa bhukung'u.

⁷ Neho akamwirahira komoha chuchusi kinu araamabhi.

⁸ Umuucha wuyo akasiigiriribhwa na unina, akabhurira Heroode, “Nong'e kuruhungu umutwi gwa Yoozana Umubhatiizi.”

⁹ Umutimi Heroode akarumika bhukung'u, nawe iguru wu ubhwirahiri bhwazi mubhutangi bhwa abhagini, akaswaja umuucha ahaabhi.

¹⁰ Mmbe, Heroode akatuma amutu aji mokebhoho, atini Yoozana umutwi.

¹¹ Akumara akareeta umutwi gwa Yoozana kuruhungu, akaha umuucha wuyo, wusi akahirira unina.

¹² Hanu abhiga bha Yoozana bhiigwiri amang'ana gayo, bhakaaza bhakagega ikitundu

† 14:4 Rora Abharaawi 18:16, 20:21.

bhakabhika. Akumara, bhakaja bhakabhurira Yisu amang'ana gayo.

Yisu arariisha abhaatu bhikwi bhitaanu na bhusaagu

(Maaroko 6:30-44; Ruuka 9:10-17; Yoozana 6:1-14)

¹³ Hanu Yisu iigwiri gayo, akabhuka hayo nu ubhwatu, akaja ahagero hanu hataana abhaatu. Nawe abhaatu bhakiigwa inu aagiiri, bhakamutuna maguru kurwa muzimbiri zaabhu.

¹⁴ Hanu Yisu iikiri mubhwatu, akarora riribhita ikuru rya abhaatu. Akabharorera ibhigangi na kohorya abharwiri bhaabhu.

¹⁵ Hanu ryahikiri rigoroobha, abhiga bhaazi bhakamujaku bhakamubhurira, “Hanu turi ni-mwitirigu na bhuraariiri kwira. Ubharagi abhaatu bhanu, bhaji muzimbiri kwigurira ibhyakurya.”

¹⁶ Yisu akabhabhurira, “Bhatakwenderwa kuja. Imwi, mubhahi ibhyakurya.”

¹⁷ Ebho bhakamugarukirya, “Tutaana kegero! Tuni imikaati itaanubhu na ziiiswi ibhiri.”

¹⁸ Akabhabhurira, “Mondeetere hanu.”

¹⁹ Akabhaswaja abhaatu bharya bhiikari haasi kubhunyaaki. Akagega imikaati itaanu na ziiiswi ibhiri ziryaa, akarangamira kwisaaru akabhurira Mungu, azumiryi. Akumara akasunyuraku imikaati, akabhaha abhiga bhaazi hamwimwi na ziiiswi, bhusi bhakabhasondya abhaatu.

²⁰ Bhusi bhakarya, bhakiiguta. Akumara, abhiga bhaazi bhakabhiringa amasaaju, bhakizurya bhihuzu ikumi na bhibhiri.

21 Abhaatũ bhanũ bhaariiri ibhyakurya bhirya, bhaari abhasubhi bhikwi bhitaanũ, kuruushaku abhakari na abhaana.

*Yĩsu aragenda igũrũ wa amanzi
(Maaroko 6:45-52; Yoohana 6:16-21)*

22 Hayohayo, Yĩsu akaswaja abhĩga bhaazi bhasikiri mubhwatũ, bhakangati kuja imwambukũ wi inyanza, ribhaga riyo ewe aari araraga riribhita rya abhaatũ.

23 Hanũ aamariri kũraga riribhita rirya, akatiira kũkigũrũ umwene kũsabha Mungu. Hanũ ikiir- imya chasikiiri, aari akiiri kũkigũrũ.

24 Ribhaga riyo, ubhwatũ bhurya bhware bhuhikiri kore ni ĩsi inyũmu, na amakunda gaari garabhotema, kũ kubha umũkama gwari gũrahuuta.

25 Mmbe hanũ ryahikiri mũmacha, Yĩsu akahika hanũ abhĩga bhaazi bhaari, aragenda kũmanzi.

26 Hanũ abhĩga bhaazi bhaarũzi aragenda kũmanzi, bhakũbhaha bhũkung’u, na kũrigisa bharabhuga, “Kinũ ni-kihwi!”

27 Hayohayo, Yĩsu akagamba, “Mohoreere, matũbhaha! Niinyi.”

28 Peetero akamũgarukirya, “Umũkurũ, ariibhi naawi, mbũrira niizi kwa naawi, niragenda kũmanzi.”

29 Akabhuga, “Nauzi!”

Mmbe, Peetero akiika mubhwatũ, akatanga koga genda igũrũ wa amanzi kuja kwa Yĩsu.

30 Nawe hanũ aarũzi umũkama mũhaari, Peetero akũbhaha bhũkung’u, akatanga

kutubhira mumanzi, akakuura kwiraka,
“Umukuru, nsabhura!”

³¹ Hayohayo, Yisu akagorora okobhoko, akamugwata, akamubhaurira, “Awi wu ubhwisirirya ubhusuuhu, kwaki ukabha na uruhaho?”

³² Hanu bhaatiiriri mubhwatu, umukama gukatureera.

³³ Mmbe, abhiga bhanu bhaari mubhwatu, bhakamosengera. Bhakabhuga, “Maheene, awi ni-Mwana wa Mungu!”[‡]

*Yisu arahorya abharwiri bha Genezariti
(Maaroko 6:53-56)*

³⁴ Hanu Yisu na abhiga bhaazi bhaambukiri inyanza, bhakahika mucharu cha Genezariti.

³⁵ Hanu abhaatu bha ahagero hayo bhumbuuriri ni-Yisu, bhakatuma abhaatu kuragan’ya amang’ana gaazi muzisi zusi za haguhi. Bhakamoreetera abharwiri bhaabhu bhusi.

³⁶ Bhakamusabha abhiisiririyi abharwiri bhakun’yi naabha ripindu rye engebho yaazi. Bhusi bhanu bhaamukuniryiku, bhakahora amarwiri gaabhu.

15

*Yisu araanga isimuka ya abhakaruru
(Maaroko 7:1-13)*

¹ Neho Abhafarisaayo na abhiija bhi imigiru ja Musa obhorebhe bhakarwa Yirusarimu bhakaaza kwa Yisu, bhakamubhuurya,

[‡] 14:33 *Umwana wa Mungu.* Kumaragirira bhukung’u, rora ikiniibhasa.

2 “Kwaki abhũga bhaazu bhatigiri isimuka yinu abhakaruka bhitu bhaatutigiiri? Bhararya ibhyakurya, inu bhatiisaabhiri amabhoko gaabhu chimbu ikwenderwa!”*

3 Akabhagarukirya, “Ndora imwi mutigiri imigiri ja Mungu, kwa kutuna zisimuka zaanyu?”

4 Mungu abhugiri, ‘Usuki wuusu na onyoko,’† naatu akabhuga, ‘Wuwusi wunu akutuka wiisi hamwi unina, areenderwa akwi.’‡

5 Nawe imwi mhaabhuga, umutu wunu araabhuriri wiisi hamwi unina, ‘Ebhegero bhinu nangaturiri kukusakirya, nihuruchiryi kwa Mungu ikimweso,’

6 angu umutu wuyo atakwenderwa kusuka wiisi hamwi unina. Nawe kuyo nekwe okorega ing’ana ya Mungu iguru wu kutuna zisimuka zaanyu.

7 Abhabhihi imwi, Mungu akagamba amaheene iguru waanyu kuhitira kumrutiriri Isaaya chimbu yandikirwi kubha,

8 ‘Abhaatu bhanu bhahaansuka kwa mang’ana ageene,

nawe zekoro zaabhu zere kore na niinyi.

9 Okosengera kwabhu kutaana bhweri,

ku kubha bhariiia amiija ga abhaatu

kina ni-ga Mungu.’§”

* 15:2 *Bhatiisaabhiri amabhoko gaabhu chimbu ikwenderwa*, enzobhooro yaku ubhwisaabhi bhwari simuka yi ikiyaahudi. Abhayaahudi bhakarora ni mugiri kutiga amanaru ganu. † 15:4 Rora Kuhuruka 20:12; Amahiityu gi Imigiri 5:16. ‡ 15:4 Rora Kuhuruka 21:17; Abharaawi 20:9. § 15:9 Rora Isaaya 29:13.

*Amabhi gusisi gararwa mozekoro
(Maaroko 7:14-23)*

¹⁰ Mmbe, Yisu akabhirikira riribhita rya abhaatu, akabhabhurira,

¹¹ “Mwitegeerere bhwaheene, na mwobhoore! Itari kinu kikusikira mumunywa necho kekokora umuutu kobhenga.* Nawe, amang’ana ganu gakurwa mumunywa, nego gakugirya umuutu abhenge.”

¹² Neho abhiga bhakamujaku, bhakamubhurya, “Uminyiri kubha hanu Abhafarisaayo bhiigwiri amang’ana garya bhakiigatana bhukung’u?”

¹³ Akagarukirya, “Ibhituutu bhyusi bhinu bhitaahambirwi na Bhaabha wa mwisaaru, bhirihiwa.

¹⁴ Mubhatigi! Bhayo ni-bhakangati abhahuku bhanu bhahaakangata abhahuku. Umuhuku ariikangati umuhuku umukindichazi, bhusi bharagwa mwiruma.”

¹⁵ Peetero akabhuga, “Tugaruriri ekerenjo kiyo.”

¹⁶ Yisu akamugarukirya, “Na niimwi mukiri komenya?”

¹⁷ Mutizi kubha chuchusi kinu kikusikira mumunywa, kihaaja munda, akumara kihaahuruchibhwa igutu wu umubhiri?

¹⁸ Nawe ganu gakurwa mumunywa, gararwa mokoro yaazi, nego gakugirya abhenge.

¹⁹ Mokoro yu umuutu nimu gahaarwa amiisiigi amabhi, ubhwiti, ubhusibhiti, itaaru, ubhwibhi, ururimi na amatuki.

* **15:11 Kobhenga.** Kugaragira bhukung’u, rora ring’ana ubhubhingi muKiniibhasa.

²⁰ Gũsi gayo, nego gahaakora umũtu abhenge. Nawe kurya utiisaabhiri amabhoko chimbu ikwenderwa kutakugirya obhenge.”

Ubhwisirirya bhwũ umukari wũũ atari Umũyaahudi

(Maaroko 7:24-30)

²¹ Mmbe, Yũsu akabhũka harya, akaja urubhaara rwa zimbiri za Tiirũ na Sidũni.

²² Neho akarumana nũ umukari wũmwĩ, aari Mukanaani. Umukari wuyo akaja kwawe aragamba kwiraka, “Umukurũ, Umwana wũ amũtĩmi Daudi, ondore ibhigũgi! Umuucha waani ana risambwa rĩramũnyaacha bhakũng’ũ.”

²³ Nawe atamũgarukiĩryĩ ing’ana ryũryũsi. Neho, abhĩga bhaazĩ bhakamujaku na kũmusabha bharabhuga, “Mutigĩ aji, kũ kubha ang’ihĩrĩ kutũrigĩsĩrĩ inũ araturwa inyuma.”

²⁴ Akagarukĩrya, “Nitũmirwĩ igurũ wa Abhiizĩrĩrĩ, bhaangĩ zing’ũndũ zĩnũ zibhurĩrĩ.”

²⁵ Umukari wuyo akiisuka kwa Yũsu, akahigama mubhutangi bhwazĩ, akabhuga, “Umukurũ, nsakĩrya!”

²⁶ Akamũgarukĩrya, “Itari bhwahene kogega ibhyakurya bhya abhaana na kũtaashĩrya zimbwa.”†

²⁷ Umukari wuyo akabhuga, “Nĩmbũ irĩ Umukurũ, nawe nũũũ zimbwa zũũsi zĩhaatoora amasaajũ ganũ gakotorobhoka haasi kurwa kwigari rya abhakurũ bhaabhũ.”

† 15:26 *Kogega ibhyakurya bhya abhaana na kũtaashĩrya zimbwa*, enzobhooro yũ abhũgambi bhanũ nĩ-kubha, Abhayaahudi bhabhone abhũsakĩrya hĩnga abhaatũ bhanũ bhatarĩ Abhayaahudi bhakĩrĩ.

28 Yäsu akamugarukirya, “Umukari wanyu, ubh-wisirirya bhwasu, ni-bhukuru! Ekorwe kwa naawi chimbu ukwenda.” Hayohayo, umuucha waazi akahora.

Yäsu arahorya abharwiri bhaaru

29 Yäsu akabhuka hayo, akahita rusizu wi inyanza ya Gariraaya. Akatiira kukiguru, akiikara iyo.

30 Abhaatu bhaaru bhakamujaku, bhakamoreetera amagata, abhahuku, abharema, amamuumu na abharwiri abhandi bhaaru, bhakabhatuura haguhi na amaguru gaazi, akabhahorya.

31 Abhaatu bhakarugura bhukung’u hanu bhaaruuzi amamuumu garagamba, abharema bharahora, amagata garagenda na abhahuku bhararora. Bhakagunga Mungu wa Izirairi.

Yäsu arariisha abhaatu bhikwi bhene na bhusaagu

(Maaroko 8:1-10)

32 Yäsu akabhabhirikira abhiga bhaazi, akabhuga, “Nirabharorera ibhigangi abhaatu bhanu, ku kubha twikiiri nabhu zisiku isatu, nangwinu bhataana ibhyakurya. Nitakwenda nibharagi bhaji muzimbiri zaabhu bhani inzara, ku kubha abhandi bharatura kugwa ubhwesa.”

33 Abhiga bhaazi bhakamubhuurya, “Nangu, turi mwitirigu, na abhaatu, ni-bhaaru. Turatura kobhona hayi imikaati ju ukwisa kubhiigutya bhushi?”

34 Yäsu akabhabhuurya, “Muni imikaati iringa?”

Bhakamugarukirya, “Tunajū muhungati ni ibhiswi bhisuuhubhu.”

³⁵ Mmbe, Yīsu akaswaja abhaatū bhiikari haasi.

³⁶ Akagega imikaati muhungati na ziswi ziryā akabhūrira Mungu, azumiryi. Akumara akasunyura, akabhaha abhūga bhaazi, bhakasondya abhaatū.

³⁷ Abhaatū bhūsi bhakarya, bhakiiguta. Akumara abhūga bhakabhiringa amasaajū, bhakiizurya ibhihūzū muhungati.

³⁸ Abhaatū bhanū bhaariiri bhaari abhasubhi bhikwi bhene, kuruushaku abhakari na abhaana.

³⁹ Akumara Yīsu akaraga abhaatū bhayo, akasikira mubhwatū, akaja urubhaara rwa Magadaani.

16

*Abhaatū bhareenda ichirikin'yū
(Maaroko 8:11-13; Ruuka 12:54-56)*

¹ Akumara Abhafarisaayo na Abhasadukaayo bhakaja kwa Yīsu komogema. Bhakamūsabha akore ichirikin'yū kwerecha kubha aaruuri kwa Mungu.

² Yīsu akabhagarukirya, [“Hanū ikuhika ubhutikū, imwi mūrabhuga, ‘Tabhūri amasaarū garabha bhwaheene, kū kubha risaarū rere kore zenzota zibhanziri.’

³ Na ritabhūri mūrabhuga, ‘Reero iratweka imbura yū umukama, kū kubha risaarū irabhuru na amasaarū gabhuukiri.’ Kani, mwizi kwobhoora ibhyirikin'yū bhya amasaarū, nawe mutakutūra kwobhoora ibhyirikin'yū bhya ribhaga rinū!]

4 Imwi urwibhuru urubhi na ruru rutari oroheene! Moreenda ichirikin'yu, nawe mutakwerechwa ichirikin'yu chuchusi, kuruushaku kimwi kinu changi chu umuruatiriri Yoona." Neho Yisu akarwa hayo, akabhatiga.

Amiija amabhi ga Abhafarisaayo na Abhasadukaayo

(Maaroko 8:14-21)

5 Mmbe, abhiga bha Yisu bhakaambuka inyanza, nawe bhaari bhimbiri kogega imikaati.

6 Yisu akabhabhuurira, "Mwiyangariri nu ubhutunduuru bhwa Abhafarisaayo na Abhasadukaayo."

7 Abhiga bhakatanga kugambana abheene kobheene, bharabhuga, "Arabhugabhu, ku kubha tataagigiri imikaati."

8 Yisu akamenya guusi ganu bhaari bhakugambana, akabhabhuurya, "Imwi abhaatu bhu ubhwisirirya ubhusuuhu! Kwaki muriimonyerera kubha mataana imikaati?"

9 Kuhika nangu, mukiri komenya? Mutakuhiita chimbu abhaatu bhikwi bhitaanu bhiigutiri kwa mikaati itaanu girya? Mukiizurya ibhihuzuzubhiringa bhya amasaaju?

10 Hamwi mutakuhiita imikaati muhungati girya, kubhaatu bhikwi bhene? Mukiizurya ibhihuzuzubhiringa bhya amasaaju?

11 Ndora mutakwobhoora ganu nagambiri, itari iguru wi imikaati? Mmbe, nirabhuga, mwiyangariri nu ubhutunduuru bhwa Abhafarisaayo na Abhasadukaayo."

12 Neho, abhiga bhubhuriri kubha ataari aragamba iguru wu kwiyangarira nu ubhutundu-uru bhwo okokora imikaati, nawe iguru wa amiija guururimi rwa Abhafarisaayo na Abhasadukaayo.

Peetero ariisirira kubha Yisu newe Kiriisitu

(Maaroko 8:27-30; Ruuka 9:18-21)

13 Hanu Yisu aahikiri urubhaara rwa Kaisaariya-Firipi, akabhabhuurya abhiga bhaazi, “Abhaatu bharabhuga, Umwana wu Umuntu ni-wiwi?”

14 Bhakamugarukirya, “Abhandi bharabhuga, naawi Yoohana Umubhatiizi, abhandi bharabhuga awi, ni-iriya na abhandi bharabhuga awi, ni-Yirimiya hamwi ni-wumwi waho wa abharutiriri bha Mungu abhandi bhi ikari.”

15 Yisu akabhabhuurya, “Na niimwi marabhuga inyi, ni-wiwi?”

16 Simuni Peetero akamugarukirya, “Aw, ni-Kiriisitu,* Umwana wa Mungu wu ubhuhuru.”

17 Yisu akabhuga, “Hakiriku awi Simuni umwana wa Yoona, uhakirwi, ku kubha atareeho umuntu wanu akuhumburiiri amaheene ganu, nawe ni-Bhaabha wa mwisaaru.

18 Inyi nirakubhurira, awi Peetero,† awi ni-ritari, ni iguru wa ritari rinu, nirumbaka risengerero ryani, na zinguru zu uruku zitakurihiza.

19 Inyi nirakoha zihunguru zu ubhutimi bhwa mwisaaru. Amang’ana guusi ganu ukubha waangiri kuusi, garabha gaangirwi mwisaaru.

* **16:16 Kiriisitu**, enzobhooro yaku ni-Masiya. † **16:18 Peetero**, enzobhooro yaku ni-ritari.

Na ganu uriisiriryi kuusi, garabha giisiririibhwi mwisaaru.”‡

²⁰ Neho akabhahama abhiiga bhaazi kubha, bhatabhaurira umutu wuwusi kubha ewe newe Kiriisitu.

Yisu aragamba iguru wu ukukwa nu ukuryuka kwazi

(Maaroko 8:31-9:1; Ruuka 9:22-27)

²¹ Kutangira ribhaga riyo, Yisu akatanga kuragirira abhiiga bhaazi habhwiru kubha areenderwa aji Yirusarimu, na anyaakibhwi bhukung'u. Akabhabhaurira, aranyaakibhwa na abhakaruka bha Abhayaahudi, na abhakuru bha abhakuhaani na abhiija bhi imigiru ja Musa, kuhika kwitwa. Nawe urusiku rwa katatu kwima ukukwa kwazi, araryuka.

²² Neho Peetero akamuhira Yisu rusiza, akatanga komorecha arabhuga, “Umukuru, Mungu agahityi gayo kore! Gataaza kokobhona!”

²³ Nawe Yisu akiichura, akabhaurira Peetero, “Shitaani, nuurwi inyuma waani! Uragema kundibhira kokora chimbu Mungu akwenda! Amiisiigi gaazu gatari ga Mungu, nawe ga abhaatu.”

²⁴ Mmbe, Yisu akabhaurira abhiiga bhaazi, “Umutu wuwusi wanu areende kuntuna, areenderwa iyangi umwene, agege umusarabha gwazi, § antuni.

²⁵ Umutu wanu akwenda kohon'ya ubhuhuru bhwazi umwene, arabhurimirya. Nawe umutu

‡ 16:19 Rora Mataayo 18:18. § 16:24 Agege umusarabha gwazi, enzobhooro yaku ni-kwisirirya Yisu nuru kukwa iguru waazi.

wanu akurimirya ubhuhuru bhwazi iguru waani, arabha nu ubhuhuru bhwa kemerano.

²⁶ Umuntu arabhona bhweraki, areebhone ebhegero ubhuniibhi bhwasi muni yinu, nawe arimiryi ubhuhuru bhwa kemerano? Nangu, umuntu aratara kuhuruchaki kobhona ubhuhuru bhwa kemerano? Kitareeho ekegero chuchasi!

²⁷ Umwana wu Umuntu araaza hamwimwi na bhamaraika bhaazi mubhukuru bhwa Wiisi. Neho araarihi abhaatu bhuni kuring'aana na amahocha gaabhu.

²⁸ Nirabhabhurira amaheene, bhareho abhaatu gati waanyu hanu, bhanu bhatakukwa bhakiri korora Umwana wu Umuntu araaza mubhuti bhwazi.”

17

*Yisu ariichura ubhushu
(Maaroko 9:2-13; Ruuka 9:28-36)*

¹ Hanu zaahitiri siku isaasabha, Yisu akagega Peetero, Yaakobho na Yoohana umuhiiri wa Yaakobho, akatiira nabhu iguru kuguru ikirihu, bhakaja kegoro.

² Hanu bhaari hayo, Yisu akiichura mubhutangi bhwabhu. Ubhushu bhwazi bhukabharya nchi iryubha na amiibhoho gaazi gakabha miru bhukung'u nchu ubhwirubhwi iryubha.

³ Hayohayo, bhakahwaruka abharutiriri Musa na iriya* bharagambana nawe.

* **17:3 Musa na iriya** bhaari abharuti abhakuru. Musa akab-hakangata Abhiiziriri kurwa Miisiri kuja mucharu cha Iziriri. iriya aari ariisegwa kabha aragaruka kuni, Masiya akiri kuuza. Rora Maraaki 4:5.

⁴ Neho Peetero akabhabwirira Yisu, “Umukuru, ni-bhwaheene itwi tubhi hanu. Ariubhi uriisirirya, nirumbaka hanu ibhituku bhitatu. Ikimwi ichazu, ikindi cha Musa ni ikindi cha Iriya.”

⁵ Hanu Peetero aari achagamba, hayohayo, rikaaza risaaru iryiru rya pee na kubhakundikirya. Akumara bhakiigwa riraka kurwa mwisaaru riyo rirabhuga, “Wanu ni-Mwana waani umusigwa, nizumirirwi nawe. Mumwitegeerere!”

⁶ Hanu abhiga bhaazi bhiigwiri gayo, bhakubhaha bhukung’u, bhakagwa haasi kibhumiri.

⁷ Yisu akiisuka haguh nabhu, akabhakun’yaku, akabhabwirira, “Mwimiriri, matubhaha!”

⁸ Hanu bhaanungiri amisu gaabhu, bhakarora Yisu asaagiri umwene.

⁹ Hanu bhaari bhakwika kukiguru hayo, Yisu akabhaswaja akabhuga, “Mutaaza mubwiriri umutu wuwusi ganu muruzi kuhika hanu Umwana wu Umutu akuryuka kurwa mubhaku.”

¹⁰ Abhiga bhaazi bhakamubhuurya, “Ndora abhija bhi imigiru ja Musa bhahaabhuga, ereenderwa Iriya akangatiri Kiriisitu kuuza?”

¹¹ Yisu akabhagarukirya, “Maheene, Iriya areenderwa kuuza hinga korereke aturi bhwaheene amang’ana gusi.

¹² Nirabhabwirira kubha Iriya† amariri kuuza, nawe abhaatu bhataaminyiri, bhusi bhakamokorera amabhi gusi ganu bhindiri.

† 17:12 Yisu araring’aan’ya **Iriya** na Yoohana Umabhatiizi. Yoohana akakorera Yisu inzira, emeremo ginu Abhayaahudi bhaari bhariisega kubha Iriya arakora. Rora Mataayo 11:13-14.

Ibhuibhu nu Umwana wu Umwetu, aranyaakibhwa mumabhoko gaabhu.”

13 Neho abhiga bhaazi bhakoobhoora kubha Yisu aari aragamba iguru wa Yoohana Umubhatiizi.

*Yisu arahorya umwana wanu ana risambwa
(Maaroko 9:14-29; Ruuka 9:37-43)*

14 Hanu Yisu na abhiga bhaazi bhaahikiri kwiribhita rya abhaatu rinu ryari ryibhiringiri, umwetu wamwi akaaza kwa Yisu, akahigama mubhutangi bhwazi.

15 Akabhurira Yisu, “Umukuru, nirasabha omororere ibhigangi umwana waani! Anu ubhurwiri bhwa ririmu, nu ubhurwiri bhuyo bhaamunyaacha bhakung’u. Manga kaaru ahaagwa momorero hamwi manzi.

16 Nikamuhira kubhiga bhaazu korereke bhamohorye, nawe bhataaturiri.”

17 Yisu akabhuga, “Imwi urwibhuru ranu ratakwisirirya, ranu rurimiiri! Niriikara na niimwi na kubhigumirirya kuhika ryari? Momoreete hanu umwana wuyo.”

18 Hanu bhiiziri nawe, Yisu akahaarira risambwa riyo, rikamurwiku. Hayohayo, umwana akahora.

19 Akumara abhiga bha Yisu bhakamuuzaku rusiza, bhakamubhuurya, “Kwaki itwi tukatamwa kumuruusha risambwa?”

20 Ewe akabhagarukirya, “Ni-ku kubha yu ubhwisirirya bhwanyu bhutakwisa. Nirabhabhurira amaheene, ariibhi munu ubhwisirirya nche ekerengo che endetere isuuhu yi iharadaari, murabhurira ikiguru kinu, Thika

hanu, uji harya,' chusi charweho. Na kitakubhaho ekegero kinu kitakuturikana kwa niimwi. [

²¹ Hamwimwi na gayo, mutakutura koheebha risambwa ncha riyo, nawe ni-kunzira yu ukusabha Mungu na kwiya kurya.]”

Yisu aragamba naatu iguru wu ukukwa nu ukuryuka kwazi

(Maaroko 9:30-32; Ruuka 9:43b-45)

²² Hanu Yisu aari hamwimwi na abhiga bhaazi mucharu cha Gariraaya, akabhabhurira, “Umwana wu Umutu, araja kuhurukibhwa mamabhoko ga abhaatu na bharamwita. Nawe urusiku rwa katatu, Mungu aramurya.”

²³ Hanu abhiga bhaazi bhiigwiri gayo, bhakarumika bhukung'u.

Yisu arahurucha riguti rya rihekaaru

²⁴ Hanu Yisu na abhiga bhaazi bhaahikiri Kapirinaumu, abhaatu obhorebhe bhanu bhaari bhararihya riguti iguru wa rihekaaru rya Mungu,† bhakaaza kwa Peetero. Bhakamubhuurya, “Umwija waanyu wusi ahaahurucha riguti rya rihekaaru rya Mungu?”

²⁵ Peetero akabhagarukirya, “Nimbu iri, ahaahurucha.”

Neho akasikira munyumba. Nawe Peetero aari akiri kugamba ring'ana ryaryusi, Yisu akatanga kubhuurya, “Simuni, awi urarorabhwini?”

† **17:24** Ribhaga riyo, Abhayaahudi abhasubhi bhusi bhi imyaka merongo ibhiri hamwi kukira, bhakeendebhwa kuriha riguti imyaka jasi iguru wo okokora rihekaaru rya Mungu. Zimpirya ziyo zaari ziring'ini na amarihi ga siku ibhiri. Rora Kuhuruka 30:13-16; 2 Amang'ana ga Amabhaga 24:9-14; Nimiya 10:32.

Abhatimi bha mūsi yinu bharatobha riguti kubhaana bhaabha hamwi kubhandi?”

²⁶ Peetero akamugarukirya, “Bharatobha kubhandi.”

Yisu akamubhūrira, “Ariibhi nimbu iri, mmbe abhaana bhaabha bhabhirirwi kotobha riguti.

²⁷ Nawe tutaaza kwigatan’ya abhaatu, awi nuuji manyanza, uhunji rirobho. Gega iiswi ye embere yinu ikwihatya, yaasamyi umunywa, urabhonamu zimpirya. Akumara ozegege zimpirya ziyo, uji urih riguti ryanini iryaza.”

18

*Wiwu umukuru mubhutimi bhwa mwisaaru?
(Maaroko 9:33-37; Ruuka 9:46-48)*

¹ Ribhaga riyo, abhiga bha Yisu bhakamuuzaku, bhakamubhuurya,

² “Ni-wiwu umukuru kukira abhandi mubhutimi bhwa mwisaaru?”

Yisu akabhirikira umwana wumwi, akamwimirira mubhutangi bhwabha.

³ Akabhuga, “Nirabhabhūrira amaheene, ariibhi mutakwicha na kubha ncha abhaana abhasuuhu, mutakusikira zee mubhutimi bhwa mwisaaru.

⁴ Mmbe wuwusi wanu akwiyicha na kubha nchu umwana umusuuhu wanu, wuyo newe umukuru mubhutimi bhwa mwisaaru.

⁵ Na wuwusi wanu araaginihyi umwana umusuuhu ncha wanu kuriina ryanini, aranginihya inyi.

*Amaangirij gu ukugirya abhaatu bhakore amabhi
(Maaroko 9:42-48; Ruuka 17:1-2)*

⁶ “Nawe wanu araahabhyi wumwi gati wa abhasuuhu bhanu bhakunyiisirirya akore ubhubhi, inyaaku yaazi irabha kuru bhukung’u. Hakiriku abhoherwe urubhwi mwigati na korekerwa mubhwina bhwi inyanza.

⁷ Horeera imwi bhi isi yinu, ku kubha yo okokora amang’ana ganu gakugirya abhaatu bhakore ubhubhi! Ebhegemo bhereenderwa kubhaho, nawe horeera kumutu wanu araagirya ibhitimotimo bhiyo!

⁸ Ariibhi okobhoko kwazu hamwi ukuguru kwazu kuragirya okore ubhubhi, ukutini na kutaasha kore. Ni-hakiriku usikiri mubhuhuru bhwa kemerano no obhorema, kukira kubha na amaguru guusi abhiri hamwi amabhoko guusi abhiri nawe ukarekerwa momorero gwa nyaari.

⁹ Naatu, ariibhi iriisu ryazu riraagirya okore ubhubhi, ryihi na korerekerwa kore! Ni-hakiriku usikiri mubhuhuru bhwa kemerano ne esongo, kukira kubha na amisu guusi abhiri na korekerwa momorero gwa nyaari.”

Ekerenjo chi ing’andu yinu yaabhuriri
(Ruuka 15:3-7)

¹⁰ Yisu akang’eha kubhabhurarira, “Mubhi misu, mutarega wumwi mubhasuuhu bhanu! Nirabhabhurarirabhu, ku kubha bhamaraika bhaabha mwisaaru, ribhaga ryasi bhari mubhutangi bhwa Bhaabha waani wa mwisaaru.

[

¹¹ Umwana wu Umutu, iziri muusi korereke asabhuri abhaatu bhanu bhabhuriri.]

¹² “Murarorabhwi, ariibhi umutu na zing’andu igana rimwi, yimwi ikabhura, arakorabhwi?

Ahaatiga hinga merongo kenda na kenda mukiguru, na kuja komohya yimwi yinu ibhuriri.

¹³ Nirabhabhaurira amaheene, araayebhone, arazomerwa bhukung'u iguru wi ing'andu yimwi yiyo, kukira zing'andu ziry a merongo kenda na kenda zinu zitaabhuriri.

¹⁴ "Ibhuihu, Bhaabha waanyu wa mwisaaru, atakwenda nuru wumwi mubhasuuu bhanu arimiri.

Ubhwindi bhwa ukahama wana abhuriri

¹⁵ "Ariibhi umwisirirya umakindichazu akusaririiryi, nuuji omoreche imubheene bhabhiri. Ariikwigwi, urabha ubhwini umwisirirya umakindichazu.

¹⁶ Nawe ariibhi akiiri kukwigwa, nuuji ogege umutu uwundi wumwi hamwi bhabhiri korereke 'bhabheho abhaminyikiiriri bhabhiri hamwi bhatatu bho okomenyeekererya amang'ana gayo.*

¹⁷ Na araangi kwigwa na bhayo, nuuji ubhauriri risengerero. Araatami kwigwa na risengerero, mamubhariri ncha abhaatu bhanu bhatiizi Mungu hamwi umurihya wa riguti.

¹⁸ "Nirabhabhaurira amaheene, amang'ana guusi ganu ukubha waangiri kuusi, garabha gaangirwi mwisaaru. Na ganu uraagiisiriryi kuusi, garabha giisiririibhwi mwisaaru.†

¹⁹ Nirabhabhaurira naatu, ariibhi bhabhiri gati waanyu bhariisiriran'yi kuusi yinu kusabha ring'ana obhorebhe, Bhaabha waani wa mwisaaru arabhakorera ring'ana riyo.

* **18:16** Rora Amahiityu gi Imiguru 19:15. † **18:18** Rora Mataayo 16:19.

20 Ku kubha ariibhi bhareho nūru bhabhiri hamwi bhatatu bhanu bhiibhiringiri kuriina ryani, na niinyi nirabha hamwimwi nabhu.”

Ekerenjo chu umuntu wanu atakobheerera

21 Neho Peetero akaaza kwa Yisu, akamubhuurya, “Umukuru, ariibhi umwisirirya umakindichani ansaririiryi, nereenderwa nemobheerere manga karinga? Manga muhungati?”

22 Yisu akamugarukirya, “Nikubhurariri, itari manga muhungatibhu, nawe omobheerere umakindichazu muhungati manga merongo muhungati.‡

23 “Nirabhabhurirabhu, ku kubha ubhatimi bhwa mwisaaru bhutuubhini nu umutimi wumwi wanu indiri kokora ubhubhari na abhahocha bhi isirikaari yaazi.

24 Hanu umutimi aatangiri kuruha ibhitabhu, akareeterwa omohocha wumwi wanu aari ani isiiri ya zimpirya nzaru bhukung’u, zitaranta bhikwi ikumi.§

25 Omohocha wuyo ataaturiri kariha isiiri yinu aari nayo. Neho umutimi akaswaja kubha umuntu wuyo aguribhwi ewe, mukaazi, abhaana bhaazi ne ebhegero bhyazi bhyusi, korereke arihi isiiri yaazi.

26 “Omohocha wuyo akahigama mubhutangi bhwa umutimi, akamwisasaama, ‘Nirasabha unyigumiriryi, nirariha isiiri yaani yusi!’

‡ 18:22 *Muhungati manga merongo muhungati*, enzobhooro yaku, umwabhiri ribhaga ryusi. § 18:24 Itaranta yimwi yaari iring’ini na amarihi gu ukariha umuntu imyaka merongo ibhiri hamwi kukira.

27 Neho, umutimi akamororera ibhigangi omohocha waazi, akamobheerera isiiri yaazi yusi, akamutiga aji.

28 “Hanu omohocha wuyo aahurukiri igutu, akabhona omohocha umukindichazi wanu aari amuhiri ekerengo kisuuu bhukung’u cha zidinaari igana rimwi.* Hayohayo, akamugwata mwimero, akamubhurira, ‘Ndiha isiiri yaani!’

29 “Omohocha umukindichazi akahigama mubhutangi bhwazi, akamwisasaama, ‘Nirasabha unyiigumiriryi, nirakuriha isiiri yaazu yusi!’

30 Nawe akaanga, akaja komobhoha umukindichazi mokebhoho, kuhika ribhaga rinu araarihi isiiri yaazi.

31 “Hanu abhahocha abhakindichazi bhaaruzi ring’ana riyo, bhakanyahaarika mozekoro zaabhu. Bhakaja kumutimi waabhu na kumubhurira gusi ganu gakurirwi.

32 Neho umutimi akabhirikira omohocha wanu aabhiriri isiiri yaazi, akamubhurira, ‘Awi ne-mohocha mubhi! Rora, hanu wansabhiri kubha nekobheerere isiiri yaazu, nikakobheerera yusi!

33 Awi utamirwi komororera ibhigangi omohocha umukindichazu, chimbu inyi nakururi ibhigangi?”

34 “Mmbe, umutimi akiigatana bhukung’u, akaswaja abhasirikari bhaazi, bhamugwati na kumutura mokebhoho, bhamunyaachimu, kuhika hanu araamurihi isiiri yusi.”

* 18:28 Idinaari yimwi yaari iring’ini na amarihi gu urusiku ramwi kamutu wamwi.

35 Akumara, Yisu akamara kwa kugamba, “Momenye kubha nũũrũ Bhaabha waani wa mwisaarũ, arabhakorera na niimwi ibhuibhu, ariibhi mũraanga kobheerera umũkindichanyu kumyũyũ janyu jũsi.”

19

*Yisu ariija igũrũ wu ukukwira nũ ukũtaana
(Maaroko 10:1-12)*

1 Hanũ Yisu aamariri kugamba amang’ana gayo, akabhũũka Gariraaya, akahita rusizũ, mucharũ kinũ kiri imwambũkũ wi ikitaarũ cha Yorodaani kuja mucharũ cha Yudeya.

2 Abhaatũ bhaaru bhakabha bharamutuna iyo, nawe akahorya abharwiri bhanũ bhaari gati waabhũ.

3 Neho Abhafarisaayo obhorebhe bhakaaza kwa Yisu korereke bhamogeme. Bhakabhu-urya, “Awii, ni-bhwaheene umusubhi kũtaana na mũkaazi igũrũ wa ryũryũsi rirya?”

4 Yisu akabhagarukirya, “Imwi mũkĩiri kosoma mũMaandikũ Amarĩndu kubha kwĩma ubhubhumbi ‘Mungu akabhũmba umusubhi nũ umũkari’?”*

5 Akabhuga, ‘Igũrũ wa gayo, umusubhi aratiga wiisi na unina, aragwatana na mũkaazi. Bhabhiri bhayo bharabha mũbhiri gũmwi.’†

6 Na bhatakubha bhabhiri kwiki, nawe ni-mũbhiri gũmwi. Mmbe, kinũ kigwataniibhwi na Mungu, mũũtũ atakitaan’ya.”

7 Nawe, Abhafarisaayo bhakamubhuurya, “Ariibhi ganũ ni-maheene, niki Musa akaragan’ya

* 19:4 Rora Ubbutangĩ 1:27. † 19:5 Rora Ubbutangĩ 2:24.

umusubhi amohe umukari waazi inyarubha yu ukutaana na komoheebha?”

⁸ Yisu akabhagarukirya, “Musa akabhiisirirya moheebhe abhakari bhaanyu, ku kubha yu ubhukung’u bhwi imyuyu janyu, nawe kwima ubhutangi bhwu ubhubhumbi, bhutaari ubhwindi bhwa Mungu.

⁹ Nirabhabhaurira, umuntu wawusi wanu araatiigi makaazi, itari iguru wu ubhusiihya, na kukwira umukari wundi, wuyo arasebheeta. Nu umusubhi wanu akukwera umukari wanu atigirwi, wusi arasebheeta.”

¹⁰ Neho abhiiga bhaazi bhakamubhaurira, “Ariibhi nimbu kumusubhi nu umukari, ni hakiriku umuntu atakwira!”

¹¹ Yisu akabhagarukirya, “Itari bhusi bharatura kirisung’aana ring’ana rinu, nawe bhanu Mungu abhanagiryi kutama kukwira.

¹² Nirabhugabhu, ku kubha bhareho abhandi bhanu bhatakukwira ku kubha bhakiibhurwa bhazigaru. Abhandi bhatakukwira ku kubha abhaatu bhabhasururiri korereke bhatabha bhariibhura. Na bhareho na abhandi bhanu bhatakukwira ku kubha yu ubhutimi bhwa mwisaaru. Umuntu wawusi wanu akutura kusung’aana ring’ana riyo, arisung’aani.”

*Yisu arahaka abhaana abhasuuhu
(Maaroko 10:13-16; Ruuka 18:15-17)*

¹³ Mmbe, abhiibhuri obhorebhe bhakareeta abhaana abhasuuhu kwa Yisu korereke abhahaki kubhatuurira amabhoko na kubhasabhira. Nawe abhiiga bhaazi bhakabhahaarira.

¹⁴ Neho Yisu akabhabhaurira, “Mutigi abhaana abhasuuhu bhaazi kwa niinyi! Matabharecha, ku

kubha ubhuti bhwa mwisaaru ni-bhwa abhaatu bhanu bhaangi ncha abhaana.”

15 Yisu akahaka abhaana bhayo, akumara ak-abhuka ahagero hayo.

Ubhukung’u kumuniibhi kusikira mubhuti bhwa Mungu

(Maaroko 10:17-31; Ruuka 18:18-30)

16 Akumara umutu wumwi akaaza kwa Yisu, akamubhuurya, “Umwija, nekore ing’ana rizumu korereke nebhone ubhuhuru bhwa kemerano?”

17 Yisu akamugarukirya, “Kwaki urambuurya inyi iguru wa ring’ana rizumu? Rora, Mungu umwene newe umuzumu! Nawe ariibhi oreenda kusikira kubhuhuru bhwa kemerano, ugwati imigiru ja Mungu.”

18 Umumura wuyo akamubhuurya, “Migiruki?”

Yisu akamugarukirya, “Utiita, utasebheeta, uti-ibha, utagobha muti,

19 usuki wusu na onyoko, umusiigi nyarubhiri waazu chimbu wisigiri aumwene.”†

20 Umumura wuyo akabhuga, “Imigiru jasi giyo nigigwatiri. Nekoreki ikindi kinu kisuhiri?”

21 Yisu akamubhurira, “Ariibhi oreenda kubha umutu wanu ataana isoro, nuuji uguryi ebhegero bhyusi bhinu unabhya, zimpirya ziyo ubhahi abhahabhi, na rabha ni ikibhumbika kwa Mungu. Akumara uuzi untuni.”

22 Hanu umumura wuyo iigwiri gayo, akaja arumikiri bhukung’u, ku kubha aari ne ebhegero bhyaru.

† 19:19 Rora Kahuuka 20:12-16; Abharaawi 19:18; Amahiitya gi Imigiru 5:16-20.

23 Neho Yiesu akabhabhaurira abhiga bhaazi akabhuga, “Nirabhabhaurira amaheene, irabha kukung’u kumuniibhi kusikira mabhutimi bhwa mwisaaru.

24 Nirabhabhaurira naatu, ni-kunyuhu ingamiya kuhita mwibhanga ryi isindanu, kukira umuniibhi kusikira mabhutimi bhwa Mungu.”

25 Hanu abhiga bhaazi bhiigwiri ibhu, bhakarugura bhakung’u, bhakamubhuurya, “Nangu, ni-wiwi wanu akutura kusabhurwa?”

26 Yiesu akabhamogorera, akabhabhaurira, “Kubhaatu gatakuturikana, nawe kwa Mungu guusi garaturikana.”

27 Peetero akamabhaurira, “Rora, itwi tutigiri ebhegero bhyasi, tukutuniri! Mmbe, na niitwi tarabhonaki?”

28 Yiesu akabhagarukirya, “Nirabhabhaurira amaheene, Umwana wu Umautu arabha ikiri nchu amutimi kukitumbi chazi, muusi iihya. § Mmbe, ribhaga riyo na niimwi bhanu muntuniri, muriikara kubhitumbi bhyi ikitimi ikumi na bhibhiri, inu maratinira ibhigambu ikumi na bhibhiri bhya Izirairi.

29 Mmbe, amautu wawuusi wanu atigiri inyumba, umwabhu, umusubhaati, wiisi, unina, abhaana hamwi imigundu iguru waani, arasung’aana bhyasi kubhwaru bhakung’u. Hamwimwi na gayo, arabhona abhuhuru bhwa kemerano.

30 Nawe, abhaatu bhaaru bhanu bhakusuukwa ribhaga rinu, bhatakusukwa ribhaga rinu riku-uza. Na bhanu bhatakusukwa ribhaga rinu, bharasuukwa ribhaga rinu rikuuza.”

20

Ekerenjo chu ukuriha abhahocha

¹ Yisu akang'eha kugamba, “Ubhatimi bhwa mwisaaru bhutuubhini na wu umugundu, wanu aahurukiri ritabhuri ziri kuja koha abhaatu emeremo mumugundu gwazi gwi imizabhiibhu.

² Hanu aamariri kwigwana nabhu kubha abharihi wumwi wumwi amarihi gu urusiku rumwi,* akabhatuma mumugundu.

³ “Hanu yaahikiri zisa isatu ritabhuri, akahuruka kuja mwisoko, akarora abhaatu abhandi bhiimiiriiri bhataana moremo.

⁴ Akabhabhurira, ‘Na niimwi muji mohoché mumugundu gwani gwi imizabhiibhu, nirabhariha ichanyu.’

⁵ Bhusi bhakaja.

“Mmbe hanu yaahikiri mumwise, akahuruka kuja kubhaha abhandi emeremo mumugundu gwazi. Na zikahita zisa isatu, akakorabhu naatu.

⁶ Hanu yaahikiri isa ikumi na yimwi rigoroobha, akahuruka naatu kuja mwisoko, akabhona abhandi bhiimiiriiri. Akabhabhuurya, ‘Ndora mwimiiriiri hanu urusiku rugima mataana moremo?’

⁷ “Bhakamugarukirya, ‘Ni-ku kubha atareeho wanu atuhiri emeremo.’

“Akabhabhurira, ‘Na niimwi muji mokore emeremo mumugundu gwi imizabhiibhu.’

⁸ “Makabhuribhuri, umwene mugundu akabburira umwimiiririri we emeremo, ‘Bhirikira abhahocha busi, ubharihi amarihi

* **20:2 Amarihi gu urusiku rumwi** kuzisiku ziyo, yaari idinaari yimwi.

gaabha, utangi na bhanu bhaarumusiiri na kamariirya na bhanu bhaakangatiri.’

⁹ “Neho abhahocha bhanu bhaatangiri emeremo rigoroobha, bhakaaza bhakahaabhwa amarihi gu urusiku ramwi.

¹⁰ Hanu abhahocha bhanu bhaatangiri emeremo ritabhuri bhiiziri, bhakakina bhararihwa nzaru kukira abhakindichabha bhanu bhaarumusiiri. Nawe wamwiwamwi akarihwa zimpirya ziryazirya za amarihi gu urusiku ramwi.

¹¹ Hanu bhaarihirwi amarihi gaabha, bhakatanga kwibheerya kwa wu umugundu

¹² bharabhuga, ‘Abhaatu bharya bhaarumusiiri, bhakuriri emeremo kwi isa yimwibhu! Ibihiribhwi uturihiri kiring’ini nabha, inu itwi tukuriri emeremo imikung’u bhukung’u ne endekeera itusiriiriku ryabha nyangima?’

¹³ “Wu umugundu akagarukirya wamwi mubhahocha bhayo, ‘Musaani waani, nikiiri kukukangirirya chuchusi. Awii, tutiisiriririin’yi kubha urakora emeremo kamarihi gu urusiku ramwi?

¹⁴ Gega zimpirya zaazu uji. Inyi nisiigiri kamariha umutu wa mutinira amarihi kiring’ini na gaazu.

¹⁵ Nangu, nitakwisiriribhwa kokorera zimpirya zaani chimbu nikwenda? Hamwi una rihari ku kubha inyi muhurucha bhukung’u kubhandi?”

¹⁶ Yisu akamariirya kwa kugamba, “Nawe, abhaatu bhaaru bhanu bhakusuukwa ribhaga rinu, bhatakuusukwa ribhaga rinu rikuuza. Na bhanu bhatakuusukwa ribhaga rinu, bharasuukwa ribhaga rinu rikuuza.”

Yisu aragamba rwa katatu iguru wu ukukwa nu ukuryuka kwazi

(Maaroko 10:32-34; Ruuka 18:31-34)

¹⁷ Hanu Yisu aari munzira araja Yirusarimu, akagega abhiga bhaazi ikumi na bhabhiri rusiza, akabhabhurira,

¹⁸ “Rora, turaja Yirusarimu. Iyo, Umwana wu Umuntu aragwatwa na kuhirwa kubhaku bha abhakuhaani na abhija bhi imigira ja Musa. Bhayo bharatinira iitwi.

¹⁹ Akumara, bharamuhira kuBharuumi koreke bhamorege, bhamoteme imizariti na komotemerera kumasarabha. Nawe urusika rwa katatu, Mungu aramurya.”

Umukuru ahokerye bhanu akukangata

(Maaroko 10:35-45)

²⁰ Neho, umukari wa Zebhedaayo akaaza kwa Yisu hamwimwi na abhaana bhaazi bhabhiribhu,[†] akahigama mubhutangi bhwazi, akamubabha amokorere kegero kimwi.

²¹ Yisu akamubhuurya, “Oreenda nekokoreki?”

Wusi akamugarukirya, “Nirasabha ubhiisiririyi abhaana bhaani bhanu bhabhiri, bhiikari hamwimwi na naawi mubhutimi bhwazu, wumwi urubhaara rwu ubhurya nu wundi urubhaara rwu ubhamusi.”

²² Yisu akamugarukirya, “Mutizi kinu mukusabha. Nangu, muratara kunywa ekekombe chi inyaaku kinu nikunywa?”

Bhakamugarukirya, “Turatara.”

[†] **20:20 Abhaana bhaazi bhabhiribhu**, bhaari ni-Yaakobho na Yoohana. Rora Mataayo 10:2.

23 Yiesu akabhabhūrira, “Maheene murakinywira ekekombe chi inyaaku yinu inyi nikunyaaka, nawe kwikara urubhaara rwani rwu ubhuryu hamwi rwu ubhamusi gitari emeremo jani kubhiisiririrya. Umweya guyo ni-kubhanu Bhaabha amariri kokonzera.”

24 Hanu abhiiga abhandi ikumi bhiigwiri gayo, bhakiigatanira abhakindichabhu bhabhiri bhayo.

25 Neho Yiesu akabhabhirikira bhamusi hamwimwi, akabhabhūrira, “Mwizi kubha abhakangati bhi ibhyaru bharakangata abhaatu bhaabhu kwa amanaga, na abhakuru bhaabhu bharabhahocha emeremo.

26 Nawe itaaza ikabhabhu kwa niimwi. Umuntu wanu akwenda kubha umukuru waanyu, areenderwa kubha omohocha waanyu.

27 Naatu, umuntu wanu akwenda kubha we embere gati waanyu, areenderwa kubha mbusa waanyu.‡

28 Chimburya, Umwana wu Umuntu atiiziri kuhukiribhwa, nawe akaaza kohokerya abhaatu na kuhurucha ubhuhuru bhwazi bhabhi ubhutuurya kubhaatu abhaaru.”

*Yiesu arahorya abhahuku bhabhiri
(Maaroko 10:46-52; Ruuka 18:35-43)*

29 Hanu Yiesu na abhiiga bhaazi bharuuri murubhiri rwa Yiriko, riribhita ikuru rya abhaatu rikamutuna.

30 Rusizu wi inzira yinu Yiesu aari akuhita, bhaareho abhahuku bhabhiri. Hanu bhiigwiri kubha Yiesu arahita hayo, bhakabhirikira kwiraka

‡ 20:27 Rora Yoohana 13:12-17.

ikuru, “Umukuru, Umwana wu umutimi Daudi, otororere ibhigangi!”

³¹ Riribhita rya abhaatu rikabhahaarira kubha bhakiri, nawe ebho bhakakaja kubhirikira kwiraka ikuru, “Umukuru, Umwana wu umutimi Daudi, otororere ibhigangi!”

³² Yisu akiimurira, akabhabhirikira, akabhabhuurya, “Moreenda nibhakorereki?”

³³ Abhahuku bhayo bhakamugarukirya, “Umukuru, toreenda torore!”

³⁴ Neho Yisu akabharorera ibhigangi, akabhakun'yaku amisu gaabha. Hayohayo, bhakarora, nabha bhakamutuna.

21

*Yisu arasung'aanwa Yirusarimu ncha Masiya
(Maaroko 11:1-11; Ruuka 19:28-40; Yoozana
12:12-19)*

¹ Hanu Yisu na abhiga bhaazi bhiisimuri Yirusarimu, bhakahika murubhiri rwa Bhitifagi kukiguru chi Imiziyituuni. Neho Yisu akatuma abhiga bhaazi bhabhiri, akabhabhurira,

² “Muji murubhiri ranu rore embere waanyu. Hanu mukusikiramu, murarora itikiri nu umwana wayu zibuhirwi. Muzitazuri, mondeetere hanu.

³ Nu umuntu wuwusi araabhabhuuryi, mugarukiriyi, ‘Umukuru arazeenda,’ hayohayo wusi arabhiisiririrya muuzi nazu.”

⁴ Gayo gaakuriibhwi, korereke gabhi amang'ana ganu Mungu aagambiri kuhitira umurutiriri waazi,

⁵ “Ubhuriri abhaatu bha Sayuuni,*

* **21:5 Sayuuni** ni-riina irindi rya Yirusarimu.

‘Rora, umutimi waanyu araaza kwa niimwi,
ni-munyuuhu,
araaza iikiiri kutikiri,
ni ikimuri chayi.’”†

6 Mmbe, abhiga bhaazi bhakaja, bhakakora chimbu Yisu aabhatumiri.

7 Hanu bhaagarukiri kwa Yisu ni itikiri yirya nu umwana wayu, bhakaara zengebho iguru waazi, na Yisu akiikara iguru wayu.

8 Abhaatu bhaaru kwiribhita riyo, bhakaara zengebho zaabhu kunzira. Abhandi bhakatina ibhisha bhyi imiti na kwara kunzira iguru wu ukusuka Yisu.

9 Abhaatu bhanu bhaangatiri embere na bhanu bhaari inyuma, bhakatiirya riraka bharabhuga,

“Akumibhwi Umwana wu umutimi Daudi!

Anu urubhangu wanu akuuza kuriina ryu Umukuru!‡

Akumibhwi Mungu wa mwisaaru!”

10 Hanu Yisu aasikiiri murubhiri rwa Yirusariimu, urubhiri rwasi rukiitiimaata. Abhaatu bhakiibhuurya, “Ni-wiwi wuyo?”

11 Abhaatu kwiribhita riyo bhakagarukirya, “Wanu ni-Yisu! Ni-murutiriri wa Nazariti mucharu cha Gariraaya!”

Yisu araheebha abhasuruja mwihekaaru

(Maaroko 11:15-19; Ruuka 19:45-48; Yoozana 2:13-22)

12 Yisu akasikira mwihekaaru. Akaheebhera igutu abhaatu bhanu bhaari bhakugurya na kugura ebhegero. Akabharingura zemeza

† 21:5 Rora Zaakariya 9:9. ‡ 21:9 Rora Zabhuri 118:26.

za bhanu bhaari bhakukiran'ya zimpirya ni ibhitumbi bhya bhanu bhaari bhakugurya ibhiguuti.

¹³ Akabhabhuruira, “Yandikirwi muMaandiku Amarindu, ‘Inyumba yaani irabha inyumba ya amasabhi.’§ Nawe imwi muyikuriri kubha ribhigi rya abhasaakuri.”*

¹⁴ Mmbe, hanu Yisu aari akiiri mwihekaaruru, abhahuku na amagata bhakaja kwawi, wuusi ak-abhahorya.

¹⁵ Nawe hanu abhakuru bha abhakuhaani na abhiija bhi imigiru ja Musa bhaaruizi ibhisigu bhinu Yisu aari akokora, na kwigwa ganu abhaana bhaari bhakugamba kwiraka mwihekaaruru, “Akumibhwi Umwana wu umatimi Daudi,” bhakigitana bhakung'u.

¹⁶ Bhakamubhuurya, “Nangu, uriigwa chimbu abhaana bhayo bhakubhuga?”

Yisu akabhagarukirya, “Hee niriigwa. Awii makiiri kosoma amang'ana ganu gaandikirwi muMaandiku Amarindu, ‘Wikuiri ubhukumya, kuhitira iminywa ja abhaana abhasuuhu na abhabhataari’?”

¹⁷ Yisu akabhatiga hayo, akarwa Yirusarimu, akaja kuhindira murubhiri rwa Bhitaniya.

*Yisu ariihiima umati gunu gutaana imisumu
(Maaroko 11:12-14, 20-24)*

¹⁸ Ritabhuri ryaho, hanu aari aragaruka Yirusarimu, inzara ikamurya.

§ 21:13 Rora Isaaya 56:7. * 21:13 Rora Yirimiya 7:11. † 21:16 Rora Zabhuri 8:2.

19 Akarora umutiini rusizu wi inzira. Akagwisukira, akabhona gutaana imisumu, nawe guna amatutu ageene. Akagubhuurira, “Awi utakwibhura imisumu naatu kemerano!” Hayohayo, umutiini gukuma.

20 Hanu abhiga bha Yisu bhaaruzibhu, bhakarugura bhukung’u. Bhakamubhuurya, “Tbhiribhwi rogenderumwi umati gunu gwumiri?”

21 Yisu akabhagarukirya, “Nirabhabhuurira amaheene, ariibhi munu ubhwisirirya bhana bhutaana makibhwi, muratura kugakora. Itari ryu umutiini guyo iryene, nawe nuru muraabhuuriri ikiguru kinu, ‘Ihika wiitaashi manyanza,’ rirabha.

22 Ariibhi munu ubhwisirirya, chuchusi kinu makusabha kwa Mungu, murabhona.”

*Ribhuurya iguru wu ubhunaja bhwa Yisu
(Maaroko 11:27-33; Ruuka 20:1-8)*

23 Yisu akasikira naatu mwihekaaruru. Hanu aari ariija, abhakuru bha abhakuhaani na abhakaruka bha Abhayaahudi bhakamujaku kumubhuurya, “Ganu okokora, urakora kwa bhunajaki? Ni-wiwi wenu akuhiri ubhunaja bhuyo?”

24 Yisu akabhagarukirya, “Na ni-inyi nirabhabhuurya ring’ana rimwi. Muraangaruchiriyi riyo, na niinyi nirabhabhuurira, nirakora gayo kubhunaja bhwa wiwi.

25 Awi, ubhunaja bhwa Yoohana bhwa ukubhatiiza, bhakarwa hayi? Bhakarwa kwa Mungu kisha kubhaatu?”

Bhakiibhuurya abheene kobheene bharabhuga, “Turaabhugi, ‘Bhakarwa mwisaaru,’ aratubhuurya, ‘Ndora matamwisiriiriyi?’

26 Na turaabhugi, ‘Bhakarwa kubhaatu,’ turubhaha riribhita rya abhaatu bhanu, ku kubha bhushi bhariisirirya kubha Yoohana aari umurutiriri.”

27 Neho bhakamugarukirya, “Tutizi.”

Wushi akabhabhurira, “Na niinyi nitakubhabhurira nirakora amang’ana ganu kwa bhunajaki.”

Ekerenjo chu umwana umwigwa na wanu atakwigwa

28 Yisu akang’eha kugamba, “Nangu, murarorabhwu iguru we ekerenjo kinu? Aareho umutu wumwi wanu aari na abhaana bhabhiri. Akaja kumwana we embere, akamubhurira, ‘Mwana waani, reero nuuji okore emeremo mumugandu gwi imizabhiibhu.’

29 “Umwana wuyo akamugarukirya, ‘Nitakuja!’ Nawe hanu aachuriri amiisigi gaazi, akaja.

30 “Neho wiisi akaja kumwana wa kabhiri na kamubhurira chimbu aabhuuriiri uwandi wurya. Wushi akamugarukirya, ‘Niraja bhaabha!’ Nawe atagiiri.

31 “Nangu, kwa bhabhiri bhayo, ni-wiwi wanu aakuriri chimbu wiisi iindiri?”

Bhakamugarukirya, “Ne-we embere wurya.”

Neho Yisu akabhuga, “Nirabhabhurira amaheene, abharihya bha riguti na abhasimbi rikurira bharabhakangatira kusikira mubhutimi bhwa Mungu.

32 Yoohana akaaza kwa niimwi korereke abheerekeereye inzira ye eheene, na niimwi mutiisiriiri. Nawe abharihya bha riguti na abhasimbi rikurira nebho bhaamwisiriiri.

Nuru imwi hanu mwaruuzi guusi gayo, mukaanga kuchura amiisigi gaanyu na kumwisirirya.

Ekerenjo cha abharimi abhabhi

(Maaroko 12:1-12; Ruuka 20:9-19)

³³ “Mwitegeerere ekerenjo ikindi. Aareho umuutu wamwi wanu aari na umugundu. Mumugundu muyo, akahamba imizabhiibhu, akagwinaarya urubhagu akatuka riruma gatigati ryu ukukamira amanzi ga zizabhiibhu, naatu akumbaka ikikungu ikirihu cha abhariibhi mumugundu. Akakudishirya abharimi. Ewe akaja icharu ikindi.

³⁴ “Hanu ribhaga ryo okogesa ryahikiri, umwene umugundu akatuma bhambuusa bhaazi kwa abharimi, korereke bhamogegere imisumu jazi.

³⁵ Nawe hanu bhambuusa bhaazi bhaahikiri, abharimi bhayo bhakabhagwata, uwamwi bhakamotema, wundi bhakamwita na wundi bhakamotema na amabhw.

³⁶ Umwene umugundu akatuma naatu bhambuusa abhandi, bhaaru kukira bhanu aatumiri embere. Abharimi bhayo bhakabhakorera muryamurya, chimbu bhaabhakuriri bhe embere.

³⁷ Itiniru, akatuma umwana waazi, akiiseega, ‘Bharasuka umwana waani.’

³⁸ “Nawe hanu abharimi bharya bhaaruzi umwana wuyo, bhakiibhurira, ‘Wanu newe umugabhi wu umugundu gnu. Tumwiti korereke togogege.’

³⁹ Mmbe, bhakamugwata, bhakamuhira igutu wu umugundu, bhakamwita.”

40 Yiesu akabhabhuurya, “Nangu, hanu wu umugundu araagaruki kurwa orogendo rwazi, arakorabhwĩ abharimi bharya?”

41 Bhakamugarukirya, “Arabharicha kibhi abhabhi bhayo, nu umugundu arabhaha abharimi abhandi, bhanu bhakomoha imisumu jazi kwa ribhaga.”

42 Neho Yiesu akabhabhũrira, “Mũkĩri kosoma ganu gaandikirwi muMaandiku Amarindu?

‘Riibhwĩ rinu abhũmbaki bhaangiri,

neryo ribhĩri riibhwĩ rikuru rya rusizu.†

Umakuru newe akuriri riyo,

naryu ni-ring’ana ryu ukurugũra mumiisu giitu.’§”

43 Akoongera, “Nirabhabhũrira, Mungu ararusha ubhũtĩmi bhwazi kwa niimwi na kubhaha abhaatu bhi ibhyaru ibhĩndi bhanu bhakuhurucha imisumu iguru waazi.

44 Mmbe, umuutu wuwuusi wanu akubha agwiriiri riibhwĩ riyo, arabhunikabhunika. Na wuwuusi wanu riibhwĩ riyo riraamugwiri, riramusha bhoseeseka.”

45 Hanu abhakuru bha abhakuhaani na Abhafarisaayo bhiigwiri ebherenjo bhyazi, bhakoobhoora kubha nebho bhakugambirwa.

46 Bhakamohya inzira yu ukumugwata, nawe bhakubhaha riribhita rya abhaatu, ku kubha ebho bhakamenya Yiesu ni-murũtiriri.

† 21:42 **Riibhwĩ rikuru rya rusizu** ryari rereenderwa kuryambaka rya Abhayaahudi. Rikagwatan’ya nyiki ibhĩri na kugwatirira inyumba ngima. § 21:42 Rora Zabhuri 118:22-23.

22

Ekerenjo chu ubhuryakari

(Ruuka 14:15-24)

¹ Yiesu akang'eha kwija Abhafarisaayo na abhakuru bha abhakuhaani kokerenjo ikindi akabhuga,

² “Ubhutimi bhwa mwisaaru bhutuubhini nu umutimi wanu akuriri ubhuryakari bhu umwana waazi.

³ Akatuma bhambusa bhaazi bhaji kubhirikira bhanu aari araarikiri kubhuryakari, nawe bhushi bhakaanga kuuza.

⁴ “Neho akatuma bhambusa abhandi, akabhabhurira, ‘Muji mubhuriri bhanu naraarikiri, “Nikuriri ubhuryakari bhwani. Nisinziri zeng’ombe zaani zinuru hamwimwi ni imitugu igindi iminuru. Na bhyusi bhimbiri, muuzi kubhuryakari!’”

⁵ Nawe abhaatu bhanu bharaarikirwi, bhakaregana. Bhakaja komeremo jabhu, abhandi bhakaja mamugundu, na abhandi bhakaja kusuruja.

⁶ Abhandi bhakagwata bhambusa bhu umutimi, bhakabhatema na kubhiita.

⁷ Mmbe, hanu umutimi iigwiri ganu gakuriibhwi kwa abhahocha bhaazi, akiigatana bhukung’u. Akatuma abhasirikari bhaazi bharichi abhiiti bharya na kwocha urubhiri rwabhu.

⁸ “Akumara umutimi wuyo akabhabhurira bhambusa bhaazi, ‘Ebhegero bhyusi bhyu ubhuryakari bhimariri kokorwa, nawe abharaarikwa bhataari bhareenderwa kuuza.

⁹ Mmbe nangu, muji kunzira ya amahukana, mubhuriri bhubhushi bhanu mukurumana nabhu, bhaazi kubhuryakari.’

10 Bhambusa bhayo bhakaja kanzira, bhakagaruka na abhaatu bhanu bhaabharuuzi, abhabhi na abhazamu. Bhakasikira mwibhuru ryu ubhuryakari kuhika rikiizura.

11 “Nawe hanu umutimi aasikiiri mwibhuru ryi isigukuru korereke arore abhagini, akarora umutu wumwi wanu atiibhuhiri engebho yu ubhuryakari.

12 Akamubhuurya, ‘Musaani waani, ukasikirabhwu muna, inu utiibhuhiri engebho yu ubhuryakari?’ Nawe umutu wuyo akakira.

13 Mmbe, umutimi akabhuurira abhahocha bhaazi, ‘Momobhohe amaguru na amabhoko, morekere igutu mukiirimya. Iyo bhararira na kokepeha.’”

14 Yisu akamariirya kwa kugamba, “Abhaatu bhanu bhakubhirikirwa kusikira mubhutimi bhwa mwisaaru, ni-bhaaru, nawe bhanu bharubhwirwi kusikira, ni-bhasuuu.”

*Yisu arabhuuribhwa iguru wu ukuriha riguti
(Maaroko 12:13-17; Ruuka 20:20-26)*

15 Mmbe, Abhafarisaayo bhakiibhiringa kugambana chimbu bharaahaatyi Yisu kwa amang’ana gaazi.

16 Akumara bhakatuma abhiga bhaabhu hamwimwi na abhasakirya bha riribhita ryu umutimi Heroode Antipaasi* kwa Yisu. Hanu bhaahikiri bhakabhuurya Yisu, “Umwija,

* **22:16 Abhasakirya bha riribhita ryu umutimi Heroode Antipaasi** kuKigiriki ni-Bhaheroode. Abhaatu bhayo bhakiisirirya ubhukangati bhwa Abharuumi mucharu chabhu. Kamaragirira bhukung’u, rora ring’ana Heroode Antipaasi muKiniibhasa.

tuminyiri kubha awi ni-muutu we eheene na uriija amaheene iguru wa amang'ana ga Mungu. Utakwubhaha wawusi, nuru abhi nu umweya gwi iguru.

17 Nangu utubhuriri awi urarorabhi. Kuring'aana ni imigiru ja Musa, toreenderwa kuriha riguti kwa Kaisaari,† kisha ziyi?"

18 Nawe Yisu akamenya ubhubhi bhwabha, akabhagarukirya, "Abhabhihi imwi, kwaki murangema?

19 Monyeereche rizenzere rinu mukurihira riguti." Bhusi bhakamoha rizenzere rimwi.

20 Yisu akabhahhuurya, "Ipicha yinu ni riina rinu, ni-bhya wiwi?"

21 Bhakamugarukirya, "Bhya Kaisaari."

Yisu akabhahhurira, "Bhya Kaisaari mohe Kaisaari, na bhya Mungu mohe Mungu."

22 Hanu bhiigwiribhu, bhakarugura bhukung'u. Bhakamutiga, bhakabhuka bhakaja.

*Yisu ariija iguru wu ukurya abhaku
(Maaroko 12:18-27; Ruuka 20:27-40)*

23 Urusiku ruyoruyo, Abhasadukaayo obhorebhe bhakaaza kwa Yisu. Abhasadukaayo bhahija kubha Mungu atahaaryara abhaatu kurwa muruku. Noho bhakabhuru ya Yisu,

24 "Umwija, Musa akabhuga mumigiru jazi, ariibhi umuutu akuuri akiri kwibhura umwana, ereenderwa umuhiiri waazi agabhi umukari wu umuku wuyo, korereke amwibhuriri abhaana.‡

† 22:17 **Kaisaari** aari ni-mutimi wa Abharuumi, naatu newe aakangatiri icharu cha Izirairi kwibhaga rirya. Kamaragirira bhukung'u, rora Ikiniibhasa. ‡ 22:24 Rora Amahiitya gi Imigiru 25:5-6.

25 Mmbe, bhaareho abhahiiri muhungati. We embere akakwira umukari, akakwa akiri kwibhura. Umuhiiri waazi wa kabhiri akamugabha umukwirwa wuyo.

26 Umunyi waazi wuyo na wa katatu bhusi bhakakwa bhakiri kwibhura umwana nu umukwirwa wuyo. Ikabha ibhuibhu kabhahiiri muhungati bhayo bhusi, bhakakwa bhakiri kwibhura.

27 Itinira, umukari wuyo wusi akakwa.

28 Mmbe tubhuriri, urusiku ruru rukugambwa kubha abhaatu bhusi bhararyuka, umukwirwa wuyo arabha muka wiwi? Muhungati bhayo bhusi bhaari bhamukwiriri!"

29 Yisu akabhagarukirya, "Imwi murarimira bhukung'u, ku kubha mutizi Amaandiku Amarindu naabha ubhunaja bhwa Mungu.

30 Urusiku ruru abhaatu bhakuryuka, bharabha ncha bhamaraika bha mwisaaru, bhatakukwira naabha kukwirwa.

31 Nawe iguru wu ukuryuka kwa abhaku, mukiri kosoma muMaandiku Amarindu chimbu Mungu aabhabhuuriiri? Akabhuga,

32 'Inyi ni-Mungu wa Abhurahaamu, Iisaka na Yaakobho.'§" Yisu akang'eha kugamba, "Mmbe, Mungu ni-wa abhahuru, atari Mungu wa abhaku."

33 Hanu riribhita rya abhaatu bhiigwiri gayo, bhakarugura bhukung'u kwa amiija gaazi.

Riswaja rikuru kukira guusi

(Maaroko 12:28-34; Ruuka 10:25-28)

34 Hanu Abhafarisaayo bhiigwiri kubha Yisu aari ahiziri Abhasadukaayo kubhugambi bhwazi, bhakiibhiringa hamwimwi.

³⁵ Akumara, bhakaja kwa Yisu, na wumwi waabhu wunu aari umwija wi imigiru ja Musa, akagema komotega. Akamubhuurya,

³⁶ “Umwija, ni-iswajaki rikuru kukira amaswaja agandi guusi ga Mungu?”

³⁷ Yisu akamugarukirya, “‘Umusiigi Umukuru Mungu waazu kumwayu gwazu gwasi, kokoro yaazu yusi na kumang’ini gaazu guusi.’* ”

³⁸ Riswaja rinu neryo rikuru kukira amaswaja agandi guusi, naatu nego ganu ubhwindi kukira guusi.

³⁹ Ubhuswaja bhwa kabhiri bhutuubhini na bhuyo, nabhwu bharabhuga, ‘Umusiigi nyarubhiri waazu chimbu wisigiri aumwene.’†

⁴⁰ Imigiru jusi ja Musa na amija ga abharutiriri bhiriisega amaswaja abhiri gayo.”

Yisu arabhuurya Abhafarisaayo iguru wa Kiriisitu

(Maaroko 12:35-37; Ruuka 20:41-44)

⁴¹ Hanu Abhafarisaayo bhayo bhaari bhakiri bhiibhiringiri hamwimwi hayo, Yisu akabhabhuurya,

⁴² “Muriiseegabhwi iguru wa Kiriisitu, ni-mwana wa wiiwi?”

Bhakamugarukirya, “Ni-mwana wu umutimi Daudi.”

⁴³ Yisu akabhabhuurya, “Ariibhi gayo ni-ga amaheene, kwaki Daudi, hanu akukangatwa ne Egoro ya Mungu, aramubhirikira Kiriisitu, ‘Umukuru’? Akabhuga,

⁴⁴ ‘Umukuru Mungu akabhuurira Umukuru waani,

* **22:37** Rora Amahiityu gi Imigiru 6:5. † **22:39** Rora Abharaawi 19:18.

“Ikara urubhaara rwani rwu ubhuryu, hanu nikutwura abhabhisa bhaazu iyaasi wa amaguru gaazu.”[‡]

⁴⁵ Ariibhi Daudi aramubhirikira Kiriisitu, ‘Umukuru,’ nangu Kiriisitu araturabhwu kubha umwana waazi naatu?”

⁴⁶ Mmbe, atareeho umuntu wanu aaturiri kumugarukirya ryaryasi. Naatu kutangira hayo, atareeho umuntu wanu aagimiri kubhuurya Yisu amabhuurya agandi.

23

Yisu araangirija Abhafarisaayo na abhiija bhi imigiru ja Musa

(Maaroko 12:38-40; Ruuka 11:37-52, 20:45-47)

¹ Mmbe, Yisu akabhwurira riribhita rya abhaatu na abhiiga bhaazi kubha,

² “Abhiija bhi imigiru ja Musa na Abhafarisaayo bhanu ubhunaja bhu ukwija abhaatu imigiru ja Musa.

³ Kugayo, mugwati na mokore bhwaheene guhu si ganu bhakwija. Nawe mutabha muratuna amahocha gaabhu, ku kubha ebho bhatakokora ganu bhakwija.

⁴ Ebho bhahaabhoha imigiru imiritu* na kubhagegya abhaatu kumabhega, nawe abheene bhatakwenda kogorora nuru ichara korereke bhasakiryi.

[‡] 22:44 Rora Zabhuri 110:1. * 23:4 Yisu aratuubhan'ya **imiru imiritu** ni imigiru jasi gihu abhiija bhi imigiru ja Musa na Abhafarisaayo bhaatiri. Imigiru giyo jari mukung'u kubhaatu kugigwata, na kokekorera emeremo.

⁵ Na amahocha gaabhu guusi bhahaakora koreke bhiiyeereken'ye kubhaatu. Bhahoongera ibhitinika bhya amaseero ga amaandiku gi imigiru[†] kwibhoha kamabhoko na kubhushu bh-wabhu, na kwongera ripindu rya zengebho za-abhu za amasabhi[‡] zibhi ndihu kukira za abhandi.

⁶ Zisiku zi inyangi, bhahaasiiga kwikara kubhitumbi bhye embere bhya abhagini. Na mumarwaziru gaabhu, bhahaasiiga kwikara hanu abhakangati bhiikiri.

⁷ Naatu, bhahaasiiga bhukung'u bhakiribhwi momoteera kwa bhusuuku, na kubhirikirwa na abhaatu, 'Umwija.'§

⁸ "Nawe imwi, mutiisirirya kubhirikirwa 'Umwija,' ku kubha Umwija waanyu ni-wumwibhu, na niimwi bhusi, ni-bhamwimwi.

⁹ Naatu, mutabhirikira umutu wuwusi musi yinu 'Bhaabha,' ku kubha Wuusu ni-wumwibhu, wa mwisaaru.

¹⁰ Naatu, mutiisirirya kubhirikirwa 'Umukangati,' ku kubha Umukangati waanyu ni-wumwibhu, ewe newe Kiriisitu.

[†] 23:5 *Ibhitinika bhya amaseero ga amaandiku gi imigiru* bhikaandikwa amang'ana gi ibhitabhu bhitatu muBhuragi bhwi Ikari, Kukuruka 13:1-16; Amahiitya gi Imigiru 6:4-9, 11:13-21. Umusubhi Umayaahudi wi imyaka ikumi ni itatu aari ariibhoha ibhitinika bhiyo kubhushu na kokobhoko kwu abhamusi ribhaga ryusi ryu ukusabha. [‡] 23:5 Abhiija bhi imigiru ja Musa na Abhafarisaayo bhaari bharatuma *ripindu rya zengebho zaabhu za amasabhi* kubha irihu bhukung'u kobheerecha abhaatu kubha ebho bhagararaku bhukung'u mumiisu ga Mungu. Fihu itari chimbu Mungu aabhatumiri mumigiru. Rora Ukubhara 15:37-41; Amahiitya gi Imigiru 22:12. [§] 23:7 *Umwija* kuKigiriki ni-Raabhi.

11 Umuntu wawusi wanu akwenda kubha umakuru gati waanyu, areenderwa kubha omohocha waanyu.

12 Na wawusi wanu akwigungya umwene, Mungu aramwicha. Nawe wawusi wanu ak-wiyicha, Mungu aramugunga.

13 “Horeera imwi, abhiija bhi imigiru ja Musa na Abhafarisaayo, abhabhihi! Murabharecha abhaatu kusikira mabhatimi bhwa mwisaaru kwa amiija gaanyu. Imwi abheene mutakusikiramu, naatu mutakubhiisirirya bhanu bhakwenda bhasikiri.

14 “Horeera imwi, abhiija bhi imigiru ja Musa na Abhafarisaayo, abhabhihi! Murasabha amasabhi marihu bhakung’u korereke mwiyeereken’ye kwa abhaatu, nawe inu muraruusha abhakwirwa ebhegero bhyabhu. Mmbe, momenye kubha urusiku rwi itiniru, maheene muraahabha itiniru kuru bhakung’u.]

15 “Horeera imwi, abhiija bhi imigiru ja Musa na Abhafarisaayo, abhabhihi! Muriiruguura mucharu kigima ni inyanza, korereke mokorokombe umuntu wanu atari Umuyaahudi kubha umuhimba wi inyangi yaanyu. Nawe hanu mukumara komobhona, maramokora kubha umuntu wanu akwenderwa omorero gwa nyaari manga kabhiri kukira imwi!

16 “Horeera imwi, abhakangati abhahuku! Muriija abhaatu, ‘Ariibhi umuntu ariirahira iguru wa rihekaaru rya Mungu, ukwirahira kwazi kutari kegero. Nawe ariibhi ariirahira iguru wi izahaabhu yinu ihurukiibhwi mwihekaaru, ibhuhiri nu ubhwirahiri bhwazi.’

17 Bhageege imwi, na bhahuku! Kiguruki kinu ubhwera ubhukuru kukira ikindi, ni-zahaabhu yinu ihurukiibhwi mwihekaaru, kisha ni-rihekaaru rinu rekokora izahaabhu kubha ndindu?

18 Naatu muriija, 'Ariibhi umuutu ariirahiri iguru wa ahagero hu ukuhurukirya ikimweso mwihekaaru, ukwirahira kwazi kutari kegero. Nawe ariirahiri iguru wi ibhimweso bhinu bhiri ahagero hu ukuhurukirya ikimweso, abhahirwi nu ubhwirahiri bhwazi.'

19 Abhahuku imwi! Kiguruki kinu ubhwera ubhukuru kukira ikindi, ni ikimweso kisha ahagero hu ukuhurukirya ikimweso hanu hakokora ikimweso kubha kirindu?

20 Mmbe, wanu akwirahira iguru wa ahagero hu ukuhurukirya ikimweso, ariirahira ni-guru wi ibhimweso bhinu bhiri ahagero hu ukuhurukirya ikimweso.

21 Na wanu akwirahira iguru wa rihekaaru, ariirahira iguru wa rihekaaru na wanu akwikaramu.

22 Naatu, ariibhi umuutu ariirahira iguru wa risaaru, ariirahira iguru wi ikitumbi chi ikitimi cha Mungu nu umwene wanu akwikaraku.

23 "Horeera imwi, abhiija bhi imigiru ja Musa na Abhafarisaayo, abhabhihi! Muragwata imigiru ju ukuhurucha yimwi yi ikumi nuru kwe ebhegero bhyu ubhwera ubhusuuhu bhukung'u, ncha zendetere za amareke, ibhizaari na jira. Nawe, muratiga amang'ana amakuru gu ubhwera kumigiru ja Musa. Muratiga eheene, ibhigangi, na kubha umwisirirya kwa Mungu na kubhaatu abhandi. Nawe moreenderwa kugakora guusi amakuru na amasuuhu hamwimwi.

24 Imwi ni-bhakangati abhahuku, ku kubha marasuuza isuna, nawe maramira ingamiya!

25 “Horeera imwi, abhiija bhi imigiru ja Musa na Abhafarisaayo, abhabhihi! Muriikorya kubha, ni-bhaatu bhazumu mubhutangi bhwa Mungu. Morooja igutu we ekekombe ni isahaani, nawe maratiga kwoja muni, inu hiizwiri ebhegero bhinu mubhwini kwa kwibha na kutama kubha ne ekerengo.

26 Imwi Abhafarisaayo abhahuku! Mutigi hinga ubhabhi bhanu bhari muni waanyu, chimbu ukwoja hinga muni we ekekombe. Amahocha gaanyu gusi garabha mazumu, chimbu ekekombe kirabha chiru igutu kiribhi kizumiibhwi muni.

27 “Horeera imwi, abhiija bhi imigiru ja Musa na Abhafarisaayo, abhabhihi! Mwangi zimbihira zinu zihakirwi iswakara. Kwi igutu zirarorekana nzumu, nawe muni ziizwiri amaguha ga abhaku nu ubhubhuruuru bhwa zeteemwa zuni.

28 Ibhuihu na niimwi, kwi igutu mararorekana kubhaatu kubha bhe eheene mubhutangi bhwa Mungu, nawe mumiyyu janyu mwizwiri eng’eera na amabhi.

29 “Horeera imwi, abhiija bhi imigiru ja Musa na Abhafarisaayo, abhabhihi! Murumbaka zimbi-hira za abharutiriri na kotonera bhwaheene zimbi-hira za abhaatu abhandi bhanu bhaari bhe eheene mubhutangi bhwa Mungu.

30 Neho marabhuga, ‘Itwi twangabhiiriho ribhaga rinu bhasukuru bhitu bhaari bhahuru, tutaari twagwatana nabhu kwita abharutiriri bha Mungu.’

31 Ku kugambabhu, muramenyeekererya kubha na niimwi, ni-bhaana bha bhasukuru bhaanyu bhanu bhiitiri abharutiriri bha Mungu.

32 Mmbe, mukunaan'yi ubhubhi bhanu bhasukuru waanyu bhaatangiri!

33 Imwi urwibhuru rwe enzoka! Muraturabhwi kwibheza itiniru ya Mungu yo okorekerwa momorero gwa nyaari?

34 "Iguru wa riyo, rora, niratama kwa niimwi abharutiriri bha Mungu, abhaatu bha abhaminyi bha Amaandiku Amarindu, na abhija bhi imigiru ja Mungu. Nawe obhorebhe bhaabhu, murabhiita na kubhabhamba kumasarabha. Abhandi murabhatema imizariti mumarwaziru gaanyu, na abhandi murabhatuna hahusi harya muzimbiri na kubhanyaacha.

35 Kugayo, Mungu arabhatinira imwi ku kubha yu ukwita bhe eheene bhusi. Mukakorabhu, kwima hanu Kaini iitiri Abhuri wanu ataari nu ubhubhi bhwubhwusi, kuhika kwitwa kwa Zakariya, umwana wa Bharakiya, wanu iitirwi mwihekaaruru gati wa Ahagero Aharindu na hu ukuhurukirya ikimweso.*

36 Nirabhabhurira amaheene, Mungu aratinira abhaatu bhu urwibhuru ranu kwa amabhi gayo gusi."

*Yisu ararumika iguru wa Yirusarimu
(Ruuka 13:34-35)*

37 Neho Yisu akabhuga, "Awi Yirusarimu, Yirusarimu! Uriita abharutiriri na kubhatema amabhi bhanu bhaatumirwi kwa niimwi.

* 23:35 Rora Ubhutangi 4:8; 2 Amang'ana ga Amabhaga 24:20-22.

Niigumbiri manga kaaru kubhakuminga hamwimwi abhaana bhaazu, chimbu engoko ihaakuminga ibhizuri bhyayo mwapapa, nawe mutiindiri!

³⁸ Rora, Mungu aratiga umuji gwanyu itongo.

³⁹ Inyi nirabhabhurira, mutakondora kwiki kuhika ribhaga rinu muraabhugi, 'Anu urubhangu wanu akuuza kuriina ryu Umukuru Mungu!†"

24

*Yisu aragambira ukusaribhwa kwa rihekaaru
(Maaroko 13:1-2; Ruuka 21:5-6)*

¹ Yisu akabhuuka mwihekaaru. Hanu aari arahurukamu, abhiga bhaazi bhakamutuna korereke bhamwereche chimbu amakindasi ga rihekaaru gazumiri.

² Nawe Yisu akabhabhurira, "Muruzi bhwaheene amakindasi ganu guusi? Nirabhabhurira amaheene, ritareeho ibhwi rinu rikusaaga iguru wi irindi!"

*Yisu aragambira inyaaku yinu ikuuza
(Maaroko 13:3-13; Ruuka 21:7-19)*

³ Mmbe, Yisu akaja kukiguru chi Imiziyituuni akiikara. Abhiga bhaazi bhakamutuna kekoru, bhakamubhuurya, "Tubhuriri, amang'ana gayo garahuruka ryuri? Na ni-chirikin'yuki kinu kiri-itwereche ukugaruka kwazu nu ukuhika mutiniru wi isi?"

⁴ Yisu akabhagarukirya, "Mwangeriri, umutu wawusi ataaza kubhakangirirya!

† 23:39 Rora Zabhuri 118:26.

5 Abhaatu bhaaru bharaaza kuriina ryani, bharabhuga, 'Inyi ni-Kiriisitu,' na bharakangirirya abhaatu bhaaru.

6 “Ribhaga riyo, murabha muriigwa iguru wa riihi na amang’ana ga riihi. Mutakangwa, ku kubha gayo gareenderwa gakorwe, nawe itiniru yi isi irabha ikiri.

7 Icharu kimwi kiriitana ni ikindi, nu ubhutimi bhumi bhuriitana nu ubhundi. Inzara ni ibhirigitu bhyi isi bhirahuruka ahagero huri.

8 Gayo guri garabha chimbu ubhutangi bhu ubhusungu bhu umakari wanu akwenda kwibhura.

9 Ribhaga riyo, abhaatu bharabhiichura korereke muryaaki na kubhiita, na abhaatu bhi ibhyaru bhyuri bharabhabhihirirwa iguru waani.

10 Neho abhaatu bhaaru bharatiga kuntuna. Bharabha bhariiyanga na kwiigatanira abheene kobheene.

11 “Na bharabhoneka abharutiriri bhaaru bu urumi, bhanu bharaakangiriri abhaatu bhaaru.

12 Nu ubhugigi bhu abhaatu bhaaru bharasuuha, ku kubha ubhubhi bharaaruha.

13 Nawe wanu ariigumiriri kuhika itiniru, newe araasabuki.

14 Itiniru, Ing’ana Inzamu iguru wu ubhutimi bhu mwisaaru bhararwazibhu muzisi zuri. Kwa ribhaga rinu abhaatu buri bharabha bhabhwini umweya gu ukwigwa ubhuminyikiriri bhuyo, neho itiniru yi isi irahika.

*Zisiku zi inyaaku ikuru mucharu cha Yudeya
(Maaroko 13:14-23; Ruuka 21:20-24)*

15 “Ribhaga riyo, murarora ubhururu bhanu umarutiriri Danyiri aabhugiri ubhusarya.

Murarora bhwimiiriiri Ahagero Aharindu ha rihekaar*. Umuntu wuwusi wanu akosoma amang'ana ganu, amenye enzobhooro yaku.

16 Neho abhaatu bhanu bhari Yudeya, bhang'osere mubhiguru.

17 Umuntu wanu ari iguru kukisara chi inyumba, atiika korereke agege ebhegero bhinu bhiri munyumba, ang'ose.

18 Na wanu akubha mumugundu ang'ose, atiichura inyuma kogega zengebho zaazi.

19 Tarabharorera ibhigangi abhakari bhanu bharinda na bhanu bhakubha bharakoocha zisiku ziyo.

20 Mmbe, musabhi Mungu kubha kuryara kwanyu kutaaza kubha ribhaga rye embeho ihaari hamwi kurusiku rwu ubhuturu.

21 Maheene, zisiku ziyo, abhaatu bharabhona inyaaku kuru bhakung'u. Inyaaku yinu, ikiiri kuhuruka kwima ubhutangi bhwi isi kuhika reero yinu. Na itakobhoneka kwiki yindi.

22 Angabhiiri Mungu atasuuha zisiku ziyo, ataari areho umuntu wuwusi wanu aari akusabhuka. Nawe arasuuha zisiku ziyo, iguru wa abharobhorwa bhaazi.

23 "Mmbe, ribhaga riyo, umuntu wuwusi araabhaturiri, 'Rora, Kiriisitu ari hanu!' hamwi, 'Ari irya!' mutiisirirya.

24 Bharabhaho abharutiriri bhu ururimi na abhaatu bhanu bhakwibhikirira Kiriisitu. Bharereken'ya ibhyirikin'ya bhyaru na amateemo korereke bhageme kurimirya abhaatu, iriturikani nuru abharobhorwa bha Mungu.

* 24:15 Rora Danyiri 9:27, 11:31, 12:11.

25 Mubhi miisu! Nibhabhuuriiri bhwangu guusi gayo gakiiri kuhuruka.

26 Mmbe abhaatu bharaabhabhuuriri, ‘Rora, Kiriisitu ari mwitirigu irya!’ mutajayu. Hamwi bharaabhabhuuriri, ‘Rora, yibhisiri munyumba muyo!’ mataaza kubhiisirirya.

27 Momenye kubha ukuuza ku Umwana wu Umautu, karabha kwa kutacha. Irabha chimbu urakubha ruhaarorekana rogendo rumwi ruguru na nyanza.

28 Ahagero hi ikitundu, neho zimatunyizi zikwibhiringa.

Yisu aragambira ukugaruka kwazi

(Maaroko 13:24-37; Ruuka 21:25-33, 17:26-30, 34-36)

29 “Mmbe, hanu inyaaku ya ribhaga riyu irahitibhu, iryubha rirabha ni ikiirimya, umwiri gutakuhurucha ubhwiru naatu, na zenzota zusi ziragwa haasi kurwa mwisaaru. Ebhegero bhyasi bhya mwisaaru bhirasingisa.†

30 “Neho, ichirikin’yu chu Umwana wu Umautu kiraarorekani mwisaaru, ni ibhyaru bhyasi bhiratanga kurira kubhwubha. Hanu nikuuza, abhaatu buusi bharandora mamasaru na zinguru nu ubhukuru.

31 Neho aratuma bhamaraika bhaazi. Bharatema rihembe bhukung’u, korereke bhabhiringi abharobhorwa buusi bha Mungu kurwa mbaara zusi inyi zi isi. Nabhu bharaaza kurwa mutiniru yu urubhaara rumwi rwi isi kuhika mutiniru yu urubhaara urundi.”

† 24:29 Rora Isaaya 13:10, 34:4; Yuwiri 2:10.

32 Yisu akang'eha kugamba, “Mwigi kurwa kumuti gwu umutiini. Hanu mokorora ibhisha bhirasibhuka na amatutu gabhariryi, maramenya kubha ribhaga rya rigesa rirariiri.

33 Ibhuibhu, hanu muraarore gayo guusi gatan-giri, momenye kubha ari haguh kuuza.

34 Nirabhabhurira amaheene, ribhaga ryu ur-wibhuru rana ritakuhita kuhika gayo guusi gakorwe.

35 Risaaru ni isi bhirahita, nawe ing'ana yaani itakuhita kemerano.

36 “Nawe, iguru wu urusiku na ribhaga ryu ukuuza, atareeho umutu wanu yizi. Naabha bhamaraika bha mwisaaru hamwi Umwana bhusi bhatiizi, nawe Bhaabha umwenebhu.

37 Kuriyo, ukuuza ku Umwana wu Umutu karabha chimbu yaari zisiku za Nuuhu.

38 Ribhaga rinu imbura ya riteemo yaari ikiiri kuuza, abhaatu bhaari bhararya na kunywa, bharakwira na kukwirwa, kuhika urusiku rana Nuuhu aasikiiri masafina.

39 Abhaatu bhayo bhataaminyiri niki kikubha, kuhika hanu riteemo rya amanzi ryiziri na kubhiita bhusi. Ibhunimbu iribhi hanu Umwana wu Umutu ariizi.

40 Ribhaga riyo, abhaatu bhabhiri bharibhi mamugundu, Umwana wu Umutu aragegaho uwumwi na kutiga wundi.

41 Na abhakari bhabhiri aribhi bharasha hamwimwi karubhwi, Umwana wu Umutu aragegaho uwumwi na kutiga wundi.

42 Mmbe motengeeze, ku kubha matiizi ni-rusikuki rana Umukuru waanyu ariizi.

43 “Nawe momenye bhwaheene ring'ana rinu,

wi inyumba angaminyiri ribhaga rinu umwibhi akuuza, aari aratengeeza, na ataari arahindira korereke umwibhi ataaza kohomora inyumba na kwibha.

⁴⁴ Nangu, na niimwi mubhi bhwaheene ibhaga ryasi, ku kubha Umwana wu Umuntu araaza ribhaga rinu mutakwisega.”

Ekerenjo cha mbusa omoheene
(Ruuka 12:41-48)

⁴⁵ Yisu akabhabhuurya abhiga bhaazi, “Mmbe, ni-wiwi mbusa omoheene na wa amang’ini? Ni-mbusa wunu umukuru waazi amutiri kubha umwimiiririri wa bhambusa abhandi munyumba yaazi, korereke abhi arabhaha ibhyakurya kwibhaga ryazi.

⁴⁶ Hakiriku mbusa wunu hanu umukuru waazi araagaruki kurwa orogendo arabhona arakora chimbu aamuswajiryi.

⁴⁷ Nirabhabhurira amaheene, umukuru waazi araturira omohocha wuyo abhi umwimiiririri we ebhegero bhyazi bhyasi.

⁴⁸ “Nawe mbusa umubhi ni-wunu ahiigambira mokoro yaazi, ‘Umukuru waani arakeezera kugaruka,’

⁴⁹ ahaatanga kotema bhambusa abhakindichazi, na kurya na kunywa amarwa hamwimwi na abhanywi.

⁵⁰ Umukuru waazi aragaruka urusiku ni isa yinu mbusa atakwiseega.

⁵¹ Aramotema kibhi na kumutura iribhita imwimwi na abhabhihi. Iyo bhararira na kokepeha.”

25

Ekerenjo cha abhaacha ikumi

¹ Neho Yiesu akabhabhūrira abhūga bhaazi ekerenjo ikindi, “Ribhaga riyo, ubhūtimi bhwa mwisaarū bharatuubhana na abhaacha ikumi, bhanū bhaagigiri ibhimuri bhyabhu kuja kusung’aana umukwiri.

² Bhataanū mwikumi bhayo, bhaari abhageege na bhataanū abhandi bhaari bha amang’ini.

³ Abhageege bhayo, bhakagega ibhimuri bhyabhu, nawe bhataagigiri na amaguta gu ukwongera.

⁴ Nawe bha amang’ini bhakagega ibhimuri bhyabhu, hamwimwi na amaguta gu ukwongera mubhimuri bhyabhu mobhegero.

⁵ “Hanū umukwiri aakiziiri kuuza, abhaacha bhayo bhūsi bhakasundagira, bhakahindira zen-dooro za turu.

⁶ Nawe ubhutiku gatigati, abhaatu bhakarigisa, ‘Rora, umukwiri araaza! Muuzi, mūhūrūki muji kumusung’aana!’

⁷ “Rogendo rumwi, abhaacha bhayo bhūsi bhakabhūka, bhakatenga ibhimuri bhyabhu.

⁸ Abhaacha abhageege bhakabhūrira bha amang’ini, ‘Turasabha mutusakiryi amaguta gaanyu hasuuhu, ku kubha ibhimuri bhyitu bhirarima.’

⁹ “Nawe bha amang’ini bhakabhagarukirya, ‘Ziyi, tutakutura kubhasakirya, ku kubha amaguta ganu tanagu, gatakutura kutwisa itwi na niimwi. Muji kubhanū bhakugurya amaguta, mwiguriri imubheene.’

10 “Hanu abhaacha abhageege bhaagiiri kugura amaguta, umukwiri akahika. Abhaacha bha amang’ini bhaari bhabhanwiri, bhakasikira hamwimwi nawe mubhuryakari, ikisiku kikiigarwa.

11 Akumara abhaacha abhageege bharya bhakagaruka, bhakabhona ikisiku chigiirwi. Neho bhakiimirira igutu bhakabhirikira, ‘Umukuru! Umukuru! Twiguriri!’

12 “Nawe umukwiri akabhagarukirya, ‘Nirabhabhurira amaheene, nitabhiizi imwi!’”

13 Yisu akamara kwa kubhuga, “Mmbe motengeeze, ku kubha mutiizi urusiku nuru isa yinu nikugaruka.”

Ekerenjo cha bhambuusa bhanu bhaahirwi zimpirya

(Ruuka 19:11-27)

14 Yisu akang’eha kuhurucha ekerenjo ikindi, akabhuga, “Nu ubhutimi bhwa mwisaaru bhutuubhini nu umutu wanu indiri kuja orogendo. Hanu aari akiiri kutanga orogendo rwazi, akabhabhirikira bhambuusa bhaazi, akabhaha ebhegero bhyazi korereke bhabhyimuriri.

15 Akabhaha bhambuusa buusi kuring’aana nu ubhanaja bhwabha. Akamoha we embere zitaranta* isaanu, wa kabhiri zitaranta ibhiri na wa katatu itaranta yimwi. Akumara akabhuuka.

* **25:15 Zitaranta** ni-zimpirya zi ikari. Itaranta yimwi yaari ya amarihi gi imyaka merongo ibhiri komohocha we emeremo.

16 “Hayohayo, wunū ahīrwi zitaranta isaanū, akaja nazū kusuruja na akobhona zitaranta izindi isaanū.

17 Ibhuiibhu, wunū aahīrwi zitaranta ibhiri, akaja nazū kusuruja na kobhona zitaranta izindi ibhiri.

18 Nawe wunū aahīrwi itaranta yimwi, ewe akaja akatuka umwobho na kurindira itaranta yū umukuru waazi.

19 “Hanū zaahitiri siku nzaru, umukuru waabhu akagaruka. Akabhabhirikira bhambūsa bhaazi, korereke ahitiri nabhu chimbu bhaakuriri ebhegero bhyazi.

20 Mbūsa wunū aahīrwi zitaranta isaanū, akaaza na zitaranta izindi isaanū, akamubhūrira umukuru waazi, ‘Umukuru, ukang’a zitaranta isaanū korereke nezekorere emeremo. Rora, nibhwini zitaranta izindi isaanū.’

21 “Umukuru waazi akamubhūrira, ‘Ukuriri bhwaheene bhukung’u. Awi ni-mbūsa mazu mu na moheene! Waari moheene kubhisuuhu bhinu nakuhiri, nangu nirakutura kubha umwimiiririri we ebhegero ibhyaru. Nauzi tozomerwe hamwimwi.’

22 “Mbūsa wunū ahīrwi zitaranta ibhiri, nawe akaaza na zitaranta ibhiri izindi, akabhūrira umukuru waazi, ‘Umukuru, ukang’a zitaranta ibhiri korereke nezekorere emeremo. Rora, nibhwini zitaranta izindi ibhiri.’

23 “Umukuru waazi akamubhūrira, ‘Ukuriri bhwaheene bhukung’u. Awi ni-mbūsa mazu mu na moheene! Waari moheene kubhisuuhu bhinu nakuhiri, nangu nirakutura kubha umwimiiririri we ebhegero ibhyaru. Nauzi tozomerwe hamwimwi.’

24 “Nawe mbūsa wūnū ahīrwi itaranta yimwi, akaaza na kumubhūrira umukuru waazi, ‘Umukuru, nikamenya kubha awi ni-mūtu mukung’u bhukung’u. Wahaagesa hanū utaahambiri, na kubhiringa hanū utaanyaragin’yi.

25 Nikūbhaha kurimirya itaranta yaazu, nikayitukira haasi. Nangu gega itaranta yaazu.’

26 “Umukuru waazi akamugarukirya, ‘Awi, ni-mbūsa mubhi na mutubhu! Ariibhi ukamenya kubha inyi nihaagesa hanū nitaahambiri na kubhiringa hanū nitaanyaragin’yi,

27 mmbe kwaki utantiiri itaranta yaani kubhasuruja? Sumba zibhwiri, hanū naari nikugaruka iwaani, naari niragega nzaru kukiraho.’

28 Neho umukuru waazi akaswaja abhandi, ‘Mogege itaranta yiyo, mohe mbūsa wūnū ana zitaranta ikumi.

29 Umūtu wūwūsi wūnū akokorera emeremo rinū nimūhīri, niramwongereerera maaru. Nawe umūtu wūwūsi wūnū atakokora emeremo amasuuhu ganū nimūhīri, nūru ikisuuhu kinū anachu, niramuruusha.

30 Mbūsa wūnū ataana bhwera. Momorekere igutu mukiirimya iyo karabha ni ikiriru na kokepeha.”

Itinirū ya abhaatū urusikū rwi itinirū

31 Yīsu akang’eha kugambana na abhiga bhaazi, akabhabhūrira, “Hanū Umwana wū Umūtu ariizi nū ubhukuru bhwazi, hamwimwi na bhamaraika bhūsi abharindu, neho ariikari nchū amatimi kukitumbi chazi, mūsi iiha.

32 Abhaatũ bhi ibhyarũ bhyũsi bhariibhiringa mubhutangi bhwazi.† Arabhaahũra nchu umuri-isha akwahũra zing'ũdu kurwa muzimburi.

33 Chimbu umuriisha ahaatũra zing'ũdu urubhaara rwazi rwu ubhuryũ na zimburi urubhaara rwazi rwu ubhumusi, ibhuibhu, wũsi arabhatũra abhaatũ abhandi urubhaara rwazi rwu ubhuryũ na abhandi urubhaara rwazi rwu ubhumusi.

34 “Neho Umutimi araabhabhũriri bhanũ bhari urubhaara rwazi rwu ubhuryũ, ‘Muuzi, bhanũ mũĩrwi urubhangũ na Bhaabha. Musikiri mubhutimi bhũnũ mwakũĩrwi kwĩma okoteemwa kwi icharũ.

35 Hanũ naari ni inzara, mukang'a ibhyakurya. Hanũ naari ne enyoota, mukang'a amanzi gu ukunywa. Hanũ naari umugini, mukanginihya.

36 Hanũ naari tũhũ, mukanyiibhohya. Hanũ naari murwiri, mukandwarya. Na hanũ naari mokebhoho, mukaaza kondora.’

37 “Ibhu, abhaatũ bhayo bhe eheene mubhutangi bhwa Mungu bharangarukirya kubha, ‘Umũkurũ, ni-ryuri twakũrũzi unĩ inzara tukakoha ibhyakurya? Hamwi one enyoota tukakoha amanzi gu ukunywa?

38 Na ni-ryuri twakũrũzi umugini tukakugini? Hamwi uri tũhũ tukakwibhohya?

39 Na ni-ryuri umurwiri tukakurwarya? Hamwi uri mokebhoho tũkaaza kokorora?’

40 “Neho Umutimi araabhagarukiryi, ‘Nirabhabhũrira amaheene kubha, ryũryũsi rinũ mwakũĩri wũwũsi gati wa abhahiiri bhanũ bhataana ubhwĩndi, mukankorera inyĩ.’

† 25:32 Rora Isaaya 66:18.

41 “Akumara, arabhabhaurira bhanu bhari urubhaara rwazi rwu ubhamsi, ‘Murwi hanu, imwi bhanu mwihiimirwi! Muji momorero gwa kemerano gunu aakurirwi Shitaani na bhamaraika bhaazi.

42 Murwi hanu, ku kubha hanu naari ni inzara, mtaang’iri ibhyakurya. Hanu naari ne enyoota, mtaang’iri amanzi gu ukunywa.

43 Hanu naari umugini, mutanginihiryi. Hanu naari tuhu, mutanyibhuhiryi. Hanu naari murwiri, mutiiziri kundwarya. Na hanu naari mokebhoho, mutiiziri kondora.’

44 “Neho abhaatu bhayo bhusi bharaan-garukiryi, ‘Umukuru, ni-ryuri twakuruzi uni inzara, hamwi one enyoota, hamwi waari umugini, hamwi waari tuhu, hamwi waari murwiri, hamwi waari mokebhoho, na tutakusakiiryi?’

45 “Neho arabhagarukirya, ‘Nirabhabhaurira amaheene kubha, ryurusi rinu mutakuriri wuwusi gati wa abhiisirirya wunu ataana ubhwindi, mutankuriri inyi.’

46 “Mmbe, abhakuri bhu ubhuhiri bhayo, bharaja kusikira munyaaku ya kemerano. Nawe bhe eheene, bharaja mubhuhuru bhwa kemerano.”

26

Abhakangati bha Abhayaahudi bhariiseemerya kwita Yisu

(Maaroko 14:1-2; Ruuka 22:1-2; Yoohana 11:45-53)

¹ Hanu Yisu aamariri kugamba amang’ana gayo guusi, akabhaurira abhiga bhaazi,

2 “Chimbu mwizi, ziraahiti siku ibhiri, turabha ni isigukuru yi Ipasaka.* Urusiku ruyo, Umwana wu Umwetu arahurukibhwa, korereke iitwi kumasarabha.”

3 Mmbe, ribhaga riyo, abhakuru bha abhakuhaani† na abhakaruka bha Abhayaahudi bhakiibhiringa munyumba ya kuhaani umukuru, iriina ryazi Kayaafa.

4 Muyo, bhakagambana chimbu bharaamugwati Yisu kwa mbisi, korereke bhamwiti.

5 Nawe bhakabhuga, “Tutaaza kokora ganu ribhaga ryi isigukuru yi Ipasaka, abhaatu bhataaza kokora ikimpugi.”

*Umukari arahaka Yisu amaguta
(Maaroko 14:3-9; Yoohana 12:1-8)*

6 Neho Yisu akaja murubhiri rwa Bhitaniya, akiikara munyumba ya Simuni wanu aari ne ebhegeenge.

7 Hanu Yisu aari kwigari, akaaza umukari wamwi kwewe ani ichupa inzamu ya amaguta ganu gaari gi iguri ikuru na garareetya bhwaheene. Umukari wuyo akamwitarurira Yisu kumutwi.

8 Hanu abhiga bhaazi bhaaruzi gayo, bhakiigatana. Bhakabhuga, “Ndora umukari wanu arasarya amaguta ga riguri ikurubhu?”

9 Yaari bhwaheene amaguta ganu gangaguriibhwi kuzimpirya nzaru bhukung’u, na kahaabhwa abhahabhi!”

* 26:2 **Ipasaka.** Kमारगिरा भुकुंग’u, rora Ikiniiibhasa. † 26:3 **Abhakuhaani.** Kमारगिरा भुकुंग’u, rora Ikiniiibhasa.

10 Yîisu akoobhoora ganu bhaari bhakwiseega, akabhabhuurira, “Ndora muranyaacha umukari wanu? Ewe ankuriri ring’ana rizamu bhakung’u.

11 Abhababhi manabha siku zûsi, nawe inyî nitakubha hamwimwi na niimwi ibhaga ryasi.

12 Umukari wanu anyitiriiri amaguta, korereke akonze umubhiri gwani ku kubhiikwa kwani.

13 Nirabhabhuurira amaheene, hûhûsi mubhyaru hanu abhaatu bhakubha bhararwaza ing’ana inzumu, bharabha bharagamba rinu umukari wanu aakuriri, kumuhiita.”

Yuuda Isikariyûti ariisirirya kumwichûra Yîisu (Maaroko 14:10-11; Ruuka 22:3-6)

14 Mmbe Yuuda Isikariyûti, wumwi wa abhîga bha Yîisu ikumi na bhabhiri, akaja kubhakuru bha abhakuhaani,

15 akabhabhuurya, “Murandihaki niraamugwatyî Yîisu mumabhoko gaanyu?” Akumara bhakamuriha zimpirya merongo itatu.‡

16 Kutangira ribhaga riyo, Yuuda Isikariyûti akatanga komohya umweya umuzumu gu ukumwichûra.

Yîisu ararya ipasaka na abhîga bhaazi (Maaroko 14:12-26; Ruuka 22:7-23; Yoohana 13:21-30; 1 Abhakurintu 11:23-25)

17 Kurusiku rwa ubhutangi rwi isigukuru yi imikaati Gînu Gitari Mitunduuru, abhîga bha Yîisu bhakaja kwawi, bhakamubhuurya, “Oreenda tuji hayi tokokorere ahagero hu ukurira ipasaka?”

18 Yîisu akabhaha iriina ryu umuutu omorebhe akabhuga, “Muji murubhiri rwa Yirusariimu

‡ 26:15 Rora Zaakariya 11:12; Mataayo 27:9.

kumuntu wuyo, mumubhauriri, ‘Umwija atutumiri na arabhuga, “Ribhaga ryani riri haguhi. Inyi na abhiga bhaani turarya Ipasaka munyumba yaazu.”’

¹⁹ Abhiga bhaazi bhakakora guusi chimbu Yisu aabhatumiri, bhakatenga ibhyakurya bhyi Ipasaka.

²⁰ Hanu ryahikiri rigoroobha, Yisu na abhiga bhaazi ikumi na bhabhiri bhakiikara kurya ibhyakurya.

²¹ Hanu bhaari bhararya, akabhabhurira, “Nirabhabhurira amaheene, wamwi waanyu aranyiichura.”

²² Abhiga bhaazi bhakarumika bhukung’u, bhakatanga kumubhuurya wamwi wamwi, “Umukuru, nangu niinyi?”

²³ Yisu akagarukirya, “Ni-wanu akokorya hamwimwi na niinyi mabhakuri, newe aranyiichuri.

²⁴ Maheene Umwana wu Umuntu araja kukwa, chimbu Amaandika Amarindu gakubhuga iguru waazi. Nawe, horeera kumuntu wanu ariichuri Umwana wu Umuntu! Yaari hakiriku kwewe atangibhwirwi!”

²⁵ Mmbe, Yuuda wanu aatiri Yisu mumabhoko ga abhabhisa, wusi akamubhuurya, “Umwija, nangu niinyi?”

Yisu akamugarukirya, “Naawi ubhugiri.”

²⁶ Hanu bhaari bhararya, Yisu akagega umukaati, akabhurira Mungu, azumiryi. Akagusunyura, akabhaha abhiga bhaazi, akabhuga, “Mogege muryi, ganu negwe umubhiri gwani.”

²⁷ Akumara, akagega ekekombe chi idivaayi, akabhurira Mungu, azumiryi, akabhaha arabhuga, “Mogege, munywi imwusi.

²⁸ Ganu nego amasaahi gaani gu ubhuragi, § ganu gakwitika iguru wa abhaatu bhaaru ku kuruushwa ubhubhi.

²⁹ Nirabhabhurira, nitakunywa naatu idivaayi kuhika hanu nikunywa bhuhya hamwimwi na niimwi mubhutimi bhwa Bhaabha.”

³⁰ Akumara bhakimba iryimba ryu ukukumya Mungu. Bhakabhuka hayo, bhakaja kukiguru chi Imiziyituuni.

*Yisu ararora kabha Peetero aramwanga
(Maaroko 14:27-31; Ruuka 22:31-34; Yoohana 13:36-38)*

³¹ Mmbe, Yisu akabhabhurira abhiga bhaazi, “Ubhutika bhwa reero, imwi bhusi murang’osa na kuntiga. Irabhabhu, chimbu Mungu aagambiri muMaandiku Amarindu, ‘Niramwita umuriisha, na riribhita rya zing’undu zaazi riranyaragana.’*

³² Nawe hanu nikuryuka, nirabhakangatira kuja Gariraaya.”

³³ Peetero akamubhurira, “Nangabha bhusi bharakutiga, inyi nitakukutiga zee!”

³⁴ Yisu akamugarukirya, “Nirakubhurira amaheene, ubhutika bhwa reero, ekorokome ikiri kugamba, urabha unyangiri manga katatu.”

³⁵ Peetero akamugarukirya, “Nangabha kukwa, nikwi hamwimwi na naawi, nitakukwanga zee!” Abhiga abhandi bhusi, bhakabhuga ibhuibhu.

§ 26:28 *Ubhuragi*. Kugaragira bhukang’u, rora ikiniibhasa.

* 26:31 Rora Zaakariya 13:7.

*Yisu arasabha Gitisimani
(Maaroko 14:32-42; Ruuka 22:39-46)*

³⁶ Mmbe, Yisu akaja na abhiiga bhaazi mubhusitaani yinu ikubhirikirwa Gitisimani. Akabhabhurira, “Mwikari hinga hanu, niji kusabha Mungu.”

³⁷ Akagega Peetero hamwimwi na abhaana bhabhiri bha Zebhedaayo. Akatanga kurumika na kunyaaka bhukung’u mokoro yaazi,

³⁸ akabhabhurira, “Ekoru yaani irumikiri bhukung’u ekerengo chu ukukwa. Mwikari hanu, motengeeze hamwimwi na niinyi.”

³⁹ Akiisuka embere hasuuhu, akagwa kibhumiri, akasabha Mungu arabhuga, “Bhaabha, ariibhi iraturikana, nirakusabha unduushiryi ekekombe chi inyaaku kinu! Itari chimbu inyi nikwenda, nawe gakorwe chimbu awi ukwenda.”

⁴⁰ Mmbe, Yisu akagaruka kubhiiga bhaazi, akabhabhona bhahindiiri. Akabhuurya Peetero, “Nangu, mutamirwi kotengeeza hamwimwi na niinyi nuuru kwi isa yimwi?”

⁴¹ Motengeeze na kusabha, mataaza kusikira mubhitiimotiimo. Ekoru iriisirirya, nawe umabhiri ni-munyuhiriru.”

⁴² Yisu akabhatiga, akaja iyo rwa kabhiri, akasabha arabhuga, “Bhaabha, ariibhi inyaaku yinu itakaturikana kurwa kwa niinyi, gakorwe chimbu ukwenda.”

⁴³ Mmbe, hanu aagarukiri kwabhu, akabhona kwiki bhahindiiri, ku kubha amisu gaabhu gaari maritu.

44 Akabhatiga, akaja kusabha rwa katatu, akagarukira kugamba amang'ana garyagarya.

45 Akumara akagaruka naatu kwa abhiga bhaazi, akabhabhurira, "Nangu muhindiri mwoyeere, rora! Ribhaga rihikiri rinu Umwana wu Umwetu aragwatwa na kuhirwa mumabhoko ga abhakuri bhu ubhubhi.

46 Mubhuki, tuji. Rora, wenu akunyichura ari haguhi."

Yisu aragwatwa

(Maaroko 14:43-50; Ruuka 22:47-53; Yoohana 18:3-12)

47 Hanu Yisu aari akiiri aragamba gayo, hayohayo Yuuda, wamwi wa abhiga bhaazi ikumi na bhabhiri, akaaza hamwimwi na riribhita ikuruya abhaatu bha amasabha na amarungu. Riribhita riyo rikatumwa na abhakuru bha abhakuhaani na abhakaruka bha Abhayaahudi.

48 Yuuda wenu aamwichuriri Yisu, aari akan-gatiri kuragirira abhaatu bhayo ichirikin'yu. Akabhabhurira, "Umwetu wenu niraahumbati, newe mugwati."

49 Hayohayo Yuuda akaja kwa Yisu, akamubhurira, "Umwija, morembe!" Akumara akamuhumbata.

50 Yisu akamugarukirya, "Musaani waani, kora kinu kikuriritiri."

Mmbe abhaatu bhayo bhakiisuka, bhakamugwata Yisu.

51 Nho wamwi mubhanu bhaari hamwimwi na Yisu, akasohora risabha ryazi, akatina ukutwi kwa mbusa wa kuhaani umukuru kutu.

52 Nawe Yisu akambhukurira, “Garucha risabha ahagero haaho, ku kubha bhushi bhanu bhakugwata risabha korereke bhiiti, bharakwa kwa risabha!

53 Nangu, utizi kubha niranaja kusabha ubhusakirya kwa Bhaabha, nawe aratara kuntumira bhamaraika kukira amaribhita amakuru ikumi na abhiri?

54 Hanu nangakuriribhu, garahikabhwi ganu gaandikirwi muMaandiku Amarindu kubha, nimbu gakwenderwa kuhuruka?”

55 Neho Yisu akabhukurira riribhita riyo, “Ndora mwiziri na amasabha na amarungu kungwata, nkina inyi ni-musaakuri? Zisiku zushi naari nirija mwihekaaruru, nawe mtaangwatiri!

56 Nawe gushi gakurirwi, korereke gahiki ganu abharutiriri bhaandikiri muMaandiku Amarindu.” Mmbe, abhiga bhaazi bhushi bhakaryara, bhakamutiga.

Yisu mubhutangi bhwi ichandarurikikuru cha Abhayaahudi

(Maaroko 14:53-65; Ruuka 22:54-55, 63-71; Yoohana 18:13-14, 19-24)

57 Mmbe, bhanu bhaamugwatiri Yisu, bhakamuhira kwa Kayaafa, kuhaani umakuru. Munyumba yaazi, inu bhaari bhiibhiringiri abhija bhi imigiruru ja Musa na abhakaruka bha Abhayaahudi.

58 Peetero aari aramutuna Yisu kwa kore, kuhika mukisiku chi inyumba ya kuhaani umakuru. Akasikira mushi, akiikara hamwimwi na abhariibhi korereke arore chimbu ikiina cha Yisu kikubha.

59 Abhakuru bha abhakuhaani ni ichandar[†] chusi, bhakamohya obhomenyeekererya bhwu ururimi korereke bhabhone inzira yu ukwita Yisu.

60 Bhakaaza abhaminyikiriri bhu ururimi bhaaru, nawe bhatabhwini.

61 Akumara bhakaaza abhaminyikiriri bhabhiri, bhakabhuga, “Umuntu wanu akabhuga, ‘Niranaja kwasha rihekaaru rya Mungu na kuryumbaka kwa siku isatu.’”

62 Akumara kuhaani umukuru akiimirira, akabhuurya Yisu, “Awi, utagarukirya ing’ana ryaryasi? Amang’ana ganu abhaatu bhanu bhakukugamba?”

63 Nawe Yisu akakira kiri.

Kuhaani umukuru wuyo akamubhurira, “Nirakwirahirya kuriina rya Mungu wu ubhuhuru, utubhuriri arubhi awi naawi Kiriisitu, Umwana wa Mungu.”

64 Yisu akamugarukirya, “Naawi ugambiri. Nawe nirabhabhurira, kutangira nangu, murarora Umwana wu Umuntu ikiiri urubhaara rwu ubhurya rwa Mungu wa Amanaga.[‡] Na muramorora araaza mamasaru kurwa mwisaaru.”[§]

65 Mmbe, hanu kuhaani umukuru iigwiri amang’ana gayo, akatarandura amiib-hoho gaazi, akabhuga, “Arigiri Mungu! Ni-bhamenyeekereryaki bhanu tukwenda? Mwigwiri abheene chimbu akorega Mungu!

66 Imwi murabhugabhwi?”

Bhakamugarukirya, “Areenderwa iitwi!”

[†] 26:59 *Ichandar*. Kugaririra bhakung’u, rora Ikiniibhasa.

[‡] 26:64 Rora Zabhuri 110:1. [§] 26:64 Rora Danyiri 7:13.

67 Akumara, bhakamutwira amati mubhushu, bhakamotema ibhikundi. Abhandi bhakamotema amaguuhu,

68 na kumubhurrira, “Awi Kiriisitu, orootorere, ni-wiiwi wanu akutimiri?”

Peetero araanga Yisu

(Maaroko 14:66-72; Ruuka 22:56-62; Yoohana 18:15-18, 25-27)

69 Mmbe, ribhaga riyoriyo, Peetero aari iikiri igutu mukisiku hayo. Neho omohocha wumwi wi ikikari akamujaku, akamubhurrira, “Na naawi waari hamwimwi na Yisu wa Gariraaya.”

70 Peetero akaanga mubhutangi bhwa abhaatu bhushi, akabhuga, “Nitiizi ganu ukubhuga!”

71 Hanu aari akurwa mukisiku, omohocha uwundi wi ikikari akamorora, akabhabhurrira bhanu bhaareho hayo, “Umuntu wanu aari hamwimwi na Yisu wa Nazariiti.”

72 Peetero akaanga kwa kwirahira, “Nitamwizi umuntu wuyo!”

73 Ibhaga isuuhi rikahita, abhaatu bhanu bhaari bhiimiiriiri hayo, bhakabhurrira Peetero, “Maheene, awi ni-wumwi wa bhanu bhari hamwimwi na Yisu. Nuru ukugamba kwazu koreereken’ya kubha urarwa Gariraaya!”

74 Peetero akatanga kwihiima bhukung’u, akiirahira, “Nitamwizi umuntu wuyo!” Hayohayo, ekorokoome ikagamba.

75 Neho Peetero akahiita amang’ana ganu Yisu aamubhuuriiri, “Ekorokoome ikiri kugamba, urabha unyangiri manga katatu.” Akumara, akahuruka igutu, akatanga kurira kwi isungu ihaari.

27

Yisu arahirwa kwa Piraato
(Maaroko 15:1; Ruuka 23:1-2; Yoohana 18:28-32)

¹ Hanu bhwakiri, abhaku bhushi bha abhakuhaani hamwimwi na abhakaruka bha Abhayaahudi bhakiisiriran'ya kubha bhamwiti Yisu.

² Akumara bhakamobhoha, bhakaja nawe kumukangati wi Ikiruumi wanu aari arabhirikirwa Piraato.

Yuuda ariing'eeta
(Amahocha ga Abhatumwa 1:18-19)

³ Mmbe Yuuda, wanu aamwichuriri Yisu, hanu aaruzi Yisu atiniirwi itwi, akiyigwa kibhi bhukung'u. Akagega zimpirya ziry merongo itatu na kuzigarucha kubhaku bha abhakuhaani na abhakaruka bha Abhayaahudi. Akabhabhura, "Nikiriri ubhumbi kumutura mamabhoko gaanyu umutu wanu ataana bhumbi bhumbhushi."

⁴ Nawe ebho bhakabhuga, "Gayo garatutun'yaki itwi? Ni-nyaaku yaazu aumwene."

⁵ Neho Yuuda akataasha zimpirya ziyo mukisiku cha rihekaaru, akaja, akiing'eeta.

⁶ Abhaku bha abhakuhaani bhakatoora zimpirya ziyo, bhakabhuga, "Ni-mugiru kusanja zimpirya ziyo na zimpirya za rihekaaru, ku kubha zirihirwi ku kwitira amasaahi gu umutu."

⁷ Mmbe, bhakagambana na kuhitya kogega zimpirya ziyo na kugura umugundu gwe ekesemo iguru wu kubhika abhagini.

⁸ Necho umugundu guyo gukubhirikirwa Umugundu gwa Amasaahi.

9 Neho rikabha ring'ana rinu umuruutiriri Yirimiya aandikiri, “Bhakagega zimpirya merongo itatu, ubhuguri obhorebhe bhanu Abhiizirairi bhiisirir'in'yi iguru wabhwi.

10 Bhakagura umugundu gwe ekesemo, chimbu Umukuru answajiryi.”*

*Yisu aragambwa mubhutangi bhwa Piraato
(Maaroko 15:2-15; Ruuka 23:1-3, 18-25;
Yohana 18:29-19:16)*

11 Neho Yisu akiimirira mubhutangi bhwu umukangati wi Ikiruumi. Umukangati wuyo akamubhuurya, “Awi naawi umutimi wa Abhayaahudi?”

Yisu akamugarukirya, “Awi ugambiri.”

12 Nawe hanu aagambirwi na abhakeru bha abhakuhaani na abhakaruka bha Abhayaahudi, ewe atabhagarukiiryi ryaryasi.

13 Neho Piraato akamubhuurya, “Nangu, utakwigwa gusisi ganu bhakugamba iguru waazu?”

14 Nawe Yisu atagarukiiryi nuru ring'ana rimwi. Umwanangwa akarugura bhukung'u.

15 Imyaka jusi ji isigukuru yi ipasaka, umwanangwa wi Ikiruumi aari ni isimuka yu ukutigurukira omobhohwa wumwi wanu abhaatu bhindiri.

16 Mmbe, ribhaga riyo, aareho omobhohwa wumwi wanu aari arabhirikirwa Bharaabha. Omobhohwa wuyo akamenyekana bhukung'u iguru wa amabhi ganu aari arakora.

17 Hanu abhaatu bhiibhiringiri, Piraato akabhabhuurya, “Ni-wiwi wanu mukwenda

* 27:10 Rora Yirimiya 19:1-13, 32:6-9; Zaakariya 11:12-13.

nibhatazuriri gati wa abhabhohwa bhabhiri bhanu? Bharaabha, hamwi Yisu wanu abhaatu bhakubhirikira Kiriisitu?”

18 Piraato akabhabhuuryabhu, ku kubha akamenya abhakuru bha Abhayaahudi bhakahira Yisu kwewe iguru we eng'eera yaabhabhu.

19 Mmbe, hanu Piraato iikiri kukitumbi chazi chi itiniru, mukaazi akamatumira amang'ana, “Utaaza komokorera ibhi ryuryusi umutu wuyo ataana bhabhi, ku kubha ninyaakiri bhakung'u ubhutiku mokerooto iguru waazi.”

20 Nawe abhakuru bha abhakuhaani na abhakaruka bha Abhayaahudi bhakakorokomba abhaatu bhasabhi Piraato abhatazuriri Bharaabha na kutinira Yisu korereke iitwi.

21 Piraato akabhabhuurya naatu, “Ni-wiwi wanu mukwenda nibhatazuriri gati wa abhabhohwa bhabhiri bhanu?”

Bhakamugarukirya, “Bharaabha!”

22 Piraato akabhabhuurya naatu, “Mmbe neko-rebhwi Yisu wanu akubhirikirwa Kiriisitu?”

Abhaatu bhasi bhakarigisa bharabhuga, “Mumubhambi kumusarabha!”

23 Piraato akabhabhuurya naatu, “Asariryiki?”

Nawe ebho bhakoongera kurigisa bharabhuga, “Mumubhambi kumusarabha!”

24 Hanu Piraato ubhuriri kubha atakutira kuchira amiisigi ga abhaatu bharya na kubha bhatangiri ririgi, akagega amanzi na kwisaabha amabhoko gaazi mubhutangi bhwabhu. Akakorabhu kwerecha kubha ataana isoro ryuryusi. Neho akabhabhurira, “Inyi nitaana bhabhi bhwabhwusi ku uruku rwa umutu wanu we eheene. Ring'ana rinu ni-guru waanyu imubheene!”

25 Abhaatu bhūsi bhakamugarukirya, “Risaahiryu uruku rwa Yisu ribhi igurw witu na abhaana bhitu!”

26 Akumara Piraato akatazura Bharaabha, na akaswaja abhasirikari korereke bhateme Yisu imizariti na kumbhamba kumasarabha.

Abhasirikari bharasiihya Yisu

(Maaroko 15:16-20; Yoozana 19:2-3)

27 Noho abhasirikari bhu umwanangwa wi Ikirumi bhakagega Yisu, bhakaja nawe mwikur ryu umwanangwa. Bhakabhiringa riribhita ikur rya abhasirikari, bhakamwiruguura.

28 Bhakamuruusha zengebho zaazi, bhakamwibhohya ikanzu imbiriiri.

29 Bhakagisa ikirungu cha amahwa, bhakamwibhohya kumutwi na rikari kokobhoko kwazi ku ubhuryu korereke aorekani nchu amatimi. Bhakahigama mubhutangi bhwazi, akumara bhakatanga komorega bharabhuga, “Morembe, amatimi wa Abhayaahudi!”

30 Akumara bhakamutwira amati, bhakagega rikari rirya bhakamotema naryu kumutwi.

31 Hanu abhasirikari bhayo bhaamariri kumusi-ihya, bhakamuruusha ikanzu yirya na kumwibhohya zengebho zaazi. Akumara, bhakaja nawe kumbhamba kumasarabha.

Yisu arabhambwa kumasarabha

(Maaroko 15:21-32; Ruuka 23:26-43; Yoozana 19:17-27)

32 Hanu bhaari bhararwa murubhiri rwa Yirusarimu, bhakabhona umuntu wamwi Mukireene, wanu akubhirikirwa Simuni.

Abhasirikari bhayo bhakamuhatika kogega umusarabha gwa Yisu.

³³ Akumara, bhakahika ahagero hanu haabhirikiirwi Guriguta, enzobhooro yaku ni-kukihanga chu Umutwi.

³⁴ Bhakaha Yisu idivaayi yinu bhaari bhasangiryi ni induru.[†] Nawe hanu aabhunjiryi, akaanga kunywa.

³⁵ Bhakamubhamba kumusarabha, akumara bhakatwana zengebho zaazi kwa kokora ubhwituri. [Neho rikabha ring'ana rinu ryagambirwi nu umurutiriri iguru wa Yisu kubha "Bhakatwana zengebho zaani na bhakakora ubhwituri iguru wa amibhoho gaani."[‡]]

³⁶ Bhakiikara hayo korereke bhamuriibhi.

³⁷ Bhakatwara urubhao iguru wu umutwi gwazi. Urubhao ruyo rwari rwandikirwi amang'ana gu ukumugamba kubha, "WENU NI-YISU, UMUTIMI WA ABHAYAHUDI."

³⁸ Ahagero hayo, bhaareho abhasaakuri bhabhiri, bhakabhambwa hamwimwi na Yisu, uwamwi urubhaara rwu ubhuryu nu uwandi urubhaara rwu ubhamusi. ³⁹ Abhaatu bhanu bhaari bhakuhita kunzira hayo, bhakamutuka, bharasingisha imitwi jabha bharabhuga,

⁴⁰ "Nangu, utari naawi wabhugiri uraasha rihekaaru rya Mungu na kuryambaka kwa siku isatu? Nangu, ariibhi awi ni-Mwana wa Mungu, wiituaryi aumwene, wiiki kumusarabha!"

⁴¹ Ihuiubhu, abhakuru bha abhakuhaani, abhijja bhi imigiru ja Musa hamwimwi na abhakaruka bha Abhayaahudi bhakamorega

[†] 27:34 Rora Zabhuri 69:21. [‡] 27:35 Rora Zabhuri 22:18.

bharabhuga, “Akasabhura abhandi, nawe atakutura kwisabhura umwene!

⁴² Ariibhi ni-mutimi wa Abhiizirari, mmbe iiki kumusarabha, neho na niitwi tukumwisirirya.

⁴³ Ewe aramwisega Mungu, na abhugiri, ‘Inyi ni-Mwana wa Mungu.’ Mmbe, nangu ariibhi heene Mungu amusiigiri, amusabhuri.”

⁴⁴ Abhasaakuri bhanu bhaabhambirwi hamwimwi nawe, bhushi bhakamutuka.

Uruku rwa Yisu

(Maaroko 15:33-41; Ruuka 23:44-49; Yoozana 19:28-30)

⁴⁵ Mmbe, kwima ribhaga rya zisa isaasabha umwise kuhika zisa kenda, ikabha ikiirimya kucharu chusi.

⁴⁶ Zisa kenda, Yisu akarira kwiraka ikuru arabhuga, “Iruyi, Iruyi! Raama sabhakitaani?” Enzobhooro yaku, “Mungu waani, Mungu waani! Ndora untigiri?”§

⁴⁷ Hanu abhaatu bhanu bhaari hayo bhiigwiri amang’ana gayo, abhandi bhakabhuga, “Wanu arabhirikira iriya umurutiriri wa Mungu.”*

⁴⁸ Hayohayo, wumwi waabhu akaryara mweka, akagega ripuupya, akakorya mumarwa amaruru gi idivaayi, akatutura ripuupya kwikuri, akamoha Yisu anywi.

⁴⁹ Nawe abhandi bhakabhuga, “Tiga torore ariibhi iriya araaza kumusabhura!”

§ 27:46 Rora Zabhuri 22:1. * 27:47 Iriya aragambwa hanu ku kabha Abhayaahudi bhaaru bhaari bhariisirirya kabha iriya atakuuri, nawe Mungu akamogega kusi hanu mahuru na kuja nawe mwisaaru. Na bhaari bhariisega kabha iriya aragaruka kwiki kusi. Rora 2 Abhatimi 2:11; Maraaki 4:5.

50 Neho Yîisu akarîra kwiki kwiraka ikuru, akatin'ya.

51 Hayohayo, ripaziya ryu ukusikira Aharîndu ha Aharîndu mwihekaaruf† rikabhaaruka mbaara ibhiri kurwa iguru kuhika iyaasi. Isi ikarigita, zikurungutari zikabhaaruka.

52 Zimbihira zikiiguka ni imibhiri myaru ja abharîndu bha Mungu gikaryuka.

53 Hanu Yîisu aaryukiri bhakarwa muzimbihira zaabhu, bhakasikira Yirusarîmu, bhakarorwa na abhaatu bhaaru.

54 Hanu umukuru wa abhasirikari hamwimwi na bhanu bhaari bhakuriibha Yîisu bhaaruuzi iki-rigitu chi isi na agandi guusi ganu gakuriibhwi, bhakubhaha bhukung'u, bhakabhuga, "Heene, umuutu wanu aari Umwana wa Mungu!"

55 Hayo bhaareho na abhakari bhaaru bhanu bhaari bhakutuna Yîisu kurwa Gariraaya na komohokerya. Abhakari bhayo bhiimiiriiri kwa kore bhararora guusi ganu gaari gakokorebhwa.

56 Mubhakari bhayo, bhaarimu Mariyamu wa Magidarena, Mariyamu unina Yaakobho na Yuusufu, na unina wa abhaana bha Zebhedaayo.

*Yîisu arabhiikwa
(Maaroko 15:42-47; Ruuka 23:50-56; Yoohana 19:38-42)*

57 Hanu ryahikiri rigoroobha, akaaza umwiga wamwi wa Yîisu iriina ryazi Yuusufu. Yuusufu

† 27:51 *Ripaziya ryu ukusikira Aharîndu ha Aharîndu mwihekaaruf* riyo ryari mwihekaaruf, rirakinga abhaatu bhasikira Aharîndu ha Aharîndu, hanu ubhwirubhwa Mungu bhwikiiri. Rora Abhibhuraaniya 6:19, 10:19-22. Kumaragirira bhukung'u, rora ring'ana *rihekaaruf* muKiniibhasa.

wuyo aari muniibhi kurwa urubhiri rwa Ari-mataaya.

58 Yuusufu akaja kwa Piraato, akamusabha ikitundu cha Yisu. Piraato akaswaja abhasirikari bhaazi bhamohe ikitundu kiyo.

59 Akaja, akagega ikitundu, akakiringira musanda.

60 Akatwara ikitundu mumbihira yaazi ihya ya ribhigi rinu ryari ritukirwi kwitari. Akumara akahiringitya riibhwi ikuru akakundikirya ikisiku chi imbihira, akarweho.

61 Ribhaga riyo, Mariyamu wa Magidarena na Mariyamu wundi wurya, bhaari bhiikiri bhirikiri imbihira.

Abhasirikari bharariibha imbihira

62 Urusiku rwa kabhiri, runu rwari urusiku ruu ubhuturu, abhaku bha abhakuhaani na Abha-farisaayo bhakiibhiringa kwa Piraato.

63 Bhakabhwira Piraato, “Umukuru, tarahiita kubha hanu umubhiihi wurya aari akiri muhuru, akabhuga, ‘Urusiku rwa katatu, niraryuka.’”

64 Nangu twasabha ubhatami abhasirikari bhariibhi imbihira kuhika urusiku rwa katatu. Ariibhi utakutwara abhariibhi, abhiga bhaazi bharatwara bhakaaza kwibha ikitundu chazi na kukangirirya abhaatu kubha aryukiri kurwa mubhaku. Bharaakorebhu, ururimi ruyo rwarabha rubhi bhakung’u kukira runu rwakangatiri.”

65 Piraato akabhagarukirya, “Mogege abhasirikari, muji muriibhi kwa amanaga gaanyu guusi.”

66 Neho bhakaja kumbihira, bhakatwara urukaamu kwibhwi, korereke rihiringitibhwi,

bhamenye. Bhakabhatiga abhasirikari hayo korereke bhariibhi imbihira.

28

Yisu araryuka

(Maaroko 16:1-10; Ruuka 24:1-12; Yoohana 20:1-10)

¹ Hanu urusiku rwu abhuturu rwahitiri, mamacha urusiku rwu abhutangi rwi inyuma,* Mariyamu wa Magidarena hamwimwi na Mariyamu wundi wurya, bhakaja korora imbihira.

² Rogendo rumwi, kikabhaho ikirigitu kiku chi isi, ku kubha maraika wu Umukuru Mungu akiika kurwa mwisaaru. Maraika wuyo akiisuka kumbihira, akahiringitya riibhwi rirya rusiza, akaryikarira.

³ Aari arabharya nchu urukubha, na zengebho zaazi zaari nziru pee ncho omosoke.

⁴ Hanu abhasirikari bharya bhaaruzi gayo, bhakubhaha bhakung'u, bhakabha nkina bhakuuri.

⁵ Hayo, maraika wuyo akabhurira abhakari bharya, "Mutubhaha! Nizi maramohya Yisu wa Nazariiti, wunu aabhambirwi.

⁶ Atari hanu! Aryukiri, chimbu aabhugiri. Muuzi morore hanu bhaari bhamutiiri.

⁷ Muji bhwangu, mubhabhuriri abhiga bhaazi, 'Aryukiri kurwa kubhaku, na arabhakangatira kuja mucharu cha Gariraaya. Iyo niyu mokomobhona!' Nangu nimariri kubhabhurira kinu chari kinditiri!"

* **28:1** *Urusiku rwu abhutangi rwi inyuma* kuBhayaahudi ni-Jumapiri.

⁸ Neho abhakari bhayo bhakabhuuka bhwangu kurwa mumbihira hayo, bhanu ubhwubha no obhozomerwa bhukuru. Bhakaryara kuja kubhabhuruira abhiiga ganu maraika aabhabhuuriiri.

⁹ Mmbe, hanu bhaari bharaja, Yisu akarumana nabhu, akabhakeerya, “Morembel!” Bhakamwisukira, bhakamugwata amaguru gaazi, bhakamosengera.

¹⁰ Neho Yisu akabhhabhuruira, “Mutubhaha. Muji mubhabhuruiri abhahiiri bhaani† bhaji Gari-raaya, iyo niyu bharaambone.”

Abhariibhi bhi imbihira ya Yisu bharagamba ururimi

¹¹ Hanu abhakari bhayo bhaari bhakuja, abhasirikari obhorebhe abhariibhi bhi imbihira ya Yisu bhakaja murubhiri rwa Yirusarimu. Hanu bhaahikiri, bhakaragirira abhakuru bha abhakuhaani guusi ganu gaakuriibhwi.

¹² Akumara abhakuru bha abhakuhaani bhayo bhakarumana na abhakaruka bha Abhayaahudi, bhakagambana na kuhitya kubhaha abhasirikari bharyi amasooya ga zimpirya nzaru.

¹³ Bhakabhhabhuruira, “Umuntu wawusi araabhabhuuryi iguru wa ganu gakurirwi, mubhugi, ‘Ubhutiku twari tuhindiiri zendooro, abhiiga bhakaaza bhakamwibha.’

¹⁴ Hanu Piraato ariigwi gayo, itwi turagambana nawe korereke mutaaza kusikira manyaaku.”

¹⁵ Mmbe abhasirikari bhakagega zimpirya na bhakakora chimbu bhaabhuuriirwi na abhakuru

† **28:10 Abhahiiri bhaani**, enzobhooro yaku ni-bhiiga bhaazi.

bha Abhayaahudi. Amang'ana gaabhu gu ururimi gakanyaragana bhukung'u gati wa Abhayaahudi kuhika reero yinu.

*Amaswaja gi itinirwa ya Yisu kubhiga bhaazi
(Maaroko 16:14-18; Ruuka 24:36-49; Amahocha
ga Abhatumwa 1:6-9)*

¹⁶ Abhiga bha Yisu ikumi na wumwi bhakaja Gariraaya mukiguru kinu Yisu aabhirikiryi.

¹⁷ Hanu bhaamuruzi, bhakamosengera, nangabha abhandi bhaari na amakibhwi kubha ni-Yisu.

¹⁸ Yisu akabhiisukira, akabhabhurira, “Nihirwi ubhanaja bhwasi bhwa mwisaaru na muusi.

¹⁹ Nangu muji kubhaatu bhi ibhyaru bhyusi na kubhakora kubha abhiga bhaani. Mubhabhatiizi kuriina rya Bhaabha, na rya Umwana na rye Ekoru Indindu.

²⁰ Mubhiji kugwata guusi ganu nabhaswajiryi imwi. Rora, na niinyi niri hamwimwi na niimwi ribhaga ryasi, kuhika mutinirwa yi isi.”

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553